

नवाश्चमीव



मल्लक सुदच

नेवा: म्हशीका (THE NEWAR IDENTITY)

१९२० ने. सं.

मल्ल के. सुन्दर

न्हापांगु पिंथना :- ३००० गू
नेपाल संवत् १९२०

थाकूः
सेवा प्रिन्टिङ्ग प्रेस
टेकू, यैं ।
फोन नं. २४३७५४

कम्प्यूटर सेटिङ्गः
भरत कृष्ण महर्जन
त्यौड, यैं ।
फोन नं. २६६७९८

मू :- ५०/- (न्ययेतका जक)

छबः
इमेज डिजाइनर
बागबजाः यैं ।

छबः आखः
शरद कसाः
थाय्मदु, यैं ।

जि काहूपिं अनीश व अश्मितयात.....

— सुन्दर

નહયસ્ત્રું	—	૫૬
ધઃગુ સ્ત્રું	—	૬૭
નેવાઃ મહસીકા	—	૭૮
નેવાઃ જીવન દર્શન	—	૮૯
નેવાઃદુને લોક કલ્યાણયા આવના	—	૯૭
રાષ્ટ્ર નિર્માણય્ નેવાઃયા ભૂમિકા	—	૧૦૮
નેવાઃ સંગઠન ય આન્દોલન	—	૧૧૯
તંસા-પૌ	—	૧૨૮

न्हयखँ

मल्ल के. सुन्दरजुया न्वचू गुलि ज्वः वयकःया च्वसानं उलिहे ज्वः धयागु खँया दसु थ्व “नेवाः म्हसीका” सफू खः । मल्लजु जिगु न्हयःने दनाः वयकःया म्हुतुंहे जितः नेवाःया इतिवृत्ती कनाच्चवनादीथें ताला खुसि न्ह्यानावंथें दिपाःमदयेक न्ह्यानावनाच्चंगु नेवाः म्हसीकाया खँल्हाबँल्हा शैलिं सफू क्ववमचाःतक जितः सालायंकूगु जिंहे मचाः ।

थौयाम्ह नेवाःनं म्हिगःया नेवाःतय्त थःनालेगु छु चिं ल्यं दनि ? वयकलं “नेपाल” खँग्वः नेवाःया प्वाथं पिहाँवयाः नेवाःतय्गुहे लाहिं ब्वलंकूगु खँयातनं माःथाय् माःकथं भ्याभचाहे बरायमचासे कुलादीगु दु । थौ वहे नेवाःतय् म्हय् क्वय् व छ्चंगू जक ल्यं दनिगु खनाः मल्लजुया मिखां हाःगु ख्वबिं जिगु नुगःनापं प्याका बिल ।

नेवाःतय्हे पौरखं बाहा, बही, लाछि, पुखु, चीबहा, देगः, फलेचा, ल्वहाँहि, लुँहिंतिं देय् न्यन । थुज्वःगु कीर्तियात लिपातक्कं ल्यनेमा धयागु मतिइतयाः ज्याकथंया नांछुनाः छँबु गुथि दयेकाः लःन्हाना थकल । भीगु नुगः गुलि तब्या धयागु स्यूपिं तर, भी महितातयसं भीत थवंथः कचवं ब्वलंकाः भीत धस्वाये मबीकेत थजाः क्वजालय् कुचाथला बिल । थौ भी सीकं वा मसीकं चायेकं वा चायेकं हिन्दू, बौद्ध, मुस्मां, क्रिश्चियन धकाः हालाजूसां न्हापांला नेवाःहे

खः । भीगु धयागु धर्म छुं दुसा नेवाः धर्महे खः । भी न हिन्दू न बौद्ध, न मुस्मां न क्रिश्चियन । नेवाः देय्यागुहे न्हाय्, भी नेवाः कर्पिन्सं लुसित्वाकल धायेवं भी करकिगु जात व धर्म ज्वनाः ल्वायेगु अले ब्यागलं च्वनेगु भीत मल्वः ।

छक्वः भीदुनेहे वालास्वये-बुसानिसें दिपय् उइ धुंकाःनं सीम्ह मनु ज्यानाः नौ चुइका व्छयेगु दुनेया दर्शन छुंहे मदयेक मचातय् म्हितेथें नौया कतांमरि ज्याःगु खःला ? मां अबुया ख्वाः स्वयेगुया अर्थ सकसिनं खंगु ख्वाःस्वयेगु धकाः दच्छिइ छक्वः मां अबुया ख्वाःस्वयेगु याःगु जुइला ? हानं छक्वः दुवाला स्वया दिसं - किजापुजा व भाईटीका छगूहे खःला ? म्हपुजाया अर्थ गोवर्धन पुजां त्याजीके फइला ? सकतांदुपिं नेवाःतय्के धर्म छता मदइला ?

आजुद्यःया भैरवनाथ, अजिमायात भद्रकाली, भ्याय्चाद्यःयात भेडासिं, वास्याःद्यःयात बाङ्गेमुढा भी पुर्खाया नां हिलेवं नेवाःतय् हिनूयादुने न्ह्यानाच्वंगु हिया रंगनं पानावनिला ? भीगु द्यः, देगः, कला, बाजं, प्याखं सकतां यः, तर भी मयः । मयःगु जकनं मखुत आः जि जक ज्युसा भी सकलें न्हंका व्छये मास्तिवः, मयेका व्छये मास्तिवः, उमि । “न्ह्यस्व लिस्व, थःगु ख्वाः थःम्हं स्व” धयागु मूमन्त्र ज्वनाच्वपिं नेवाःत त्रिकालदर्शि खः । उपिं न्हनावनी धयागु देय्हे लिक्नुना वनीगु खः धयागु खँ सकसिनंहे इलय् वाःचायेकूसा बांला ।

नेवाः म्हसीकाय् मल्लजुं नेवाःतय्सं छताजक निताजक मखु देय्या दक्व ख्यलय् थःत पानाः नं देय्या न्हाय् तस्वाका ब्यूगु दसुत ब्वयाब्यूगु दु । थ्व अबु दालाय् मदुगु खँ मखु । थुकिया लागि वयकलं यक्व यक्व दसि न्ह्यःने ब्वयादीगु दु ।

महितातय्सं भीत महिल महिल किन्तु, भीसँहे भीगु भाय् त्वःता वनाच्वंगु हुनिं नेवाः धयाम्ह म्हसीके थाकुल धकाः वयकलं भीत न्वानादीगु दु । तच्चकहे हिसिदुगु नेवाः भाय्या लिस्सें क्वातुगु, दुयंगु भीगु संस्कृति खनीबलय् अजूमचाःपिं सुं मदु । भी घायँघायँ अजा-अजिपिन्सं देय्यात माःगु हलंज्वलं सकतां चूलाकाः नेवाः थःहे छगू स्यल्लाःगु राष्ट्र जुयाः क्यना बिल । तःताजिगु भाय् धर्म व जाति दुगु

नेपाःदुने नेवाः राष्ट्रं नं दु धयागु खँ थुगु नेवाः म्हसीका सफुतिं कुलाच्वंगु दु ।

मल्लजुं भीत नेवाःतय्गु स्यैस्वँ ल्हवयाः क्यनादीगु दु थ्व सफुतिइ । आः भीसँ भी मचाखाचातय्त भी सु धयागु ध्वाथ्वीक कनाबी माःगु दु । भीसँ भीत म्हसीकेगु माध्यम खः भीगु भाय् व भीगु संस्कृति । संस्कृतिया नाम ईयात मल्लःकथं भ्वासिपहलं मचायेक भ्वाकल्य् दुनेगु वाःचायेकेमाः ।

न्त्यलंब्वानाच्वं पिं नेवाःतय्त थ्व सफुतिं बांलाकहे न्त्यलंचायेकाबी धयागु जिगु क्वातुगु विश्वास - थुकिया लागि मल्ल के. सुन्दरजुयात भिंतुना लिस्सें दुनुगलनिसें सुभाय् द्यछानाच्वना ।

लक्ष्मण राजवंशी

नायः

नेवाः देय् दबू

चौलाथ्वः ३ १९२०

थःगु खँ

थनि खुदँ न्ह्यव “भी नेवाः” नांया छगू सफूचा पिथने धुंकाः नेपालभाषा मंकाः खलः व नेवाः देय् दबूयापाखें उकियात गुकथं न्यंकभनं थ्यंकेगु ज्या जुल उकियात कयाः लिपा खास यानाः स्वनिगलंपिने व देय्या कुं कुलामय् च्वनाच्चंपिं अले नेपालपिनेया नेवाःतय्सं क्यंगु अतिकं सकारात्मक लिच्चःहे थुगु सफूया हःपाः खत । इलय् ब्यलय् जुइगु नेवाः ज्याभवलय् ब्वतिकायेत थासं थासय् थ्यनीबले स्वनिगःपिनेया नेवाःतय्सं थःगु जाति, भाषा, संस्कृति आदिया म्हसीकाया सम्बन्धय् न्ह्यथनीगु जिज्ञासां जितः ताईनिसें थुकथंया छगू सफू मदयेक मगाःथें जुयाच्चंगु खः ।

अथेला, समाजशास्त्र जिगु लागा मखु, थुगु विधाय् प्रारम्भिक ज्ञानतकं मदुम्ह मनू खः - जि ! थ्व ल्याखं नेवाः जाति थुज्वःगु तःजिगु व तहाकगु इतिहास क्वबियाच्चंगु समुदायया म्हसीकायात कयाः च्वसा न्ह्याकीगु सखे, जिगु लागि दृष्टता बाहेक मेता मखु । उकिं जुइफु जिगु च्वसाया गुलिखे धापूत शास्त्रीय मान्यता कथं मचाखँ जक खनेदयेफु । यदि, अथे खत धाःसा जिं थ्वैत थःगु मगाः मचाः धकाः इमान्दारीपूर्वक नालाकाये ।

खतुं, सफुतिइ दुथ्याःगु “नेवाः म्हसीका” ने.सं. १९९१ सिल्लागाः ११ व १२ निन्हु यंक नेपालभाषा परिषदया ग्वसालय् जूगु “न्हापांगु नेवाः जाति व भाषा तःमुँज्या”य् न्ह्यब्वयागु ज्या-पौ जुल , उगु तःमुँज्याय् ब्वतिकयादीपिं विद्वानपिन्सं बियादीगु सल्लाह साउतियात दुथ्याकाः भिकागु च्वसु खः । “नेवाः संगठन व आन्दोलन” नेवाः देय् दबू स्वनेगु भवलय् ने.सं. १९९५ कउलागाः ७ व ८ स् जूगु न्हापांगु नेवाः राष्ट्रिय

सम्मेलनय् न्ह्यव्वयागु ज्या-पौयात हीका: नेवा:तय् थौतकया आन्दोलनयात कया: लिपिबद्धयायेगु कुत: जुल । नापं थुकि छुं छुं ऐतिहासिक ज्वलंत तसां कथं दुथ्यागु दु । “नेवा:दुने लोक कल्याणया भावना” टेवा , सामाजिक संस्थायापाखे २०००, जनवरी २९ कुन्हु जूगु “सन २००० पदयात्रा” या लसताय् पिथंगु “अलिकति टेवा - परोपकारको कला” (*Twice Blessed – The art of giving*) नांया सफूया नितिं खँय् भासं व अंग्रेजी भासं च्वयागु च्वसुया नेवा:भासं हीका ख: । ल्यं “नेवा: जीवन दर्शन” व “राष्ट्र निर्माणय् नेवा:तय् भूमिका” निपु पिमर्दनिगु च्वसुत खत ।

थुगु सफू आपालं नेवा:तय् नुगलय् थौकन्हय् व्वलनाच्चंगु “भी सु ?” धैगु न्ह्यस:या लिस:त मालेगु छगू बचा:धंगु लिधँसा जक जुयाबीफत धा:सानं जिगु नितिं त:धंगु सन्तुष्टिया खँ जुयाबी ।

सफूयात छिकपिनि न्ह्य:नेतक थ्यंकाबीगु नितिं नुग:चायेका: पिथनेगु भाला क्वबियादीपिं समाजसेवी व भाषाप्रेमी गोपाल राज राजभण्डारी भाजु गुम्हेसिनं भौंयात माक्व आर्थिक श्रोत चूलाका बिल अथेहे मेम्ह समाजसेवी व भाषाप्रेमी सेवा प्रिण्टिङ्ग प्रेसया थुवा: अमृतमान शाक्य भाजुं थ्व सफू प्रेसं ध्वाना: पिकायेगु व थुकिया द्यव:या प्रायोजन याना दिल । वयक:पिं निम्हहे थ्व सफूया श्रेयया धार्थेपिं थुवा:त ख: । वयक:पिं प्रति जिगु आपालं कृतज्ञता । अथेहे सफूया कम्प्युटर सेटिङ्ग ग्वहालियानादीपिं भरत महर्जन व सुविन श्रेष्ठ, द्यव:या आख: च्वयेगुलि ल्हा: बियादीम्ह शरद कसा:पिं नं उत्तिकं सुभायया पात्रपिं ख: ।

मल्ल के. सुन्दर

थकूछें, चस:, थायमदु यें, नेपा: ।

नेवाः म्हसीका

न्त्यखं

थौया नेपाःया भौगोलिक लागा पूर्व मेचीनिसं पश्चिमया महाकालीतक्क, अले उत्तरया हिमाली च्वापुगुँनिसं दक्षिण तराईया माथूतक्क न्यनाच्वंगु दु । थुकियात विश्व मानचित्रय् “ नेपाल अधिराज्य” धकाः म्हसीकावयाच्वन, थुगु देया छगू जाति नेवाः खः । श्री ५ या सरकारं ने. सं. १९९१ स कयातःगु जनगणनाया ल्याखय् क्यना तःकथं नेवाःत १०,४९,०९० (५.६ प्रतिशत) जक दु । सत्तापाखें कायेकातःगु थ्व ल्याः नेवाःतय् वास्तविक ल्याःसिबें गाक्कं म्हो, थुगु जनगणनाय् सरकारीस्तरं गाक्कं भैल्लाःयाःगु सकसिनं महसूसयानाच्वंगु खँ खः ।

सरकारी तथ्याङ्कय् नेवाःतय् ल्याः न्ह्याक्वहे क्यनातःसां थुपिं दक्कले उप्चः स्वनिगलय् दुने ५५ प्रतिशत व स्वनिगलपिने नेपाःया आपालं जिल्ला जिल्लाय् ४५ प्रतिशतया ल्याखं न्यानाच्वंगु दु । नेवाःतय् बस्तिया मूलागा नेपाल मण्डल खःसां धरान, धनकुटा, पाल्पा, पोखरा, वाग्लुङ्ग, बन्दीपुर, चैनपुर, भोजपुर, नारायणघाट, त्रिशुली, हेटौँडा, वीरगंज, रिडि, आदि लागाय् नं नेवाःतय् ख्वातुगु बस्ति दु । अले, देसपिने छगू इलय् धार्मिक कारणं पितिनाछ्वःपिं गुलिखे नेवाः परिवार भारतया वेतियाय् अझनं दनि । कालिम्पोङ्ग, सिक्किम,

दार्जलिङ्गय च्वनाः लजगाःयानाः पुस्तौया ई छ्यायेधुंकुपिं गुलिखेसिनं
अभ् थःत नेवाः धकाः गर्वयानाच्चंगु दु । थुज्वःपिं नेवाःतय् ल्याः नं
स्वंगू लाख थ्यं धैगु अनुमान दु । अले निखलः स्वखलः खःथे मखुथें
च्चंक नेवाःत मदुगु बस्ति ला नेपाःदुनेया शायद म्होहे जक थाय् दु
जुइ ।

नेवाःत न्ह्यागुकथं च्वनाच्चपिं जुइमाः उपिं नेवाः खः । नेवाःत
थःगु मूथाय् स्वनिगलय् च्वनाच्चपिं जुइमा वा स्वनिगलं सलंसः क्वय्
तापाक गुंया गुगुनं कुंचाय् च्वनाच्चपिं जुइमा, नेवाः खः । तराई
लागाया वीरगंजय् च्वनाच्चपिं नं नेवाः, अले पहाडी पाखाया बागलुङ्गय्
च्वनाच्चपिं नं नेवाः । थुकथं उखेथुखे न्यनाच्चपिं थ्व नेवाःतय् वास्तविक
म्हसीका तत्व छु, गुगु खँया दापुतिं दानाः सु मनूयात नेवाः खः वा मखु
धकाः म्हसीकेगु ?

गुबलय् तक्क नेवाःतय्सं थःगु अस्तित्व, म्हसीका थुकी दु
धइगु खँ ध्वाथुइकी मखु उबलय् तक्क नेवाःतय्सं जातिगत रुपं थःगु
सही विकासयाये फइमखु । अले, सरकारी तथ्याङ्कय् नेवाःया ल्याः दैय्
दसं पाःजुया वंथें सामाजिक वा साँस्कृतिक रुपय् नं नेवाः धइपिं थ्व
नेपालं छगू इलय् तनाहे वनेफु ।

नेवाःया इतिहास

नेपाल मण्डलं अर्थात् यें, यल, ख्वप, धौख्यः, भोतँ, दोलखा,
सिन्धुपाल्चोक, नुवाकोट, व मकवानपुर नेवाःतय् कुल छें खः । थुकिइ
फुक्क धइथें इतिहासकारतय् सहमति दु । तर, थुपिं गुब्लेनिसें थन
वसोवास यानाच्चपिं खः, नेवाःतय् दक्कले न्हापांया अवस्था वा स्वरुप
छु धइगु खँय् धाःसा तःम्हेसिया तःगू धापू दु । दक्कले अःपुक तर्क
याइपिन्सं 'भारतया नाय् यरत हे नेपालय् वयाः नेवाः जूगु खः' धकाः खँ
न्ह्यथनाच्चंगु दु । (V.A. Smith- History of Fine Arts in India and
Ceylon-Clarendon Press, Oxford-1911) गुगुं ऐतिहासिक लिधंसा
मदुगु थ्व खँयात उप्वः विद्वानपिन्सं तःकथं खण्डनयाये धुंकल ।

नाय् यरयापाखें नेवार जूगु मखुसां नेवाःया पूर्व रुप नेवार खः
धइगु खँ धाःसा सकसिनं स्यूगु खः । नेपालभाषाया वर्तमान स्वरुपकथं

नेवारया 'र' तंथाय् 'वा' ल्यूने विसर्ग छ्यलाः, 'वाः' च्या वयाच्वंगु खः । उकिं 'नेवाः' खँग्वःया रुप हिलेबल्य् आः नं भाय्या छ्यलाबुलाय् 'नेवाल' धकाः च्यावयाच्वन तिनि । नेपालभाषाया थःगु हे पहःकथं दुवालेबल्य् नं 'र' यात 'ल' कथं, 'व' यात 'प' कथं उच्चारण याइगु जूगुलिं थ्व 'नेपाल' 'नेपार' अले 'नेवाल' छगूहे स्वरुप खः धकाः अःपुक धायेफु । इतिहास शिरोमणि बाबुराम आचार्यजुं नं 'नेपाल' यापाखें नेवार, नेवाल व नेवाः जूगु खः धकाः स्वीकार यानादीगु दु । (नेपाल, नेवार र नेवार भाषा-१९५३, नेपाल साँस्कृतिक परिषद् पत्रिका, अंक-१, वर्ष-१, पेज-१-१६) इतिहासकार बालचन्द्र शर्माजुं बाबुराम आचार्य भाजुंथें धयामदीसां नेपाल व नेवारया स्वापू दुगु खँ स्वीकार याना दिसें 'नेवार' खँग्वःया व्युत्पत्ति थ्व जातिया मूल निवासस्थल, 'नेपाल' यापाखें जूगु खः । इङ्ग्लैण्डया निवासी इङ्गलिस वा अफगानिस्थानया निवासी अफगान जूथें नेपालया निवासी 'नेवार' अथवा 'नेवाः' जूगु शंका मदु" (नेपालको ऐतिहासिक रुपरेखा, प्रथम खण्ड, अध्याय-२ पौ-३९, २०३२ वि.सं., तृतीय संस्करण) धकाः धयादीगु दु ।

फ्रान्सया नांदंम्ह इतिहासविद् सिल्भां लेभिजुं " Either Newara derives its origins from the word Nepala or that Nepal owes on the contrary her name to the Sanskrit adaptation of local ethnic name" धाःगु कथं नं नेवाः वा नेपाल खँग्वःदुनेया तःधंगु स्वापू दु धइगु खँ स्पष्ट याः । थ्वहे भवलय् भारतया विद्वान भाषाशास्त्री सुनीति कुमार चटर्जीजुं ला अभ् थ्वसिवें ध्वाथुइक अले तछ्यानाः हे धयादी नेपाल खँग्वः धइगु It would appear, however, that the name came from that of a Tibeto-Burman speaking tribe, the ancestors of the present day Newar people...." वास्तवय् नेवार खँग्वः नेवाः थःपिन्सं थःपिनि नितिं छ्यला वयाच्वंगु संज्ञा मखु । छगू इलय् स्वनिगःया पिनेवःपिन्सं स्वनिगःया दुनेच्वपिं मनूतय् नितिं छ्यलीगू विशेषण जक खः । नेपाःया इतिहासविद् डा. डिल्लीरमण रेग्मीजुया दाबीकथं 'नेवार' धइगु खँग्वः दक्कलय् न्हापां गोरखाय् बनेज्यायायेत नेवाःत उखे यंकूगु ई सन् १६०५ लिपा तिनि छ्यलाबुला जूगु खः । अले, थ्वया लिपा यँया जुजु प्रताप मल्लजुं यँय् लाय्कुलिइ

थनातःगु ईस्वी १६५४ या शिलापत्रय् 'नेवार' खँग्वःया प्रयोग जूगु खनेदत । थन भाषा व लिपियात 'नेवार' भाषा व 'नेवार' लिपि धाःगु खनेदत । जातिया अर्थय थ्व खँग्वः छ्यःगु मखुनि ।

नेपाल संवत् ८८८ स गोरखाया शासकपिन्सं स्वनिगः त्याकाः सत्ता थःगु ल्हातय् लाकेधुंकाः स्वनिगःया मनूतय्त "नेवार" धकाः धायेगुलिइ छगू तीब्रता वल । थुकिया नापनापं पृथ्वीनारायण शाहया "प्यंगू वर्ण सुइखुगू जातया क्यब" धैगु दिव्योपदेशपाखें ला नेवाःतय्त छगू समुदाय (Community), छगू जाति (Ethnic Group) या पलेसा हिन्दू वर्णाश्रमया ल्याखं जात (Caste) या भवलय् ल्वाकःबुकः यायेयंकल । सरकारी क्षेत्रया थुकथंया व्यवहारं छखे नेवाःतय्दुने हीनताबोध व लघुताभासया अनुभव जुजुं वनंसा मेखे नेवाःया सही परिचय व अस्तित्व लोमंना उपिं नं ब्रम्ह, क्षेत्री, कामी, दमै थेंहे छगू जात जक खः ला धैगु भ्रम नं उतिकं ब्वलंकाबिल ।

वर्णाश्रमया ल्याखं नेवाः न त वैश्य खः, न त शूद्र । थ्व गुगुं जात विशेषण मखु । बरु, नेवाः स्वयं हे छगू पूर्णाङ्ग खः । उकिं नेवाः खँग्वःयात गुगुं जात विशेषया पर्यायकथं छ्यलेत स्वयेगु ऐतिहासिक तथ्ययात म्वयेथ्यायेगु जर्वजस्ति कुतः जक खः । थुज्वःगु कुतलं "नेपाल" यापाखें हे नेवाः जूवःगु खः धइगु ऐतिहासिक विकास क्रमयात नं लोमंके थें जक जुइ । जातिया अर्थय 'नेवार' खँग्वः छ्यःगु मल्ल कालया सनिलइल् नेपाः वःपिं क्यापुचिन पादरीपिन्सं सन् १७९३-१७ पाखे रोमय् च्वःगु थःगु पत्र व्यवहारय् न्हापां खनेदत ।

"नेपाल" खँग्वःया स्रोत

खतुं "नेपाल" या नेवाल वा नेवाः जूवःगुलिइ विवाद मदु । तर "नेपाल" खँग्वः गुकथं ब्वलन धइगुलिइ धाःसा विद्वान्तय् थःथःगु बिचाः, तर्क व दावी दु ।

'नेपाल' खँग्वःया स्रोत मामां वनेबलय् विद्वान्तय्सं ईसापूर्व प्यंगू शताब्दिपाखे च्वयातःगु धकाः अनुमान यानातःगु "अथर्वपरिशिष्ट" ग्रन्थया कर्मविभागय् 'नेपाल' खँग्वः यात थुकथं छ्यलातःगु खनेदु "नेपालं कामरुपं च विदेहोदम्बरं तथा । तथावऽत्या कैकया सा

उत्तरापूर्वे हत हन्योत ॥” तर, गुलिखे विद्वानतय्सं थ्व ग्रन्थ ईस्वीया प्यंगूगु शताब्दिसिबें लिपातिनि च्वःगु जुइ धकाः धया वयाच्वंगु दु । श्रावस्ती सम्बन्धीया विवरणबिसें तःधम्म बौद्ध विद्वान जिनमित्रजुं च्वयादीगु “ मूलसर्वास्तिवाद विनय संग्रह” (टोफियो संस्करण, अध्याय - ११ , नैसर्गिक-१६ या पौ १००) सं नं ‘नेपाल’ खँग्वयात छ्चलातःगु खनेदु । अनुमानित ईस्वी स्वंगूगु शदिया कौटिल्यया अर्थशास्त्र सफुतिइ भीसं खनी “अष्टप्लोतिसंघात्या कृष्णा भिङ्गसी वर्षवारणमपसारक इति नैपालम्” (अधिकरण-२, अध्यायया-११, सूत्र-१०६) धकाः नेपालयात देया रुपय् न्यथनातःगु । थ्वहे भ्वलय् भरतमुनिजुया अतिकं नादंगु नाट्यशास्त्रया अध्याय-१४ स ‘नेपाल’ यात देया नांया भ्वलय् दुथ्याकुगु दु । “अगंबंगकलिङ्गाश्च वत्सश्चैवोद्र मागधा । पौण्ड्रानैपालिकाश्चैव अन्तर्गिरि बहिर्गिरा ।” (अध्याय-१४) थन देया नां अनया सम्बन्धित वासिन्दा जातिया नामं संबोधन जुयाच्वंगु यच्चुक सीदु ।

भारतया च्वन्त्याम्ह सम्राट समुद्रगुप्तजुया (ईस्वी ३३५-३४५) इलाहावादया विजयस्तम्भया नीनिगू भ्वलय् च्वंगु “.....समतट उवाक -नेपाल-कामरुप- कर्तपुरादि-प्रत्यन्तनृपतिभि.....।” या थ्व खँपुतिं नं ईस्वी ३३५ पाखेहे ‘नेपाल’ देया नां हिन्दू उप-महाद्विप्य् प्रसिद्ध जुइधुंकुगु प्रमाणित जू ।

अय्सां “नेपाल” खँग्वः गुकथं ब्वलन ? थुकिया पाय्छि अर्थ छु खः । नेपाःया दक्कले पुलागुं ऐतिहासिक ज्वलं “गोपालराजवंशावली” दुने धाःसा नेपाल खँग्वःया स्रोत वा अर्थयात कयाः छुं धयातःगु मदु । बरु, मध्यकालपाखे धार्मिक आस्थाया लिधँसाय् च्वयातःगु ‘स्वयम्भूपुराण’ ‘पशुपति पुराण’, ‘नेपाल महात्म्य’ ग्रन्थय् धाःसा ‘नेपाल’ खँग्वःयात थःगुहे कथं ब्याख्यायायेत स्वःगु दु । हिन्दुतय्सं हिन्दू धर्मया लिधँसाय् ‘ने’ धाःम्ह मुनियापाखें पालना यानावयाच्वंगुलि ‘नेपाल’ धाःगु खः धकाः तर्क ब्वयातःगु दु । अथेहे बौद्धमार्गीपिन्सं नं महायानी बौद्ध धर्मकथं ‘ने’ धाःम्ह स्व-उत्पत्तिजूमह आदिबुद्धयापाखें पालन यानातःगु वस्ती जूगुलिं ‘नेपाल’ धाःगु खः धकाः धयाच्वंगु दु ।

नेपाःया विद्वान इतिहासकार डा. डिल्लीरमण रेग्मीजुं धाःसा

नेपाल' खँग्वः नीप+आलय छगू जुयाः 'नेपाल' जूगु खः धयादिगु दु । वयकःया व्याख्याकथं 'नीप' या अर्थ लःदुगु अले 'आयल' धइगु थाय् जुल । न्हापा नेपाःगाः पुखू जूगुलिं 'नेपाल' धाःगु खः धकाः 'नेपाल' खँग्वःयात संस्कृतया रूप बियाः दुवालेगु कुतःयानादीगु दु ।

मेखे, नर्वेया संस्कृत विद्वान् क्रिश्चियन लासेनजुं (Christan Lassen) नं 'नेपाल' खँग्वःयात नीप+आलय कथं ब्वथला दीगु दु । तर, वयकःया कथं 'नीप' या अर्थ गुँचवया क्वय् खःसा 'आलय' धाइगु मनू च्वनाच्वंगु वस्ति खः । तर, थ्व सकल विद्वानपिनि धापूयात धाःसा संस्कृतया विद्वान - भारत-तिब्बत सम्बन्धी विशेषज्ञ सिल्भां लेभिजुं 'नेपाल' खँग्वःयात संस्कृत भाय्नाप गुगुं स्वापू दुगु खँयात नकारेयाना दिसें "The name Nepala despite its Sanskrit appearance , does not lend itself to a satisfactory etymological explanation " धयादिल । विद्वान सुनीतिकुमार चाटर्जीजुं थ्वैत अभ्र स्पष्टयासैं धयादी कथं..... It would appear, however, that the name came from that of a Tibeto-Burman speaking tribe the ancestors of the present day Newar people खः ।

नेपाः गालय् लिच्छवी , थकू वा शाहत वयेन्त्यव मंगोल वंशया मनूतय्सं शासन यानाच्वंगु वा उमिसहे ल्हाइगु जनभाषां थनया आपालं थाय्या नां छुनातःगु खँ अनुसन्धानयापाखें सिद्ध जुइधुंकुगु हे खः । ख्वःपृङ्ग, म्हसपृङ्ग, टेष्टुङ्ग, टेकुसि, यम्बु, यंगाल, आदि थें हे 'नेपाल' खँग्वः नं थथेहे गैरसंस्कृत मूलपाखें ब्वलनाः थौया रुप काःगु खनेदु ।

डा. कमलप्रकाश मल्लजुं तिस्तुङ्गया वसन्तदेवया इस्वी ५१२ या छगू शिलालेखयात दसि कथं न्ह्यब्वयाः 'नेपाल' धइगु थाय्या नां मखसैं छगू जातिया नां खः धयादीगु दु । न्यागूगु शताब्दीनिसैं गुंगूगु शताब्दीयादुने लूगु नेपाःया मध्यकालीन निसः व चाःचू शिलालेखत मध्ये थ्व छगू व मेगू निगू शिलालेखया प्रारम्भय् ज्वःलाक 'स्वस्तिनैपालभ्य' धकाः संवोधन यानातःगु दु । थुकिइ निगू ६०७ इस्वीया अंशुवर्माया शिलालेख नं दु । थ्यंमथ्यं छगू शताब्दी धइथें पाःगु थ्व स्वंगुलिं शिलालेख छगूहे थासय् लुगू दु । अले स्वंगुलिं शिलालेखय्

‘स्वस्तिनैपालभ्य’ धकाः सम्बोधन जुयाच्चंगु दु । ‘स्वस्तिनैपालभ्य’ धकाः बहुवचनया रूप्य् छयलाः नेपालतय् भिं जुइमा’ धयातल । थुकिं ‘नेपाल’ धइगु थाय् विशेषया नां मखसें छगू निश्चित थासय् च्वपिं विशेष जातया मनूतय् संबोधन याइगु संज्ञा खः धकाः कयं । तिस्तुङ्ग लागा नेपाःया आदिवासी आभीर सापूतय् छगू मूवस्ति जुयाच्चंगु अले, लिच्छवी शासकत व आभीरतय् दथुइ इलय् ब्यलय् जुयाच्चनिगु सत्ता संघर्षया विवरण उगु ईया इतिहासय् भीसँ खंकेफु । जुइफु, अनया आभीरतय् लय्तायेकेत लिच्छवी जुजुपिन्सं मेमेथाय् च्वकीगु शिलास्तम्भया शैलीसिबें पाक्क स्थानीय जनतायात विशेष महत्व बियाः उमिगुहे नामं ‘स्वस्तिनैपालभ्य’ धकाः संबोधन याःगु खः । वसन्तदेव व अंशुवर्माया निगू शिलालेख तिस्तुङ्गया स्कूल न्हयःने लूगु खःसा मेगु छगू धाःसा अनं छगू कि. मि. उखे भटुवाल धइगु थासय् दु ।

विद्वानतय्सं ‘नेपाल’ सँय्-बर्मेली खलःया खँग्वः धकाः धयाच्चंगु धापूया लिधँसाय् डा. मल्लजुं नेपाःया आदिवासीत आभीर/गोपाल/महिषपालयात नेपाःया सँय् बर्मेली भासं अर्थ छयाना दीबले डेहे=सा,मेय्, पा=लहीम्ह मनू । थ्व ‘डपा’ जातिया मनूतय् संस्कृत भासं ‘नेपाल’ संबोधन जूगुःखः । (Nepala : Archaeology of the Word-1989- PATA Souvenir – Heritage Preservation : Tourism for Tomorrow PATA: Nepal Chapter and the Heritage Society)

थथे स्वदेशी व विदेशी विद्वानपिनि अध्ययन व विश्लेषणयापाखें अन्ततः स्पष्ट जूवइगु खँ खः, नेपाल जातिया नां खः, अले नेपालया हे आधुनिक रुप नेवार वा नेवाः खः । थ्वहे नेपाल जातिया नामं लिपा भीगु देशया नां नेपाल च्वंगु खः ।

ऐतिहासिक भवलय् नेवाः

खतुं ऐतिहासिक रुपं छगू निश्चित लागाय् च्वपिं मनूत गोपाल/महिषपाल/आभीरतय् नितिं छयःगु संज्ञा खः- नेपाल (डहेपा) । तर इतिहासया थथ्याः क्वथ्याः वा थीथी घःमाः चाःचाःतूबलय् सत्ताय् नं ह्यूपाः वल । अले, आदिवासी आभीरतय् चीकाः किरातत वल,

वंशावलीकथं थुमिसं ३२ गू पुस्तातक राज यात । लिच्छवीत ला ईसापूर्व ४८४पाखे हे स्वनिगल्य दुहाँ वःसां किराततय्त चीकाः ईस्वी ४६० निसें शासन थःगु ल्हातय् लाकल । थ्वहे भवल्य् इस्वी ५९४-६२१ तक बर्मनतय्सं शासन न्हयाकल, थकू जुजुपिन्स इस्वी ८७९ निसें १२०० तक व थ्वयां लिपा मल्लतय्सं इस्वी १७६९ तक राज्य यात थुकथं सत्ताय् जक छगूया लिपा मेगु वंशया शासकतय् ह्युपाः वःगु मखसें ईसापूर्व ४६२ स कपिलवस्तु राज्य नष्ट जुइधुंकाः शाक्यत नं दक्षिणं स्वनिगः दुहाँ वल । इस्वी ५३० पाखे कोलियत नं स्वनिगः थ्यन । मल्लकालय् कर्णाटक वंशयापिनाप इहिपा स्वापू हे च्वन । मैथिली ब्रम्हूतय् स्वनिगल्य विशेष वनेच्वने जुल । १५०१ इस्वीपाखे जुजु रत्न मल्लया पालय् स्वनिगल्य मुस्मांतय्गु नं प्रवेश जुल । अथेहे इस्वी १६३९ स जुजु प्रताप मल्ल्या राज्य कालय् इसाईत नं नेपालय् दुहाँवये धुकूगु इतिहासय् खनेदु ।

थथे थीथी इलय् सत्ताय्वःपिं जुइमा वा नेपालय् दुहाँवःपिन्सं ऐतिहासिक भवल्य् थःत गुगु नं रुपय् नेवाः धकाः परिचय बीत धाःसा स्वःगु मदु । अझ शासकपिन्सं ला थःत किरात , लिच्छवी , मल्ल वा थकू धकाः गर्वपूर्वक म्हसीकेगु यानावयाच्चंगु खनेदु । इस्वी १७६९ , गुब्ले तक स्वनिगःदुनेया राज्यसत्ता गोरखाया खस जुजुपिनि ल्हाःतय् मवःनि उब्ले तक थनया जनतां ल्हाइगु सम्पर्क भाषा व संत्ता नालातःगु 'देशभाषा' नेपालभाषा- नेवाः भाय् हे खः । तर , गुवले खस जुजुपिन्सं राज्यसत्तायात न्ह्याकल उब्लेनिसे खँय् भाय् राज्य भाषा जुल । थ्व स्थितिइ खासयानाः स्वनिगःदुने सत्ताय् च्वंपिनिगु भाय् ल्हाइपिं व न्हापानिसें नेवाः भाय्यात थःगु भाय्कथं ल्हानावयाच्चंपिं थीथी धर्म , संस्कृति व जातया मनूतय् दथुइ भाषिक रुपं ब्वथलेगु जुल : . " It is only after 1769 that Newar designates someone who speaks Newari -Decalan Quigle Ethnicity without Nationalism : The Newar of Nepal - 1987-Europen Journal of Sociology Vol. 28, 1987) खस जातिया शासकतय्सं बियाव्यूगु तात्कालिक संज्ञाया लिच्चलं नेवाः (नेवार) या लागा न्हू कथं चकन । प्राचीन इलय् म्येपू सापू (महिषपाल/ गोपालतय्त धयावयाच्चंगु

‘नेपाल’ जाति वाचक संज्ञादुने शाक्य, कोलिय् लिच्छवी, थकू, मल्ल आदि नं दुतिनाः फुक्क नेवाः जुल ।

नेवाःया म्हसीका

थौ न्ह्यागु रुपय् नेवाः धकाः धायेगु यानावयाच्वंगु खःसा थ्वया गुगुं छगू म्हसीका तत्व (Identity) ला दयेमाः, यदि दुसा उज्वःगु तत्व छु खः ? छुकिया लिधंसाय् सु मनू नेवाः खः वा मखु धकाः म्हसीकेगु ?

समाजशास्त्र, नृतत्वशास्त्रकथं गुगुं जाति, समुदाययात म्हसीकेगु मू लिधंसा उपिं बसोवास यानाच्वंगु भौगोलिक लागा, मनूतय् ख्वाः, म्हगः वा नश्ल, धर्म, संस्कृति अले भाषा खः थ्वहे सिद्धान्त कथं नेवाःतय् त म्हसीकेगु छगू मंका चिं मालेबलय् गुगुं निश्चित भौगोलिक लागाय् च्वनाच्वपिन्त जक नेवाः धकाः धायेगु अःपु मजू । नेवाःत शाहकाल लिपा जक बनेज्याया नितिं लजगाःया नितिं स्वनिगःपिने च्वंवनाच्वंगु मखसैं जुजु रामशाहया पालय् यलया बंजात गोरखा वनाः पसः चायेकाः अनहे च्वनाच्छःगु खः । उकिं लागा क्वःछिनाः वा नेपाल मण्डल वा स्वनिगःदुने च्वपिं जक सकलें नेवाः अनं पिनेच्वपिं नेवाः मखु धकाः नेवाः परिचयया नितिं भौगोलिक लिधंसा न्हयब्वयेगु पाय्छि मजू ।

जातिया म्हसीकेगु छगू लिधंसा मनूतय् ख्वाः, म्हः वा उमि नश्ल नं खः, तर ब्रम्हू, स्यस्यःत स्वयेबलं दक्षिणया आर्य मूलयापिं खने दुसा उराय्, गुभाजु आपालं उत्तरया मंगोलनाप ज्वःला । अले ज्यापु, दुँइ, च्यामखलः अण्टाइड ड्राभिड नं ख्वाः वः । थथे, थथे ख्वाःवःपिं जकं नेवाः धकाः शारीरिक बनौटया लिधंसाय् नेवाः जातियापिन्त म्हसीकेगु संभव हे मदु ।

नेवाःभाय् व नेवाः

स्वनिगःया भौगोलिक सुन्दरताया कारणं जक मखु थनया उर्वरभूमि सँदे व भारतया दथुइ बनेज्याया निम्तिं छगू मूकेन्द्रथें जूगुलिं थीथी इलय् थीथी शासकपिन्सं थनया राज्य थःगु ल्हाःतय् लाकल । अले ई बिनावंवलिसैं शासकत व शासकतनापं स्वनिगलय् दुहाँवःपि न्हून्हूपिं

जातिया मनूत नं सदांया नितिं थनहे च्वनाछ्वत, बुलुहुँ उमिसं
स्वनिगःया लःफय्नापं थनया कला, संस्कृतिलिसें नं भ्यलयेपुने
सयेकल । अले, तिब्बती मूलया किरातत न नेवाः जुल, आर्य मूलया
शाक्य, कोलिय, लिच्छवी, थकू, मल्ल नं नेवाः जुल । उलि जक मखु
विहारं वःपिं धोब्यात, अले काश्मिरं कुहाँवःपिं मुस्मातं नं नेवाः
जुल । थथे थीथी इलय्, थीथी कथं नेपाःगाः दुहाँवयाः गुब्ले थुमिसं नेवाः
भाय्यात थःगु मांभाय् कथं नालाकाल उपिं सकले नेवाः कथं परिचित
जुल , छाया धाःसा “नेवाःतय दथुइ छुं दःसा व तत्त्व थ्वहे धकाः धायेगु
मानवशास्त्री , साँस्कृतिक, सामाजिक वा मेमेगु प्रमाणित आधार छुं
मदु । ...नेवाःतयसं ल्हाना वयाच्चगुं गुगु भाय् खः व भाय् हे थ्व
सम्बन्धया छगू क्वातुगु प्रमाणिक आधार खः ” - डा. कमलप्रकाश
मल्ल-भीगु भाय् : भीगु खँवः- सिकःमिया स्वाने-पौ २२५,१०९८ ने.
सं.) मखुसा , भीगु पुचलय् च्वनाच्चपिं धोब्यात व भारतय् च्वनाच्चपिं
धोब्यातय्गु दथुइ पाःगु छु दु ? उमिगु जात, उमिगु ख्वाः म्हगः जक
स्वयाः गुम्ह नेवाः खः, गुम्ह मखु धकाः म्हसीकेगु गथे ? स्पष्टः खः,
सुनां सुनां स्वनिगलय् वयाः नेवाःभाय् मांभाय् नाल, उपिं नेवाः
जुल , अले सुनां मेता हे भाय् ल्हानाजुल उपिं नेवाः मजुल । मिथिला
प्रदेशं थीथी इलय् स्वनिगः दुहाँवःपिं भा व मिश्रतय्गु सम्बन्धय् नं
थथेहे शारीरिक, साँस्कृतिक रुपय् थौं नं स्वनिगलय्च्चपिं तिरुहुत
ब्रमहूतय् दथुइ समानता दनि । अभ्रनं उखे वैवाहिक समबन्धतय्गु
ज्या जूनि । तर, मिथिला प्रदेशय् च्वनाः मैथिली खँल्हानाजूपिं सकले
मैथिली जुलसा स्वनिगलय् वयाः नेवाः मांभाय् ल्हानाच्चपिं नेवाः
जुल । जातया त्याखं जक सुनं छम्ह मल्लयात खँय् वा नेवाः धकाः
गथे सीकेगु ? सुना थःगु मांभाय् नेवाःभाय् नाल उपिं नेवाः मल्ल
जुल , सुनां खँय् भाय् मांभाय् ल्हाना जुल, उपिं खँय् मल्ल जुल ।

खः, प्राचीन इलय् नेवाः धइपिं छपुचः आदिवासी खः, तर,
तःहाकःगु इतिहासया भवलय् थ्व नेवाःदुने उत्तर, दक्षिणवःपिं थीथी धर्म,
संस्कृति, नश्ल आदिया मनूत दुतिन । लिपा जूबलय् थ्वया पुलां स्वरुप
तना : छगू तःधंगु समुदाय (Community) या रुप काल । नेवाः
जातिया बनोटय् जक मखु थ्वया भासय् तकं थुकिया लिच्चः लात ।

भाषागत स्वरूपया ल्याखं जक खँल्हायेगु खःसा नेपालभाषा सँय् बर्मेली खलःया भाय् खः (Brain Hodgson: Eassay on the Languages , Literature and Religion of Nepal and Tibet, -1828) तर, दक्षिण वःपिं आर्यमूलया मनूतय् संसर्ग यांनाः थुकिइ दुने आपालं संस्कृत मूलया खँग्वःत दुहाँवल । उकिया प्रभाव गाक्कं लात । थ्वहे ल्याखं थीथी सामाजिक, साँस्कृतिक अन्तरक्रिया लिपा “स्वनिगःया सकल वासिन्दापिन्त छगू हे जातीय पुचः तायेकेगु प्रवृत्ति ब्वलनाः लिपा नेपाल देया नामं थुमिगु मंकाः नांकथं नेपालय् च्वपिं नेपाःमियात नेवाः धायेगु यानाहःगु अनुमान दु” (हरिराम जोशी, नेपालको प्राचीन अभिलेख - २०३०)

थ्व ल्याखं नेवाः मूलतः छगू भाषिक जाति (Lingual Community) खः । थुमिगु छगू म्हसीकाया आधार नेवाः भाय् खः । उकिं सुनां सुनां नेवाः भाय्यात मांभाय् कथं ल्हात, उपिं सकलें ऐतिहासिक क्रमय् नेवाःया धलखय् दुतिना विल ।

थौंया समस्या

भाय्हे नेवाः जातिया मू परिचय जूगुलिं भी महाकवि सिद्धिदास महाजुं ‘भाषा म्वाःसा जाति म्वाइ’ धकाः भी सकसितं न्वाना थकादीगु खः । तर, राजनैतिक, सामाजिक व आर्थिक कारणं नेवाःत स्वनिगलं पिनेपिनेनं च्वंवने माल । थुकिं यानाः नेवाःतय् वस्ति छगू थासय्तुं लिक्नुनेगु पलेसा दे न्यंक चकन । नेवाःत थौंया नेपाःदुने गन जक मदु धकाः न्हाय्तपुकेगु थाय् भीत दत । तर, थ्वया नापनापं ‘मां-अबुं थाय् त्वःतल, मस्तय्सं भाय् त्वःतल’ धइगु खँपुयात ल्वयेक स्थिति ब्वलन । नेवाःत स्वनिगलं पिहाँ वनाः गन गन ख्वातुक वस्ति दयेकल, अन अन उमिसं जात्रा, गुथि स्वनाः थःगु संस्कृति व भाय्यात ल्यंकातुं तल । तर, गन गन प्यंगू, न्यागू जक नेवाः परिवार दु , उज्वःगु लागाय् अल्पमत नेवाःतय्सं भेषभूषानिसें भाषा तकं त्वःतल । निनि, पाजु, मलेजु थुज्वःगु छता निता नेवाः खँग्वः उमिगु बोलचालय् अवशेषकथं ध्वदुइफु, अले स्वनिगलं गुलिखे दँ न्त्यवः बसोबासयाःवःपिं नेवाः पूर्खातय् छय्, छुइपिं खः धइगु लुमन्ति जक उमिके दिन ।

मेखे नेवाःत स्वनिगः थुज्वःगु केन्द्र्य च्वनाःनं सरकारया भाषिक नीति वा थःगु च्यः मनोवृत्तिया कारणं थः व थः मस्तयत नेवाः भाय् मल्हाकेगु यानावयाच्चंगु नं दु, यद्यपि थुमिसं थःत नेवाः धकाः दावी यायेगु धाःसा त्वःतूगु मदुनि ।

श्री ५ या सरकारया दक्कले लिपाया तथ्याङ्क कथं भिगू लाख पीद्वः चाचू दु धाःपिं नेवाःतय् पुचलय् ३७.५ प्रतिशत मनुखं आः नेवाः भाय् मल्हाये धुंकल । मेखे देसपिने खास याना दार्जलिङ्ग, सिक्किम, कालिम्पोङ्ग आदि भारतय् च्वनाच्चपिं लखं लखं नेवाःतय् सन्तानतय्सं सुनां थौतकनं थःत नेवाःधकाः धायेगु मत्वःतूनि उमि दथुइ नं नेवाःभाय् ल्यानाच्चगु मदये धुंकल थ्व थौया भीगु यथार्थ खः ।

अथे खःसां न्त्यागुहे जूसां नेवाः समुदायया संरचना व थ्वयात छगू सूत्रय् गुगु तत्त्वं चिनावीगु ज्यायात धकाः ऐतिहासिक विकासक्रमयात दुवालेबले थ्व तत्त्व धैगु भीगु मांभाय् नेपालभाषाहे खः धकाः भीसँ स्वीकार यायेहेमाः । अले, नेपालभाषायात त्वःतावीगु धैगु नेवाःतय्सं थःगु म्हसीकाया छता मू आधारयातहे त्वःतेगु खः धकाःनं थुइकेमाः । नापं थथे मांभाय् त्वतावं वनेगु प्रवृत्तिं नेवाः समुदायया म्हसीका ल्यंकेगुलि लिपा थ्यंकाः ग्यानापुगु संकटहे हयावीगु खँय् वाःचायेकेमाः ।

खयेत ला खः, नेवाः पूर्खाया मस्त, तर, थौं थःगु मांभाय् नेवाःभाय् ल्हायेमसय् धुंकल, उज्वःपिन्संनं थःत नेवाः धकाः म्हसिकेगु कथं थःथःगु नांया ल्यूने जात च्वयेवले नेवाः जुयागुया चिं घाकेगु ला मत्वःतुनि । तर, गुबले भीसँ छगू समुदायया , छगू समाजया म्हसीकाया खँल्हाये, उब्बे सुं पिनेयाम्ह मनू वयाःस्वइबले उम्ह मनुखं नालाच्चंगु जीवन शैलीया विविध पक्ष अले उकिया माध्यम वं थः सु धकाः म्हसिकावीगु व्यवहार यानाच्चंगु दु कि मदु धैगु मून्त्यसः जुइ । छम्ह मनू शेर्पा खः धकाः वं पुनाच्चंगु वसः, वया तिसा, वया भाषा, अले ख्वाः, उनं जक मखु वया विधि-व्यवहारं उलाः क्यनाच्चनि । व थम्हं जि शेर्पा धकाः दावीयायेमाःगु अवस्था दइमखु । तर, गुब्बे सुयातं जि थथे खः धकाः दावीयायेमाःगु अवस्था वइ, उब्बे व मनुखं थःगु विस्कं म्हसीकाया चिं न्हंकाळ्छये धुकूगु जुइ । उकिं दावी जक

प्रयाप्त मखु धैगु खँ भी नेवाःतय्सं थुइकेमाः, वाःचायेकेमाः ।

छखे, नेवाःतय् वास्तविक म्हसीकाया मू आधार नेवाः भाय् खः धकाः इतिहासं भीत छगू यथार्थ खँ कनाच्चंगु दुसा मेखे नेवाः ख्याःनं नेवाःया मौलिक स्वरूप भाषागत लिधंसायात त्वःता वनाच्चंगु ग्यानापुगु गुगु सत्य दु थुज्वःगु इलय् नेवाःया परिचय बिइगु कुतलय् धायेफु " A Newar is someone who has Newari as his or her mother tounge or who is descended from (or is belived to be decended from) those who had Newari as a mother tounge in the past" --David N. Gellner – Language, Caste, Religion and Territory : Newar Identity – Ancient and Modern – European Journal of Sociology , Vol-28 year 1987) अले थ्व छपु मध्यस्थताया लँपु जुइफु ।

छगू भाषिक समुदाय जुयाच्चंगु भी नेवाःतय् म्हसीकाया मू लिधंसा भीगु मांभाय् नेपालभाषा हे खः, धैगु गुकथं निर्विवाद खः उकथं नेवाः दुने तःता कारणं ब्वलनाच्चंगु भाषा विचलनया दथुइ नं नेवाःया म्हसीका मेता छु छु जुइफु धकाः दुवालेगु थौया छगू हाथ्या खः । ई पुलावलिसे नेवाः समाजयादुने ब्वलनावःगु थौया गुगु स्वत्तुमत्तु स्वःगु संरचना दु, उकिया दथुइ नेवाःया म्हसीका/ दापू मालेगु आवश्यकता खः ।

नेवाः भाषिक समुदाय खः धैगु ऐतिहासिक तथ्य व वर्तमान भाषा विचलनया यथार्थया छपु दथु लँपु डा. डेभिड एन. गेलनरया बिचाः जुइफु । वास्तवय् थ्व Cultural Motherhood समाजशास्त्रीय सिद्धान्त कथं मनूया म्हसीका क्वःछिगु दापू खः । छम्ह मनुखं न्त्यागुहे कारणं थःगु मांभाय्यात त्वःफिका च्वनेमाःगु विवशताया स्थिति दुसां नं उम्ह मनू वा वया पूर्खा अले व मनूया समाजया साँस्कृतिक पूर्वाधार छु खः, उकिया लिधंसाय् व मनूया म्हसीका क्वःछिगु मेगु लँपु खः । छाया धाःसा छम्ह मनू दुनेया जातियत्व [Ethnicity] या अभिव्यक्ति वया ख्वाःया उन, बान्कि वा भासं जक मखसें व मनूया नसा त्वंसा, पुसां , तिसा अले जीवन व जगत सम्वन्धी दृष्टिकोणयापाखें बियाच्चंगु दइ । अले मचानिसें वयादुने हाकया

वयाच्चंगु संस्कारगत/साँस्कृतिक प्रवृत्ति खः (Instinct) थुकिं न वयात म्हसीकेगु लिधंसा बियाच्चंगु दइ । छम्ह मनूया म्हसीका मालेबले थुकथं चकंनाः व तब्याः जुया बिचाःयायेगु ब्यवहारिक आवश्यकता खः ।

" The race of Niwars is a mixed race , derived from Indian or Tibetan stocks, and their religion naturally presents a corresponding mixture of the India and Tibetan creeds. (H.A. Oldfield - Sketches from Nepal -Vol -II, pp -73) खः । नेवाः धइपिं धार्मिक रूप इतिहासया थीथी चरणय् थी थी कथं व थी थी थासं नेपाः गालय् वयाः छद्दी छप्पं व ल्वाकःबुकः जुयाच्चंगु (Heterogeneous) पुच : खः । थ्वहे ल्याखं नेवाः दुने धार्मिक, साँस्कृतिक रुपया समिश्रण व समन्वय (Synthesis) या थःगु विस्कं पः दु । थ्व खँ भीसँ थूगु यथार्थ खः ।

अथे धैगु, नशलगत ल्याखं सकल नेवाःत छगूहे मानवीय पुस्ताया मचाखाचात मखु । अमि म्हगः, ख्वाः स्वयेबले ज्वःलाःगु खने मदु । तर, छता खँ छु धाःसा तःखें दुतवःपिं, तःगु खलःया मनूत नेपालय् वःबले म्हाय्महिच्छं जक वःगु सखे मखु जुइ । उमिसं थःनापनापं बिस्कं बिस्कंगु जीवनशैली व संस्कारयात नं ज्वना वल । तर, गथे स्वनिगः दुनेवःपिं सकलें मनूत कालक्रमया भवलय् नेवाः जुयावन, अथेहे उपिनापनापं दुतवःगु तःताजिया संस्कार, संस्कृति, परम्परा व आस्था सकतां नेपाल मण्डलया मौलिक संस्कृतिनाप युगं युगतक बुलाववं ब्वलंगु गुगु बिस्कंगु साँस्कृतिक संयोजन व विकसित स्वरूप खः थुकियाहे लिपा वनाः नेवाःतय् छगू मंकाः संस्कृति कथं थातंच्वन । उकिं, काचाक्क स्वयेबले नेवाः संस्कृतिइ बौद्ध वा हिन्दू परम्पराया गाक्कं प्रभाव लानाच्चंगु दु थें खने दुसां दुग्यंक दुवालेबले छता छता पक्षय् भीसँ नेपाल मण्डलया स्थानीय विशिष्टता व मौलिकताया नस्वाः खंकेफु । छता, छताय् नेवाः तय्गुहे आस्था व विश्वास अले दार्शनिक पक्षया किचःत सुलाच्चंगु लुइकेफु । गथे, छम्ह नेवाःयात म्हसीकेगु छगू क्वातूगु लिधंसा उमिसं ल्हानावयाच्चंगु मांभाय् नेपालभाषा खः, अथेहे उमित म्हसीकेगु मेगु छगू धिसिलाःगु दापू धैगु उमिसं नालावयाच्चंगु थ्वहे मौलिक नेवाः संस्कृति जुयाच्चंगु

दु । नेवाःतय्दुने न्ह्यानावयाच्वंगु थुकथंया साँस्कृतिक विशिष्टतापाखें
नेवाःत मेपिसिवें छु ल्याखं वा गुकथं भिन्न धकाः त्याजिक व्यनाच्वंगु
दु । उकिंहे संसारया आपालं विद्वान समाजशास्त्रीपिन्सं नेवाः
म्हसीकायात Cultural Nationalism या ल्याखं नालावयाच्वंगु खः ।

खः, नेवाःतय्दुने दयाच्वंगु गुगु सामाजिक विविधता खःउकिया
लिच्वः कथं साँस्कृतिक पक्षय् नं उकथंहे विविधता मदुगु मखु, दु ।
थीथी धर्म, सम्प्रदाय हनीपिं मनूत नेवाः समाजदुने दुगु ल्याखंनं
सामाजिक विधि,व्यवहार, संस्कार, रितिथिति व परम्पराय् नेवाः-
नेवाःया दथुइ आपालं पानाच्वंगु नं दु । नेवाः समाजय् ल्यानाच्वंगु गुगु
जात प्रथा दु, उकिं नं नेवाः नेवाःदुने संस्कारगत विभेद ब्वलंकाच्वंगु
दु । अभला छगूहे धर्म, सम्प्रदाय व छगूहे कवःया नेवाः, नेवाःया दथुइ
नं थाय्वाय् कथंया रितिथिति व साँस्कृतिक विधिव्यवहारय् ज्वःमलागु
आपालं दसि मदुगु मखु, दु । तर, थ्व नेवाः संस्कृतियात नेवाःतय् दुनेया
कोणं दुवालेबले खनेदैगु विविधता जक खः । उकिसनं थुज्वःगु
विविधता साँस्कृतिक सार रुपय् मखसैं छ्यलाबुलाया प्रकृयागत कथं
जक खंकेफु । उकिं , गुब्ले नेवाः समाजपाखें बिस्कं च्वनाः नेवाःतय्सं
परम्परानिसैं हनावयाच्वंगु छता, छता रितिथिति, संस्कार, परम्परा
अले, जीवन शैलीयात समग्र रुपय् दुवाले उब्ले, साँस्कृतिक ल्याखं थुगु
पक्षया मौलिक म्हसीका यच्चुक खनेदयाच्वनि । अथे मखुसा थौं
सकसिनं छप्वाः म्हुतुं धैथें नेवाः संस्कृतिया नां न्ह्यथनाः थुकिया बय्बय्
याना मजुइ खइ ।

वास्तवय् छम्ह गैरनेवाः व नेवाःयात मौलिक कथंहे भिन्न खः
धकाः ब्वयेगु गुगु साँस्कृतिक लिधंसा खः वहे भी सकल नेवाःया मंकाः
संस्कृति खः, नेवाःया साँस्कृतिक म्हसीका Cultural Identity खः ।
अले थुकथं नेवाःतय्गु बिस्कंगु Cultural Identity या हे लिधंसाय् भी
नेवाःया Cultural Nationalism ब्वलनाच्वंगु खः, न्ह्यानाच्वंगु खः ।
थौं वयाः नेवाःयात म्हसीकेगु भवलय् वा नेवाःया म्हसीका मालेगु
कुतलय् भाषागत लिधंसाया लिपा मेगु क्वातुगु लिधंसा भीगु
साँस्कृतिक म्हसीका खः धकाः त्याजिक धायेफु । उकिं सुं छम्ह मनू

नेवा: ख: वा मखु धका: उम्ह मनुखं जीवनय् नालावयाच्वंगु संस्कार व संस्कृतिपापाखें यच्चुक लिस: वियाच्वनि ।

गुब्ले भीसँ नेवा:तय् साँस्कृतिक म्हसीकाया खँल्हाये उब्ले, उमिसं हनावयाच्वंगु नख: चख:, रितिथिति वा विधि व्यवहार व संस्कारया जक मखु उमिगु जीवन शैलीइ नं उकिया किच: ध्वदुया च्वनि । सामुदायीकताहे सामाजिक मूल्य व मान्यता जुयाच्वंगु ल्याखं नेवा:तय् जीवनया हरेक पक्षय् थुकिया लिच्व: छगू संस्कृति व संस्कार कथं ब्वलनाच्वंगु भीसँ खंके ।

त:धंगु शहर वा वस्ति जुइमा वा च्याखा भिखा जक छँ दुगु गां जक जुइमा छगू नगरीय सभ्यताया ल्याखं थितुं थीक अले छथासं छँ दना: चुक, लाछि ननि, बहा:, बहि दयेकाच्वनेगु जीवनशैली नेवा:तय् दुने म्वानाच्वंगु सामुदायीकताया सामाजिक मूल्य मान्यताया लिच्व: ख: । थ: च्वनेगु छँ जक मखु देग:, सत:, फलेचातक्कं तिकभ्या:, सँभ्या:, कुंभ्यालं छायापिया: अले छेरि,मातं,च्वतं व बजिग:दुगु छँय् च्वनेगु नेवा: स्थापत्यकलाया चिं ख: ।

गणेद्य:, भिनंद्य: थापना याना: , लाखेप्याखं , द्य:प्याखं पिकया: अनहे जात्रा न्यायेका: न्त्याइपुक्क च्वनेमा:पिं मनूतय् म्हसीका ख: - नेवा: । सकलें मुना: च्वनेगु सामुदायीक भावना घाना: म्वानाच्वपिं मनूतय् समाज गन गुथि थुज्व:गु साँस्कृतिक संगठनयादुने च्वना: ज्यायायेगु छगू सामुहिक प्रवृत्ति दु थ्वहे ख: - नेवा: सामाजिक प्रवृत्तिया म्हसीका । थुमिगु समाजया विशेषता धैगुहे थवंथवय् जाना:पाना: मंका: कथं ज्यायायेगु, मा:पिन्त, मा:बले, मा:कथं ग्वहालियायेगु संस्कार ख: ।

छम्ह मनुखं म्वानाज:छि नालावयाच्वंगु मचाजंक्व:निसें बुराजंक्व तक्कया गुगु कर्मकाण्ड ख: उपिं नेवा: जूगुया म्हसीका ख: । गुम्ह मनूया इहि, बाहा, बुसँखा, कय्तपूजा, बरेछुइगु ज्या मजूतले कर्म खनीमखु, न्हयन्हुमा,न्यान्हुमाजा तया: , पाखाजा खाना:, नौनिनं लुसि मथीकं शुद्ध जुइमखु धैगु संस्कार हनाच्वपि ख: , उपिं नेवा: जूगुया चिं खत ।

धाः, धिमे, बय् , क्वँचाखिं, खिं, नाय्खिं, दमोखिं, क्वताः, म्वाय्लि, प्वंगा आदि बाज्या तालय् संगीतबद्ध जुयाः चचा हालेमाःपि, दाफा हालेमाःपि , भजन हालेमाःपिं मनूत नेवाः जूगुया चिं खः ।

पञ्चमकारया तान्त्रिक पद्धति कथं क्वाः, नसा घासायात अर्थपूर्ण कथं छायापियाः तःखाः, न्याखुना, दायेकाला, व्छयेला, छ्यालाः, पाउँक्वाः, वाउँचा, फसिक्वाः चय्प्यता घासा नयेसःपिं अले सीकाभू यानाःतिनि मूभ्वय् क्वचाइगु संस्कृति नालावयाच्चपिं मनूतय् म्हसीका नेवाः खः । यःमरि, चतांमरि व समयबजि थुज्वःगु बिस्कंगु पुजाज्वलनं नेवाः जूगुया चिं ब्वयाबी । तःजिगु नखःचखःबले, पूजाबले मोहनि फयाः, ह्याउसिन्हः तिनाः , ह्याउ क्वखां क्वखायेमाःपिं गनेद्यः, भिनद्यः, आजुद्यः, अजिमाद्यः, लुकुमाःद्यः, आगंद्यः, दिगुद्यः पूजायानावयाच्चपिं नेवाः जूगुया चिं खत ।

नेवाःदुनेया जातिगत व स्थानगत साँस्कृतिक विभेदत आपालं दुसां दँय्दसं कछलाथ्वः पारु कुन्हु न्हूदँ नेपाल संवत्थात थःगु नखः कथं हनाः अले म्हपूजाया मन्दलय् च्वनाः थम्हं थःत पूजायानाः “जि नेवाः” धैगु मंकाः भावना कःघानावयाच्चपिं सकलया म्हसीका नेवाः खः ।

नेवाःया बिस्कंगु म्हसीकायात ल्यंकातयेगु लँपुलीगु थौया आवश्यकता खः । उकिं भीगु मांभाय् नेपालभाषा नेवाः समुदायया आत्मा खःसा भीसँ नालावयाच्चनागु संस्कृति व संस्कार थ्वैत तःजिक म्हसिकेबीगु तिसा खः ।

नेवाः जीवन दर्शन

छपु बौद्धिक लँपु खः दर्शन, जीव व जगतयात दुवालेगु ।
मनुखं थःगु चेतनाया स्तरयात गुकथं थन्त्याकावं यंकल उकथं
ब्रम्हाण्डया श्रष्टा व सृष्टियात कयाः दुवालेगु व थःथः कथं थुइकेगु
कुतः खः थ्व ! जीव व जगत सार रुपय् वहे खः-सां उकियात खकिगु
व थुइकेगु मिखा मनूपतिकं, अले मनूतय् समाजपतिकं पानाबीवं
स्वभाविक रुपं दार्शनिक अवधारणा व उकिया ब्याख्या, विश्लेषणय्
पाःगु खनेदइगु खः । थौं वयाः मानव समाजय् तःताजिया जीवन दर्शन
न्त्यःने खनेदयाच्चंगु नं उकिं खः । थःथःगु आस्था कथं मनूत बिस्कं
बिस्कं दार्शनिक पक्षया लिधँसाय् धस्वानाच्चंगु दु । अले, आस्थाया
लिधँसाय् सु, गुम्हेसिया जीवन दर्शन दुग्यं वा तःजि धकाः
धेँधेँबल्लायानाः समाजय् ल्वापुया पुसापीगु प्रवृत्ति नं मदुगु मखु ।

तर, सुसंस्कृत व समुन्नत न्त्यागु नं समाजयात धाःसा थुकथं
निश्चित गुगुं छगू जीवन दर्शनपाखें उमित न्त्यब्बाकेगुलि हःपा
बियाच्चंगु दइ । अले, समाजशास्त्री वा इतिहासकारपिन्सं सम्बन्धित
समुदायदुने जीवन्त जुयाच्चंगु थुज्वःगुहे दार्शनिक पक्षयात दुवालाः उगु
समुदायया सभ्यता व संस्कृतियात ध्वाथुइकेगु कुतः यानाच्चनि । पाःगु

थुलिहे जक खः, गुलिखे समाजय् थःगु जीवन दर्शनया पक्षयात लिपिबद्ध यानाः ताई तक्कं ल्यंका वयाच्वंगु दुसा अले गुलिखे समाजय् धाःसा दर्शन सम्बन्धय् लिखत ज्वलंया पलेसा न्हियान्हिथंया व्यवहारय् उकियात नालाः जीवन्त अवस्थाय् ल्यंकेगु प्रवृत्ति खनेदु । धाथे धायेमाल धाःसा दार्शनिक पक्ष न्ह्याक्वहे तःजिगु जूसां वा उकियात बांलाक लिपिबद्ध यानाः ल्यंका तःसां उकि व्यवहारिक पक्ष मदयाः मनुखं जीवनय् गुगुनं कथं छ्यलावयाच्वंगु मदुसा उज्वःगु जीवन दर्शनया महत्व निरर्थक खत । थौं मानव समाजय् केवल बौद्धिक कसरत कथंया थुकथंया सारहीन जीवन दर्शनया अभिलेख भीसँ संग्राहलयया धुकुति आपालं खंकेफु । म्वानाच्वंपि व म्वायेमानिपिं मनुतय् निंतिं थुकथंया जीवन दर्शनया छुं मू मदु । मेखे लिखत वा श्रुति परम्परा कथं छुं ल्यनाच्वंगु मदुसां तर मनुखं थःगु व्यवहारिक जीवनय् छ्यलाः उकियात म्वाकातःगु दु धाःसा उज्वःगु जीवन दर्शनया तच्चःगु मू दु , उज्वःगु दर्शनयात कुतुकुलेगु आवश्यक जू ।

नेवाःतय् जीवन दर्शन नं थुकथं छगू अलिखित तर, सामाजिक जीवनय् न्हिथं नालावयाच्वंगु छगू जीवन्त पक्ष खः । नेवाः जीवन दर्शनयात कयाः खँल्हायेबले दक्कले न्हापां थ्व यथार्थयात थुकथं थुइकिगु कुतः जुइमाः । नेवाः जीवन दर्शनया प्रमाण प्रमेय धैगुहे द्रलद्रः दं न्ह्यवीनसँ नेवाःतयस् थःगु जीवनय् नालावयाच्वंगु व्यवहार व उकिया दुने सुलाच्वंगु दार्शनिक रहस्य खः । उमिगु संस्कार व संस्कृतिइ कःघानावयाच्वंगु जीवन उपयोगी व मानवीय भावनाया किचःत खः । उकिं नेवाःत हिन्दू वा बौद्ध ? थुमिगु जीवन दर्शन गुगु धर्मपाखें प्रभावित धकाः न्ह्यसः छुइगु पलेसा थ्व समुदायया जीवन दर्शनया मौलिकता छु धकाः थुइकिगु मूखँ खः ।

खः, अवश्य खः, सलंसः दंया नापंच्वनाः नापं बुलाया लिच्वः कथं नेवाः समाजय् नेपाःगालंपिने दुहावःपिं हिन्दु वा गैरहिन्दुतय् प्रभाव आपालं लायेधुकल । भीगु रितिथिति, संस्कृति व विधि व्यवहारय् उकथंया आपालं दसि भीसँ खनाच्वना । काचाक्क स्वयेबले नेवाःतय् जीवन दर्शन हिन्दु वा बौद्ध दर्शनसिबें छतिं मपाःथें च्वने धुकल । अले, आपालं विद्वानपिन्सं नेवाःतय् पुचलय् ल्यहेंबुयाच्वंगु हिन्दु

वा बौद्ध दर्शनया प्रभावय् न्त्यानाच्चंगु थौकन्हय्या आपालं विधि व्यवहार व संस्कारयात स्वयाः अःपुकहे नेवाःतय् जीवन दर्शनयात थःत छिछिं कथं हिन्दु वा बौद्धया ल्याखं परिभाषितयायेगु यानावयाच्चंगु दु । तर, गुब्ले गुब्ले नेवाःतय् जीवन शैलीयात दुग्यंक थुइकाः उमिसं थौतक नालावयाच्चंगु पद्धतियात कयाः बिचाःयाये, उब्ले उब्ले हिन्दु वा बौद्ध गुगु नं जीवन दर्शनया प्रभावपिनेया छगू बिस्कं पहः खने थ्व समुदायया दुने । थःत हिन्दु वा बौद्ध धाइपिं नेपाः दुने वा पिनेया मेमेगु समुदायलय् भ्याः भचाहे खने मदुगु आस्थागत व्यवहार गुब्ले खने-उब्ले भीत च्वनि नेवाःतय् दुने छगू मौलिकता दु - सांस्कृतिक रुपय्, जीवन शैलीया पक्षय् अले थ्व जीव व जगतयात थुइकेगु दार्शनिक अवधारणाय् नं । थुज्वःगुहे बिस्कं पहःया संस्कार, संस्कृति , विधि व्यवहार व परम्परा अभ् भीदुने द्वलंद्रः दँ न्त्यवनिसें हाकयाः म्वानाच्चंगु, ल्यनाच्चंगु दनि, थुपिं न त मुक्कं हिन्दुतय् नाप ज्वःलाः न त बौद्धतय् नाप ।

ऐतिहासिक तथ्यया लिधँसाय् खँ न्त्यथनेबले नं बुद्ध धर्म धैगु नीन्यासः दँ न्त्यवयागु जक खत । अथेहे थौकन्हय् गुगु हिन्दु धर्म धइच्वन, पुराणया लिधँसाय् ब्वलंगु गुगु धर्म सम्प्रदाय खः, थ्व ला भारतया गुप्तकाल लिपा तिनिया जक विकास खः, भिंस्वसः भिंप्सः दँ न्त्यव जक । तर, मेखे नेवाःत स्वनिगःया आदिवासीपिं बुद्धया ई स्वया द्वलंद्रःदँ न्त्यवहे सभ्यताया विकास जुइ धुंकूगु नेपाःगाःया वासिन्दात खः, छु उमिगु समाजदुनेया सभ्यता वा जीवन दर्शनया अवधारणा बुद्धकाल वा गुप्तकालसिवें न्त्यव छुं मदुगुइहे खइला ? स्वनिगलय् आः तक ल्यनाच्चंगु पुरातात्विक स्मारकत व प्राचिन सभ्यताया अवशेषयात दुवालेबले थनयापिं मनूत उगु ई सिवें यक्वहे न्त्यव सभ्य व सुसंस्कृत जुइ धुंकल धैगु खँ दावी यानाः धायेफु । स्वनिगःया टोखा, फुटुङ्ग, फुसिंख्यः, पुलांगुह्येश्वरी, भुइजःसि, बलम्बु, सतुंगः, थक्वाः आदि लागाय् यक्व न्त्यवहे जुइ धुंकूगु सभ्यताया विकासया ऐतिहासिक तथ्यतसें थुकिया पुष्टि यानाच्चंगु दु । प्राग ऐतिहासिक कालनिसें विकसित जुयावयाच्चपिं स्वनिगःया भूमिपुत्र नेवाःत, यदि उब्लेनिसें थुपिं स्वनिगलय् सुसंस्कृत अवस्थाय् जीवन

हनावयाच्चंपिं खःसा अवश्य नं उब्बे उमिगु थःगु दर्शन दु जुइ , थःगु संस्कृति व परम्परा दु जुइ । अले बुद्ध धर्म वा हिन्दु धर्म तायात्तिति यायेन्त्यवनिसं न्ह्यानावयाच्चंगु भीगुहे बिस्कं पहःयात हानं हिन्दु वा बौद्ध धकाः नां बीगु गुलित पाय्छि जुइ ?

भीसँ स्यू, अलौकिक शक्तिया अराधना हिन्दू दर्शनया मू आधार खः - थुकियात द्वैत वा अद्वैतवादया न्ह्यागु मिखांस्व । हिन्दु दर्शनं मनू व द्यःया दथुइ लौकिकपक्ष व अलौकिक स्वरुपया छगू ध्वः सालाः मनू सिबें द्यःत च्वय्या तँय् तयाः ध्वाथुइकेगु यानावयाच्चंगु दु । थ्वहे यथार्थया नित्यताय् जीवन दर्शनया घःचा हीकेगु कुतः जुयाच्चंगु खः । हिन्दु दर्शन मेपिन्त द्यः भापियाः भक्तियोगय् लीन जुइगुलि अभिप्रेरित खः।

अले संसारया अनित्य स्वरुपया स्विकृति बौद्ध दर्शनया मू पक्ष खत । बौद्धतय्सं दुःख, अनित्य , अनात्माया खँल्हानाः मूलतः शून्य सारया परिकल्पना यानावयाच्चंगु दु । बौद्ध दर्शन मूलत अनिश्वरवादी व कर्मकाण्ड पूजा पाठया आलोचक खः, नापं सामाजिक परिबन्ध्य अनुरागी मजुइत ध्वात्तुध्वाइगु छगू मार्ग खः ।

तर, नेवाःतय् जीवन शैली दुने न त हिन्दुतय् आस्था कथं अलौकिक शक्ति पक्षया प्रवलता दु, न त बौद्ध दर्शनया अनित्यता वा पूजापाठ विरोधी धारणाया प्रभाव दु । वास्तवय् थ्व निगुलि दर्शनपाखें बिस्कं ब्वलनाच्चंगु नेवाःतय्गु गुगु जीवन पद्धति खः उकिया दुने अभिव्यक्त जुयाच्चंगु दु - नेवाः जीवन दर्शन !

खतुं नेवाः दर्शनया ब्याख्या व विश्लेषणया गुगुं सफू वा ग्रन्थ भी पूर्वजपिन्सं त्वःता वंगु मदु । उकिं थ्व इलय् थुगु ग्रन्थया, थुगु परिच्छेदया, थुगु भवलय् थथे धयातःगु दु धकाः उद्धरणयानाः क्यनेगु अवसर भीके मदु । तर, सुं ग्रन्थकारपिनि विद्वत् ब्याख्यासिवें जीवन्त ल्याखं नेवाःतय्सं थौं तक नं थःथःगु जीवन हनेगु भवलय् नालावयाच्चंगु आस्थागत व ब्यवहारिक पक्षयात गुब्बे कुतूकुलाः वा दुवालाः स्वयेगुयाये उब्बे भीसँ नेवाः जीवन दर्शनया मौलिक पक्षयात यच्चुक खंके ।

खः, नेवाःत नास्तिक मखु । नेवाःतय् जीवन पद्धतिदुने पूजापठया आपालं थाय् दु । आदिम सभ्यताय् थःगु जीवन दर्शनयात व्यवहारय् हीलेत वा पितब्वयेत मनूतयसं सयेकाःगु छगू पद्धति खः- पूजा । उकिं गुगु समाजया, गुम्ह मनुखं छुकियात गुकथं पूजायानाः हनाच्चंगु दइ उगु समाज वा ब्यक्तिया जीवन दर्शनया सार संक्षेपया किचः नं यच्चुक खने दयाच्चनि । थ्वहे भवलय् गुब्ले भीसँ नेवाःतय् जीवन दर्शनया किचः ध्वदुइकेगु कुतलय् उमिगु मौलिक व परम्परागत पूजापाठया पद्धतियात दुवालेगु कुतःयाये, उब्ले खनि उमिगु पूजापाठया आजु हिन्दु धर्मय् थें भक्तिइ दुनाः गुगुं अलौकिक शक्तिया न्त्यःने थःत समर्पितयायेगु वा थः उज्वःगु शक्तिनाप आशक्त जुयाः उकियापाखें गुगुं अप्रत्याशित वरदानया नितिं आसाकुति जुइगु पहः उमिके मदु । दुग्यंक स्वयेबले नेवाःतय्सं यानावयाच्चंगु गुलिनं थःगुहे पहःया पूजा विधि वा संस्कार दु उकिया आजु गुब्लेनं गुगुं अलौकिक शक्तिया साधना कथं मजू । उकिं उमि नितिं पूजनीय पक्ष मेगु लोकं कहाँवःपिं, स्वर्गया द्यःपिं मखु, परि वा अप्सरात नं मखु । अथेला थौं वयाः नेवाःतयसं पूजायाइपिं द्यःधाःपिनि भवलय् ग्वाःग्वाः ल्हाःदुपिं, छर्चौदुपिं हिन्दु पुराण दुनेया वा बौद्ध जातक बाखं वा महायानी सूत्रतय् परिकल्पनाया आपालं आपालं ख्वाःपाःत भवछुवये धुंकल । स्वीस्वंगूकोटी द्यःपिनि अस्तित्व नं संभवत् थुकथं यक्वः लिपा वयाः खनेदयेकः वःगु खत ।

दर्शनया ल्याखं धायेगु खःसा ब्रम्हाण्डया सृष्टि व श्रष्टाया परिकल्पनाया श्रोत स्वयं मानवीय न्त्यपु त्वःता मेगु मखु । मनूयाहे कल्पनां द्यः धाःपिनि न्हाय् , म्हुतु , ख्वाः, ल्हाः, छर्चौ आदिया स्वरुप लुइकूगु खत । थ्व ल्याखं धायेगु खत धाःसा थ्व समाजय् द्यःया श्रष्टा मनूहे खः । मनुखहे द्यःया अस्तित्वयात धस्वाके हःगु खः । मनूहे मदुगु खःसा वा मनुखं थःगु न्त्यपु चुलाः कल्पना मयाःगु खःसा द्यः धैपिनि रुपहे मलुइगु जुइ । अले मनुखहे द्यः धैपिनि अनेक कथंया न्त्याइपु बाखं कनाः थीथी धर्म व दर्शनया ब्याख्या विश्लेषण मयाःगु खःसा द्यःतय् मू छतिं मदैगु जुइ । धाथें धायेबले मनूतय् नुगलय् दुगु श्रद्धा भाव थुज्वःगु छगू करुणाया पक्षं यानाः भी दथुइ द्यः धयापिं त्यनाच्चपिं

खः, म्वानाच्चपिं खः । कन्हय् गुब्ले मनुखं थःगु नुगलय् उगु श्रद्धाया लुखा तिनावी, उब्ले द्यः धाःपिं मनूया समाजं छुं छां म्वायेक दुसुना, तुसुना वनी, गनं गन जुइक । थ्व ल्याखं धायेगु खःसा जीवनया महत्वपूर्ण पक्ष मनू स्वयं, थः खः । मनूया अस्तित्वहे दक्कले सार्थक पक्ष खः । मनूहे निर्णायक तत्व खः । थुगु दार्शनिक पक्षयात नेवाःतय्सं वांलाक थू अले नेवाःतय् थौं तकया आस्थापाखें नं थ्वहे खँ धयावयाच्चंगु दु । वास्तवय् नेवाःतय् जीवन दर्शनया मू तत्वहे थन थाय् लाक्क सुलाच्चंगु दु । थुकिया दुनेहे नेवाः दर्शनया मूति दुसुनाच्चंगु दु ।

थःथःगु दार्शनिक आस्था कथं जीवनहनेगु वा जीवनय् आस्तिक वा नास्तिक जुयाः म्वायेगु आपालं समुदायदुने जुयाच्चंगु दु । अले, श्रद्धा भाव तयाः अराधनायायेगया नामं सुं मेम्हेसित वा गुगुं अलौकिक ब्यक्ति वा शक्तियात अराध्य श्रोतदयेकेगु सामान्य प्रवृत्ति खः । तर, नेवाःत गुम्हेसिया जीवन दर्शनय् सुं मेम्ह अराध्यदेवप्रतिसिबें मनूप्रति अगाध श्रद्धा व आस्था दु, अले उमिसं थ्वयात संस्कृतिया रुपय् द्वलंद्वः दँ न्ह्यवनिसें पूजनीय शक्ति वा ब्यक्ति कथं स्वयं मनूयात थनेगु यानावल । उकिं नेवाःतय्सं छँजःया प्रत्येक मनूया बुन्हिया कथं जुइमा वा मचा व बुराबुरि जँक्वया लसताय् जुइमा मनूयातहे पूजायायेगु ययेकल । मनूया दुनेहे देवत्व सुलाच्चंगु दु, छगू अवस्थाय् मनू थःहे द्यःया थाय्कायेत सफल जुइफु धैगु आस्थां नेवाःतय्सं मनूतय्त खतय् तयाः सालाः ज्याथः जँक्व यानावयाच्चन । स्वनिगःया अराध्य देवीया ल्याखं थःहे म्ह्यायमचायात देवारोहण याकाः कुमारीया नामं मनूयात पूजायायेगुलि नेवाःतय्सं गर्वतायेका वयाच्चंगु नं उकिहे जुइ । अले भिनिदँय् छक्वः शक्ति साधनाया अर्थय् खड्गसिद्धियायेगुया नामय् मनूयातहे द्यः दयेकाः वया ल्हाःतं स्वयं देनायः लायकुलिं पिहांवयाः खड्ग लःल्हानाःकायेगु परम्परा स्वनावन ।

मनूया अस्तित्वयात प्रधान्यता बियावयाच्चंगु नेवाःतय् जीवन दर्शन-उकिं उमिसं मौलिक कथं हनावयाच्चंगु जात्रापात्रा व नखःचखःया द्यःत धैपिनं मेपिं मखु थःहे तःकेहें, छँजः वा समाजय् गुगुं इलय् म्वानावपिं तर, भिं ज्यायानावपिं नेवाः म्ह्याय्मस्त न्यत अजिमा, कंग

अजिमा, लुँति अजिमा जुयावन । अले, भीहे पुर्खापिन्त वंघः आजु, पचलि आजु धकाः श्रद्धां हनाच्चना । उकिं भी नेवाःतय् मू द्यः धैपिं आजु जुयाबिल , अजिमा जुयाबिल । उकिं, नेवाः जीवनय् चिचाधंगु छुं जुल धाःसां ब्रम्हा, बिष्णु, महेश्वर वा भगवान बुद्धयात लुमंके न्ह्यव अजिमायात कलः छायेगु वा कीसलि फ्यायेगु यानाच्चना । मनू बूसां, सीसां व्हास अजिमायात निं दक्कले न्हापां लुमंकाच्चना । वास्तवय् थ्व सकतां नेवाःतय्सं म्वानाच्चपिं व म्वानावने धुंकूपिं मनूतय् महत्तायात थुइकाः न्ह्याकावयाच्चंगु संस्कृतिया दसित खः । मनू केवल मनूया अस्तित्वयात सर्वाधिक महत्व बियावयाच्चंगु जीवन दर्शनया ब्यवहारिक पक्ष खः ।

दँय् दसं स्वन्तिया भवलय् न्हूदँ पारु कुन्हु थःपाखें थः निर्लिप्त जुयाः थःत दुवालेगु निंतिं थम्ह थःत पूजायायेगु नेवाःतय् म्हपुजाया गुगु संस्कृति खः वास्तवय् नेवाः जीवन दर्शनयाहे छगू विशिष्ट न्ह्यब्वसा जुयाच्चंगु दु । उकिं नेवाःत आस्तिक जुयाः पूजा ला यायेगु याः तर, अन गुम्ह अलौकिक वा दैविक ब्यक्तित्व थनेहयाच्चंगु मदु , अन सुं दुसा केवल मनू दु, स्वयं थः दु ।

नेवाःतय् जीवन दर्शनया मेगु पक्षया ल्याखं अभ थ्व सिबें नं तब्याक बिचाः यानास्वयेबले जीवनया निंतिं भिज्यायानावपिं वा भिज्यायाइपिं मनूत जक मखु पशुपक्षितय्त नं श्रद्धापूर्वक हनेगु वा पूजायायेगु थुमिगु दर्शनया निर्दिष्ट पक्ष कथं खने दु । बुज्याया लिधँसाय् म्वायेमाःपिं नेवाःतय् निंतिं थ्व धरतीया अतिकं मू दु, उकिं दँय् दसँ उमिसं सिथि नखःबले धरतीयात मां कथं पूजा यानावयाच्चंगुला दहे दु , यःमरिपुन्हिबले न्हूवा दुकाया कूपुजायाइगु नं थःगु थासय् दु । थ्वसिबें न्ह्यथने बहःगु खँ खः छु धाःसा बुज्यायायेया निंतिं चायात व्हासुका बीपिं, वा बालि स्यंकाबीपिं कीचात नयाः वातावरणीय सन्तुलन हयाबीपिं ब्याँचा लगायत मेमेपिं ज्ञात, अज्ञात कीटपतङ्गया गुणयात तकं लुमंकाः उमिगु हनाबनाय् सिनाज्या क्वचायेवं गुलां थुमिगु लुमन्तिइ ब्याँजानकेगु नामं श्राद्धयायेगु थुज्वःगु उदात्तचित्त स्वभावयात नेवाःतय्सं संस्कृतिया कथं नालावयाच्चंगु दु । स्वन्तिबलेला क्वः, खिचा, साचा पूजायानाः उमिगुपाखे भीगु जीवनय्

मदिक दयाच्चंगु गुगु सेवा खः उकियात हनेगु नेवाःतय् गुणग्राही स्वभाव खः । उकिं केशचन्द्रयात तःमि यानाब्युपिं बखुंतय् लुमन्तिइ आःनं इतुंबहालय् न्हिन्हिं वा ह्वलावयाच्चन । अले, भिंज्यायाइपिं खत धाःसा नरभक्षीहे जुसां गुरुंमापा जुइमा वा मजिपाः लाखे, भीसँ द्यः भापियाः पूजा याना । लाखे लसिं धकाः उमित क्वथुनेगु वा पनपक्षे याये भीसँ मसः । अले थन नं नेवाःतय् पूजापाठयादुने स्वर्ग कुहावःपिं वा मानवीय लोकपिनेया शक्तिया अस्तित्व मखना ।

गुणयुक्त वा जीवन उपयोगी जुल धाःसा मेटाला छु छँया पिखालखुनिसँ लुखाखरु, मूलुखा, अले मिच्याकेगु भुतूप्वाः जक मखु कःसिइ क्वहायेकातःगु ध्वंप्वाः, हिति, तूं व कलःगाः, व्छास व कय्तायात तकं पूजायाना वयाच्चपिं नेवाःत । नेवाःतय्सं पूजायाइगु ज्वलं हासा, तुफि, सिफं, ताःचा, लःथलः निसँ कू, क्वकिचा, ईचा, मुगः, कःति, हँ,रण्डा, चुपि, त्वाकः, ढाल, तरवार थःगु जीवनयात भियाइगु सकतां ज्वलं । तर, नेवाःतय्सं थथे थीथी ज्वलंयात पूजा यानावयाच्चंगु अर्थ न त थुकिदुने देवत्व दु धकाः खः, न त थ्व गुगुं अलौकिक शक्तिया श्रोत धकाः हे खः । मेमेगु धार्मिक आस्था कथं छुं बस्तुयादुने देवत्व खनाः पूजायाये धुंकल धाःसा उकियात हानं लाःलाःथें यायेमत्यः, याइनं मखु । छुं छुं मखुगु चागःचित नं द्यः धकाः स्वांसिन्हः छानाः पूजायाये धुन धायेवं उकियात हाजां तकं गाये मज्यू । थुकथंहे देवत्वया अंश खंकाः थीथी बस्तुयात पूजायानावयाच्चनागु जूसा सखे पिखालखुयात न्हिथं हाजां गायाः नेवाःत मजुइगु जुइ । थःपिन्सं न्हिथं पूजायानावयाच्चनागु लुखाखरुइ तुतिं पलाः तयाः मजुइगु जुइ । अले ध्वंप्वालय् दक्कले मध्ये ज्याख्यले मदुगु बस्तुत च्वयेकाव्छयेगु ज्या मयाइगु जुइ । यथार्थय् धायेमाल धाःसा नेवाःतय्सं दलंदः दँ न्ह्यवनिसँ थःगु सामाजिक व्यवहारय् नालावयाच्चंगु थ्व बिस्कं पहःया जीवन दर्शनया मेगु पक्ष खः - उपयोगतावादी, वस्तुवादी व व्यवहारवादी पहः । गुगु भीगुहे थःगु बिस्कं पहः खः ।

अले, समुदायया दुने पुचः मुनाः ज्यायायेगु, छुं जुल धाःसा सकलें जायेगु वा पायेगु छगू मंकाः भाव खः गुकिया अभिव्यक्ति गुथियापाखें आः तक भी समाजय् जुयाच्चंगु दनि थ्व वास्तवय् नेवाः

जीवन दर्शनं कःघाना वयाच्चंगु समताभावया ब्यवहारिक पक्ष खः ।
 अले न्त्यागुनं लसताया इलय् त्वाःछिं , जःखः धौबजिनिसैं समयबजि,
 यःमरि, छुस्यामुस्या इनानयेगु भीगु संस्कृतिदुने सुलाच्चंगु जीवन दर्शन
 नं थ्वहे समताभावया लिच्चः खः । मनू जुइमा, जीव जन्तु जुइमा वा
 गुंगु हलंज्वलं छायांमजुइमा थःथःगु थासय् सकसियां उतिकं मू दु,
 सकतां उतिकं पूजनीय खः धकाः हनेगु नेवाः दर्शनया सार खः । 'खुसि
 छीवं तुतां लोमं' मधासैं प्रत्येकया गुण प्रति कृतज्ञ जुइगुहे भीगु जीवन
 दर्शनं खः अले थ्वहे भीदुने छगू संस्कार कथं ब्वलंकावयाच्चनागु पहः
 खः । गुगु पहः नेवाः समाजया बिस्कंगु पहः खः , भीगु थःगुहे पहः
 खः । थःगु जीवनयात न्त्याकेगु व जीवनयात थुइकेगु पद्धति खः ।

नेवाःदुने लोक कल्याणया भावना

सामाजिक समिश्रण व साँस्कृतिक समन्वय स्वनिगःया नेवाःतय् छगू बिस्कंगु म्हसीका खः । पूर्व ऐतिहासिक कालया भूमीपुत्रपिं म्येपु, सापु, आभीरतय् आदिभूमि थ्व स्वनिगः दुने थीथी इलय् दक्षिणपाखें दुहाँवःपिं शाक्य, लिच्छिवी, कोलीय, मल्ल, थकू, कर्नाट वंशीय नायरत व मिथिला प्रदेशया तिहुतत अले, उत्तरपाखें थ्यंकःवःपिं मंगोल कवःया तःगु पुचःया मनूत छथासं म्वानावयाच्चंगुया छगू मंकाः सामाजिक स्वरूप थौंया नेवाः समुदाय खः ।

उकिं नेवाःया दुने अनेकता दु, अले थ्वहे अनेकताया छगू मंकाः स्वरूप खः नेवाः समुदाय-थ्वहे ल्याखं नेवाःतय् साँस्कृतिक पक्षयुनं शैव, शाक्त, वैष्णव अले बौद्ध परम्परा व आस्थाया छगू समन्वयात्मक जीवन शैली कथं ब्वलनावयाच्चंगु खत । सखे, नेवाःतय् सामाजिक विकासक्रमहे थुकथं समिश्रण, समन्वय व सह-अस्तित्वया लिधंसाय् न्ह्यानावयाच्चंगुलिं यांनाः नेवाःयादुने सामुदायिक सहयोग, सद्भाव व समन्वयया भावना छगू कथं संस्कारया ल्याखं हाकयावयाच्चंगु जुइ । नेवाः समाजया साँस्कृतिक व विधि विधानया ज्याभवलय् दुग्यनाच्चंगु सामाजिक हितया भावनायात हःपाः

बियावयाच्चंगु पक्षत नं थुपिहे जुइमाः धकाः अःपुक अनुमानयायेफु ।
 द्वलंदःदं न्त्यवनिसें छचलाबुलाय् वयाच्चंगु भीगु आपालं साँस्कृतिक
 परम्परादुने नालावयाच्चंगु लोककल्याणकारी ज्याखँय् दुथ्याकातःगु
 निर्दिष्ट समाजसेवा लिपालिपा जुयावलिसे नेवाः समाजया छगू
 सामाजिक मान्यता कथं थातं च्वंवंगु खः ।

आधुनिक राज्यसत्ताया संरचनाया सम्बन्धय् गुगुं परिकल्पना
 तकं मज्जनिगु प्राचीन इलय् सत्तानिसें जनतातकया निति निर्देशक तत्व
 धैगु धर्महे खः । सामाजिक संहिता नं धर्मया लिधंसाय् दयेकीगु खः ।
 अथेहे समाजय् जुइगु सकतां ज्याखँया पंगः वा हःपाः धार्मिक विधि
 विधानहे खः । स्वनिगःया आदिवासी नेवाःतय् सामाजिक व साँस्कृतिक
 विकासया सकतां खँया हःपाः धर्महे खः । उकिसनं पूर्व लिच्छवी कालय्
 स्वनिगःदुने न्त्यज्याःगु महायानी बौद्ध धर्मया प्रचार-प्रसार व थुकिं
 समाजय् लाकूगु लिच्चः नेवाः समाजय् लिपा वनाः छगू सामाजिक
 प्रवृत्ति कथं न्त्यज्यात । बौद्ध आस्था कथं त्रियोदशभुवनया दक्कले
 च्वय्या सुखावतिभुवनया पद प्राप्तिना नितिं दशपारमिता पूर्वकेमाः ।
 अले थुगु दशपारमिताया गुगु शिलाचार पक्ष दु उकि दानपारमिताया
 गाथा अत्यन्त च्वन्त्याः । लुमंकेबहःगु खँ छु धाःसा थ्वहे
 दानपारमिताया महत्ता थुइके कथं स्वनिगःया थःगु बिस्कंगु
 “महासत्त्वपाख्यान जातक” बाखंया मूबाखंम्वः जुजु महासत्त्वपाखें
 थःगुहे म्हया लाकुचा धेना नकाः पित्याःपिं धुँ व धुँया मस्तय् उद्धार
 याःगु दानशिलताया छगू ज्वःमदुगु दसि नेवाः समाजय् प्राचीन इलनिसें
 तच्चकं हःपाः बीगु प्रसंग जुयावयाच्चंगु दु ।

मनूत स्वभावहे सुख ध्वदुइकेत प्याःचाःपिं खः, उकिं उमिसं
 गुलिनं कुतः याना जुइ केवल सुख चूलाकेया नितिं जुइ । गथे मनूत
 थःगु सुख ध्वदुइकेत आयबु, अथेहे थःथेहे मेपिन्संनं सुखया नितिं
 मनंतुना च्वनिगु खँयात वाःचायेकाः मेपिनिगु नुगलय् आत्मपरावर्तन
 यानाः बोधिचित्तोत्पादया कुतः यायेमाः, उकिं जक मुक्तिया लँपु चूलाइ ।
 बोधिचित्त सम्बन्धि थ्वहे आस्थां यानाः मनूतय्दुने करुणा, मैत्री,
 परोपकारया भावना ब्वलनेवं दानशिलतापाखे न्त्यचिलिगु खँ
 महायानी बौद्ध दर्शनया मूभावना खः ।

नेवाःतय् संरचनाय् दुगु गुगु छगू समन्वयात्मक तत्व खः थुकिं ब्वलंकातःगु सामुदायीकताया भावना अले थ्व भवलय् आध्यात्मिक खोजया कुतः कथं खनेदइगु दानशिलताया आदर्श यानाः नेवाः समाजदुने थौतकनं भीसँ लोक कल्याणकारी पक्ष गाक्कं ध्वदुइकेफु । उकिसनं थुकथंया मानवीय स्वभावया अतिकं भिंगु पक्ष छम्ह मनूया याकः नुगलय् जक लिक्नुनाः उकिया लिच्चः छभाःया दुने फासांफुसुं मजुइमा, थुज्वःगु गुणग्राही ज्याखँ छगू भिंगु परम्परा व मान्यताजुयाः समाजय् थातं च्वनेफयेमा धैगु मनंतुसँ भी आजुपिन्सं थुज्वःगु ज्याय् छगू संस्थागत स्वरूप बीत तच्चकं बुद्धिमत्तापूर्वक गुथित स्वना थकल । गुगु परम्परा नेवाः समाजय् थौं तक न्ह्यानावच्वंगु दनि ।

नेवाःतय्दुने छगू सामाजिक मान्यताया कथं म्वानाच्वंगु लोक कल्याणकारी व सामुदायीक सहयोगया गुगु भावना खः उकियात सामूहिकीकरणयासँ संस्थागत रूप बीगु कुतः जूगु इतिहासयात मालेबले धाःसा शिवदेव+अंशुवर्माया शक संवत् ५२६ या लेलेया अभिलेखयात न्ह्यथनेफु । थ्यंमथ्यं भिंस्वसः / भिंप्यसः दँ न्ह्यवहे भीगु समाजय् गुथिया माध्यमं लोक कल्याणकारी पलाः न्ह्यज्याये धुकूगु खँ थुगु अभिलेखयापाखें क्यनाच्वंगु दु । लँजुवाःतय् नितिं त्वनेगु लःया बन्दोवस्तयायेत “प्रणाली गौष्टि”, ल्वगीतय् वासःयायेया नितिं “आरोग्यशाला गौष्टि”, सरसामान ल्ह्ययेया नितिं “प्रवहन गौष्टि”, बासंच्वनिपिं पाहाँपिनि नितिं सतःया व्यवस्था स्वयेत “पत्तिकया गौष्टि”, लँपुइ बँपुइत “मार्गोन्मार्जन गौष्टि” आदि गुथित स्वनाः लोक कल्याणकारी ज्यायात संस्थागत याना थकूगु खनेदु ।

मनूतय्गु धार्मिक आस्थायापाखें मालिगु दिपु धैगु मुक्ति वा मोक्ष खयेफु, थुपिं थःथःगु थासय् दु तर, थुज्वःगु अलौकिक लँपुइ पलाः च्वयेकु च्वयेकुं थुकिया दथुं लौकिक जीवनया भिं जुइगु आपालं ज्यायायेत त्वःताः चूलाकूगु दु । नेवाः समाजय् गुथिया लागा वा आजु तप्यंक वा ब्यक्वयेक धार्मिक श्रद्धाय् तक्पनाच्वंगु दुसां थुकिया ब्यवहारिक छचलाबुला धाःसा तप्यंकहे लोक कल्याणया ज्याया नितिं

जुयावयाच्चंगु दु । अले सामुदायीक हितया ज्याय् गुथित न्त्यचिला वयाच्चंगु ध्वदुइ ।

दिगुपुजा गुथि, सीगुथि/सना:गुथि थुज्व:गु छगू निगू गुथि मुक्कं थ:थ:गु कव: वा छँज:या सामाजिक कर्मकाण्ड व रीति/रिवाजयात मदिक न्त्याकेगुलि तक्यनाच्चंगु खनेदु । मेगु ल्यं दुगु आपालं गुथिपाखें थ:गु लागायात समष्टिगत हितयायेगु ज्यायात भाला कथं नालावयाच्चंगु दु । नेवा: समाजय् नं खासयाना: ज्यापुतय् दुनेया मंका: खलकं बुँज्याय् मंका: ग्वहालि चूलाकेगुलि जक मू भूमिका म्हिताच्चंगु मखसैं थ:गु खल: दुनेया ज:पिन्त मा:बले छँ दनेत, ल:या ध: म्हुइत, बुँइ ल:बीत व मालिबले मेमेगु ज्या खँय् तिब: बीगु ज्या या: ।

अथेला मल्लकालया लिपालिपागु इलय्या सामाजिक अवस्थायात दुवालेगु ख:सा उल्लेया स्वनिग:या छगू निगू गुथिया ज्याया लागा मुक्कं सामाजिक सेवा जुयाच्चंगु खनेदु । चाबहि व क्वा:बहा:या ल्वहँपतिइ न्त्यथनात:गु “सेवा: खल:” या अस्तित्व समाजय् मतिइमखनाथें वइगु आपतविपतय् मनूतय्त मा:गु सेवा बीत ख: । खतुं थुज्व:गु सेवा खल:त स्वनेगु ज्या न्हापां न्हापां ला धार्मिक ज्याखँया तातुना:हे स्वंगु जुइफु । तर, लिपा लिपा वना: इलय्ब्यलय् जुइगु त:ल्वय्, प्राकृतिक प्रकोप, मिंनइगु थुज्व:गु विपतय् मनूतय्त ग्वहालियायेगु खल:या भाला जूवन । थुज्व:गु सेवा: खल:तय्पाखे या:गु ग्वहालि व सेवा राणाकाल व उकिया लिपा थीथी त:ल्वय्या इलय्, '९० सालया त:भुखाय् ब्वबले स्वनिग:या मनूतय्सं अनुभव या:गु ख: ।

प्राचिन इलनिसें थौतकनं स्वनिग:दुने न्त्यानावयाच्चंगु गुलिनं जात्रा, नख: चख:या पूजा, साँस्कृतिक ज्याभव:त दु उकिया मू दुग:क्वँय् धैगु गुथिया रूपय् धस्वानाच्चंगु सामाजिक संस्थात ख: । लोक कल्याण व सेवा परोधर्म धैगु मू आदर्श ज्वना: थुकथंया गुथित स्वनात:गु जूगुलिं गुथिया गुथियारपिं गुब्ले खुसिचाय् तांस्वायेगु ज्यायाना: थ:गु गुथिया भाला पूवकिसा, गुब्ले जात्रा वा मेलाय् तातापाक्कं धर्मकर्म या:व:पिं मनूतय् त्यान्हु व प्या:चा: लंकेत गुँच्वय्, गामय् थ्यंक ल: क्वबिया: सेवा या: जुइ । मठ , देग: , चीभा:, सत: ,

फलेचा थुज्वःगु साँस्कृतिक स्मारकया संरक्षणया निंतिं इलय्ब्यलय्
 स्यंगु ल्हवनेगु, भिंकेगु वा उकिया जःखः घाँयम्बः, कंभाः बुयावःसा
 लिनाः सुचुकुचुयायेगु तकं गुथिया भाला दुनेया ज्या खः । थ्वया
 नापनापं मठ, देगः, चीभाः व गुम्वाय् च्वनीपि व अनाथपिनि निंतिं
 न्हिथंया नसात्वंसा चूलाकाबीगु ज्या ला छगू कथं आपालं गुथियापाखें
 यानावयाच्चंगु ज्या जुल ।

लोक कल्याण वा समाजिक सेवाया निंतिं पाश्चात्य ख्यलं
 संगठित जुयाः ज्यायाये सयेकूगु अथेहे निसःदँहे मदुनि । रेडक्रश
 सोसाइटीया परिकल्पनानं नकतिनि अथे धैगु १३५ दँ न्ह्यव जक जुगु
 खत । रोटरी, जेसिज, लायन्स क्लब थुज्वःगुया इतिहास अभं नःलि
 तिनि । युरोपय् शुरू जूगु औद्योगिक क्रान्तिया नापनापं थुकथंया
 संगठित सामाजिक सेवाया परम्परा ब्वलंगु खः । मेखे, नेवाः समाजय्
 जीवन्त कथं न्ह्यानावयाच्चंगु गुथिया परम्परा व थुकिं
 कय्च्यानावयाच्चंगु सामुदायीकता व समाज सेवाया भावना छगू
 संस्कारया ल्याखं द्रुःछिदँ सिबें पुलां धैगु खँ ऐतिहासिक दसिपाखें
 क्यनाच्चंगु दु ।

मध्यकालय् बिकास जूगु सँदेनापया बनेज्याय् दुध्याःपिं
 स्वनिगःया नेवाःतय्त आर्थिक आर्जनयायेत तःजिगु लँपु चूलात ।
 सँदेनापया बनेज्यां दां कमेयाःपिन्त उगु इलय् “ल्हासा साहु” धकाः
 धायेगु चलनहे खः । तर, उप्बलं उप्बः उज्वःपिं ल्हासा साहुतय्के
 पुर्खानिसें हाकयाच्चंगु बौद्ध साँस्कृतिक व संस्कारगत आस्थाया कारणं
 यानाः थःपिन्सं मुंकागु तःजिगु सम्पत्ति पंजरां, नरां, व सम्यक न्यायेकिगु
 थुज्वःगु अतिकं थाकूगु ग्वसाः ग्वयाः लोक उपकारया ज्याय् न्ह्यचिलेगु
 प्रचलन दु । येंय् लगं बहाःया दयामुनि शाक्य नांया छम्ह ल्हासा
 साहुपाखेला थथेहे बनेज्यापाखें मुंवःगु थःगु सम्पत्ति क्वकयाः स्वक्वः
 स्वक्वः तक पंजराया ग्वसाः ग्वसैं थःगु दानपारमिताया छगू ज्वःमदुगु
 दसि ब्वयादीगु खः ।

माःबले छम्हेस्यां मेम्हेसित ग्वहालियायेगु जक मखु थःके दुगु
 इनाःनयेगु सामाजिक सदभाव व स्नेहपूर्ण व्यवहारयात संस्कृतिया छगू
 रुप कथं नेवाः समाजय् न्ह्यानावयाच्चंगु खँ यंघापुन्हिबले समयबजि,

सकिमिलापुन्हिबले हलिमलि,यःमरिपुन्हिबले यःमरि जःलाखःला व
पासापिन्त इनाः नयावयाच्वंगुलिं यच्चुक क्यं थुज्वःगुहे दानशिलताया
संस्कारगत प्रवृत्तिं यानाः गुलिखे नेवाःतय्सं जाति भव्य , देय् भव्यया
ग्वसाः ग्वयाः थःगुपाखें मेमेपिंनं सुखि जुइमा,तृप्ति जुइमा धैगु बोधिचित्त
प्रवृत्तिया संस्कारयात व्यवहारय् छचलाः वयाच्वंगु खः ।

नकतिनिहे सरकारं राष्ट्रिय विभूती कथं घोषित नेपाल
संवत्था प्रणेता शंखधर साख्वाःया कृति व महिमाया प्रसङ्गनं भीगु
समाजय् प्राचीन इलनिसें न्ह्यानाच्वंगु दानशिलताया मान्यता व
लोक कल्याणकारी भावनाया छगू ज्वःमदुगु दसू खत । थःगु सम्पत्तिया
छचलाबुला समाजया हितया निंतिं जुइमाः धैगु सामाजिक
मान्यतायापाखें हःपाःकासें उगु इलय् शंखधरजुं नेपाःमिया
ऋणमोचनयायेत थःगु धुकू चायेकेगु ज्या याःगु खः । साख्वाल अथे धैगु
साख+वाल (**Money Lender**) खः, शंखधरजु । सखे,
बनेज्यायापाखें तःमिजूम्ह खः, शंखधर । अथे खःसां शंखधरजुं थःगु
सम्पत्ति थः याकःचिया निंतिं मखसें सकसियां निंतिं छचलेमाःगु
आवश्यक तायेकाः उगु ईया सकल ऋणी नेपाःमिया त्यासा पुलाः
उमित विमोचनयायेगु ज्या यानाबिल । यथार्थय् मेपिनिगु सुखहे थःगु
सुख धैगु बोधिचित्तपोदया सिद्धान्तयात वयकलं व्यवहारय् छचला
क्यन । स्वनिगःया शंखधरजुं थें उब्जेया ल्हासा साहु सार्थवाह
केशचन्द्रजुनं थुकथं सामाजिक कल्याणया निंतिं थःगु सम्पत्तियात
छचलेगु परम्परायात न्ह्याकेगु भवलय् आपालं सामाजिक हितया किर्ति
स्वनाःवन । वयकलं थःगुहे श्रीसम्पत्तियापाखें दयेका थकूगु केशचन्द्र
पारावर्त विहार (इतुंबहाः) दुने आः नं आपालं लोक कल्याणकारी ज्या
परम्पराकथं न्ह्यानाच्वंगु दनि । थ्वहे भवलय् सँदेया मेम्ह तःमिम्ह
बंजा थंबहिया सिंहसार्थबाहयात नं थुकथं लुमंके बहः । थःगु धुकू
क्वकयाः दयेकूगु थंबहिया विक्रमशिल महाविहार व अन दुने
न्ह्याकावयाच्वंगु सामाजिक उपकारया ज्या खँ थौतक म्वानाच्वंगु दु ।
स्वनिगःदुने दुगु आपालं साँस्कृतिक स्मारक व सम्पदा
धस्वाकावीपनिबारे मालास्वयेबले भीसँ थुकथंया दानशिल भावनादुपिं
आपालं मनूतय् कीर्तिया ध्वाँय व्वयाच्वंगु खंकेफु ।

जनस्तरयापाखें क्यनावयाच्वंगु थुज्वःगु लोकहितकारी ज्या व दानशिलताया प्राचीनतम दसि ऐतिहासिक ल्याखं बृषदेवया शासनकालय् दयेकातःगु चाःबहिया धंद्रो चीभाःया न्ह्यःने पश्चिमपाखे मतच्याकेगु लौहथामय् कियातःगु अभिलेखयात दसि कथं कायेफु । उगु इलय् सुं छम्ह मिसां बौद्ध संघयात भोजनयाकेया नितिं दानयानातःगु बुंया विवरण थुकी कियातःगु दु । जुजु बृषदेवया राज्यकाल अथे धैगु थ्यंमथ्यं थौसिवें भिन्ह्यसः दँ न्ह्यव जूगु थुगु दानशिलता व लोकहितकारी ज्याया विवरण खः । धाथें धायेमाल धाःसा थ्वला छगू तथ्यया लिधंसाय् दयाच्वंगु ऐतिहासिक दसि जक खत , थनया समाजय् थुकथंया लोक कल्याणकारी सेवाय् थःत व थःगु श्रीसम्पत्ति प्यायेगु आदर्श थ्व सिबेंन गुलिखे न्ह्यव परम्परा कथं न्ह्यानावये धुंकुगु जुइमाः । “यावज्जीवेत् सुखं जीवेत्, ऋणं कृत्वा घृतं पिबेत् । भस्मीभूतस्य देहस्य पुनरागमनं कुतः ॥” धाःथें चार्वाकीय अतिभौतिकवादी बिचालय् सिबें कीर्ति स्वनाथकेत थःगु श्रोत व साधनयात पाय्छि जुइक छचलेमाः धैगु सामाजिक मान्यतां यानाः जुजु महाराजपिन्सं जक मखु सर्वसाधारण न्ह्याम्ह नागरिकयापाखेंनं सामाजिक हित, लोक कल्याण, लोक उपकारया कीर्ति तयाः उकियात थातंच्वंक न्ह्याकेया नितिं गुथि थुज्वःगु संघटन स्वनेगु यानावन । थ्वहे भवलय् स्वनिगःदुने “अक्षयनीवी धर्म”अथे धैगु लोक कल्याणया तातुनाः अक्षय धुकूया व्यवस्थायायेगु छगू सामाजिक प्रचलन लिच्छिवी कालया न्हापारिखेहे खनेदये धुंकल । थुकिं यानाः सामाजिक हित व लोक कल्याणया ज्या थातं च्वनिगु छगू लिधंसा चूलात, लिपा लिपा जुइवं ला थ्व छगू सामाजिक संस्कार व प्रवृत्ति कथं ब्वलन ।

वैदिक व सनातनपन्थीतय् पुचलय् “सेवा परमोधर्म” या भावनां ग्वाकाः साधु, सन्त व ब्रम्हुतय् नितिं जक मखु समाजया दीन-हिन व चीमिपिं, मदुपिं व त्वगिपिं मनूतय् नितिं “सदावर्त”या व्यवस्थायासैं न्हिथंया नयेत्वने चूलाकेगु परम्परा लिच्छिवी जुजु नरेन्द्रदेवया शासनकालपाखे क्वातुसेच्वने धुंकुगु खँ ग्वलया शिलालेख धयाच्वंगु दु । अथेहे जिष्णुगुप्तया नरःया सत्यनारायण देगलय्च्वंगु मेगु अभिलेखयनं उगु इलय् थुज्वःगुहे “सदावर्त” या व्यवस्था जुइ धुंकुगु खँ ध्वदुइकेफु ।

देसय् शासन सत्ताया स्वरूप इलय् ब्यलय् थलाःक्वलाः जुइगु याःसां भीगु समाजय् द्वलंद्रः दं न्त्यवनिसें प्रचलनय् दुगु थ्व “सदावर्त”या ब्यवस्था शाह कालय् नं उकथंहे न्त्यानावयाच्चंगु भीसं खंकेफु । सखे, कर्पिनि आत्मतृप्ति व सुआशिषयापाखें थःगु कल्याण जुइ धैगु आध्यात्मिक आस्थां यानाः थुज्वःगु लोक कल्याणयकारी गुथित न्त्यानाच्चंगु जुइ, स्वनिगदुनेया थुज्वःगु गुथिया नां धलः ताहाकः तयार जुइ कथं भीसं च्वयेफु ।

वास्तवय् श्रीकृष्णं भगवद्गीताय् अर्जुनया धयादी कथं संसारय् सुनं मनू कर्म मयासें म्वायेहे फइमखु अले मनुखं याइगु कर्मयात क) *आध्यात्मिक* - ज्ञान चूलाकेत यायेगु बौद्धिक ज्या, ख) *आधिदैविक* - द्यःया भक्तियानाः फल प्राप्तयायेगु अले ग) *आधिभौतिक* - दान दातब्य बीगु व लोक कल्याणया ज्यायायेगु धकाः ब्वथला दीगु खः । थ्वहे स्वंगूगु आधिभौतिक कर्म , गुगु कर्म निष्काम भावना तयाः वा अनाशक्त जुयाः यात धाःसा मानवीय जीवन पुनरावृत जुइ मखु, अथे धैगु मुक्ति वा निर्वाण प्राप्त जुइ । थ्वया अःखः सकाम कर्म यात धाःसा थुज्वःगु कर्म आशक्तिपूर्ण वा वासनायुक्त जुइगुलिं थुज्वःगु कर्म न्त्याक्व याःसां हानं हानं पुनर्जन्म जुयाः मुक्ति प्राप्तयायेमफइगु खँ श्रीकृष्णं धयादीगु दु । सखे, थ्वहे निष्काम कर्मया चेतनां मनूया दुने धर्मचित्त ब्वलनिगु खः । अले थ्व छगू मनूतय् स्वभावनं खः कि गुलि गुलि मनूयाके जीवन व जगतया विषय बोध जुजुं वइ व मनू बुलुहुं स्वार्थया लागां पिहाँवयाः परमार्थपाखें न्त्यज्यायेत स्वइ । ब्यक्तिया केन्द्रयापाखें समष्टिपाखे पलाःच्चयेकी । मचाबलेया ब्यक्ति सुखया च्यूताः तःधि जुइवं परिवारया सुख अले समाज सुखपाखे उन्मुख जुयाः चकनेत स्वःथें । थ्व छगू न्त्याम्हनं सचेत व जिम्मेवार मनूया विशिष्ट स्वभाव खः । आध्यात्मिक आस्थाया मनूतय्सं धर्मया लँपु लिनाः समष्टिइ चकनेत स्वइसा मेखे भौतिकवादी वा नास्तिक मनूतय्सं मेगुहे लँपुपाखें थुज्वःगु कुतः यानाक्यनि । न्त्यागुसां मनूया आजु ब्यक्तियात समष्टिइतक चकंकेगु चाहना खः । उकिं मनूतय्सं ब्यक्ति स्वार्थया कर्मया लागायात हाजां गायाः समाज हित वा लोक कल्याणया दायीत्वय् थःत तक्यंकेत आय्बुइगु खः - शारिरिक कथं , मानसिक

कथं वा भौतिक कथं । ध्वहे भवल्य् सेवाया ध्व भावयात खासयानाः
वैष्णवीतय्सं निथी यानाः ब्वथला तःगु दु । वैष्णवी आस्था कथं धार्मिक
साधनाया दुनेच्चना सेवा क्रियात्मक व भावनात्मक कथं यायेफु ।
गुक्रियात तनुजा व वित्तजाया ल्याखं ब्वथलातःगु दु । भक्तयापाखें थःहे
जानाः थःगु शरिरयापाखे याइगु सेवायात तनुजा व थः मजासैं थःगु
श्रीसम्पत्ति व मेमेगु भौतिक ज्वलंयात छचलाः याइगु सेवायात वित्तजा
धकाः न्ह्यथनातःगु दु । सखे, स्वनिगःया उब्बेया नेवाः समाज्य
लानाच्चंगु थुकथंया वैष्णवी धर्मया लिच्चलं यानाः सामाजिक ख्यलय्
खास यानाः गृहस्थ मनुतय् पुचलय् थुगु वित्तजा सेवाया परम्परा
आपालं खनेदयाच्चंगु जुइ ।

भीगु समाज्य थुलि तहाकःगु इलनिसें न्ह्यानावयाच्चंगु गुथि
थुज्वःगु लोक कल्याणकारी सामाजिक संघटन व उक्रियापाखें
न्ह्याकातःगु परोपकारया थीथी ज्याखँ थौतक नं ल्यनाच्चंगु व
बालाक न्ह्यानाच्चंगु धैगुया मू कारण भीदुने म्वानाच्चंगु संस्कार व
मान्यताहे खः धकाः धायेफु । खयेफु, थुज्वःगु मान्यताया ल्यूने
दयाच्चंगु हःपाः बौद्ध आस्था कथंया दानपारमिताया भावना खः, थुगु
संस्कारया आदर्श वैदिक वा सनातन आस्था दुनेया निष्काम कर्म योग
वा वित्तजा दानशिलता खः वा भी नेवाः समाज्य हाकया च्वंगु
मानवीय सेवा भावया छगू व्यवहारिक लिच्चः खः । न्ह्यागुहे जूसां,
गुब्बे भीसँ भी पुर्खापिन्सं न्ह्याकावंगु थुज्वःगु भिलँपु खंके उब्बे गथे
ताइ धाःसा थुज्वःगु मान्यता व संस्कार भीदुनेया छगू साँस्कृतिक
प्रवृत्ति (Cultural Instinct) जुयाः ब्वलने धुंकल । खतुं ध्व प्रवृत्ति
नेवाःतय्के साँस्कृतिक प्रवृत्ति कथं ब्वलानाच्चंगु मखुसा भी आजुपिन्स
अलौकिक शक्तिपिं ध्वदुबले तक गुब्बं थःगु वैयक्तिक स्वार्थ व हितया
निर्तिं छुं मफ्वसैं लोक कल्याणया निर्तिं जक च्यूताः क्यना जुइगु मखइ
जुइ ।

मरु सतः दयेकूगु सम्बन्धय् अतिकं लोकंहवाःगु न्यकँबाखंया
मू बाखंम्वः यँया नादंमह तान्त्रिक विसेतजुं छन्हु, छगू जात्राय् मेगु लोकं
वयाः थनया जात्रा स्वयाच्चंमह अलौकिक पुरुष कल्पवृक्षयात खंकल ।
थःगु तान्त्रिक शक्तिं तारन तयाः कल्पवृक्षयात थःगु वशय् तल । थःत

त्वःताव्यू धासें “छुं फवन, जिं पूर्वकाबी , जितः त्वःति” धकाः कल्पवृक्षं
 अनुनय, विनय यायेवं तान्त्रिक विसेतजुं उलिज्वःम्ह अलौकिक शक्तिया
 न्त्यःने थःगु निजात्मक हितया नितिं छुं मफ्वंसे येंदेया जनताया
 कल्याण जुइ कथं छगू तःजिगु सतः दयेकेगु वरदान फवन । तान्त्रिक
 विसेतजुया मनंतुना कथं कल्पवृक्षं मायया छपु पुसा बियाः वन । धाइ
 वहे पुसा पिनाः बुयावःगु तःमागु सिमा क्वथला उकिया सिं छचलाः मरु
 सतः दयेकेगु ज्या जूगु खः ।

अथेहे यैंयाहे छम्ह ज्यापु दाजुं छन्हु जात्राय् यमराजयात
 खंकल । यमराजयात म्हसिकाः ज्वनाः मत्वःतू । यमराजं हेयेकल । तर,
 थःम्हं “छुं फवन ,वहे पूर्वका ब्यू अले जक त्वःते” धकाः ज्यापु दाजुं
 जिदि याःगुयातं । थःगु खँ यमराजया न्त्यःने तल । तर, उम्ह ज्यापु
 दाजुनं यमराज थुज्वःम्ह अलौकिक शक्ति ध्वदुबले नं थःगु गुगुं
 व्यक्तिगत इच्छा वा हितया खँ न्त्यमथं । छम्ह नेवाःया मचायाके
 दयाच्वंगु साँस्कृतिक प्रवृत्तियांनाः उम्ह ज्यापु दाजुनं लोकयाहे कल्याण
 जुइगु वरदान फवन । “ यैंया गुम्हं नं मनू आवंलिं सी धैगुहे म्वालेमा ” ।
 तर, वया खँ न्यनाः यमराज सात्तुवन । जुइहे मफैगु । सृष्टिया घःचाहे
 दिकेमालिगु । यमराज थुकथंया वरदान बीत असक्षम । अथेसां ज्यापु
 दाजुं थःम्हं फवनागु वरदान मदयेक छुं जूसांनं यमराजयात त्वःतेत
 तयार मजू । तहाकःगु कचवं लिपा अन्तिम निसाफया नितिं निम्हं
 जनबहाद्यःया न्त्यःने दँवन । लिपा छगू मध्यस्थता जुल । दँय्दसं
 जनबहाद्यःया खः सालाहइबले सुनांसुनां दर्शन याइ वया अकाल मृत्यु
 मजुइमा धकाः वरदान बिल । थ्व वरदानया लिपा जनबहाद्यःया
 खःयात तःजाःयासें देया गल्लि व कुंकुलामय् च्वंगु छेंसं च्वनाः
 दर्शनयाये दयेमा धैगु व्यवस्था यात ।

थुकथंया न्यंकं बाखंयादुने सत्यता ध्वदुइकेगु उलि अःपूमजू ,
 अथे खःसां समाजय् म्वानाच्वंगु थुज्वःगु हःपाः बीगु खँयापाखें धाःसा
 प्राचीन इलनिसें स्वनिगःया नेवाः समुदाययादुने लोक कल्याणकारी
 भावना गाक्कं दु धैगु खँ उलाः क्यं । नेवाः समाजय् सामाजिक हितया
 विचाः गुज्वःगु पृष्ठभूमि जुयाः ब्वलना वयाच्वंगु दु धैगु खँयात
 ध्वाथुइकाच्वंगु दु ।

सखे, थुज्वःगुहे सांस्कृतिक लिधँसां यानाः नेपाःया न्ह्यलुवाः समाजसेवीया भवलय् थ्वहे समुदायया दथुं हनेबःम्ह तुलसी मेहर श्रेष्ठ देसं ध्वदुकल । थ्वहे कारणं यानाः आधुनिक ल्याखं न्ह्याकेत्यंगु सामाजिक सेवाया ज्याखाँय् नं नेवाः समुदाय दुने न्ह्यानाच्चंगु परम्पराया लसांतये कथं “गान्धी चर्खा प्रचारक महागुथि” नांछुताः नेवाः समुदायया गुथिया प्राचीन भावनायात निरन्तरता बीगु कुतः वयकलं याना दीगु जुइ । अथेहे निरन्तरतया ल्याखं माधवराज जोशी थुज्वःम्ह महान समाज सुधारक व समाज सेवी व परोपकार थुज्वःगु संस्थाया संस्थापक दयावीरसिंह कसाः नं मेम्ह न्ह्यलुवा कथं थ्वहे नेवाः पुचलं पिदन ।

राष्ट्र निर्माण्य नेवाःया भूमिका

थनि निसः व स्वीस्वदं न्ह्यव पृथ्वीनारायण शाहया राजनीतिक महत्वाकांक्षा पूर्वकेगु भवलय् म्याक्सबेलियन शैलीइ जूगु गोरखा राज्यया विस्तारयात सत्तासिनतय्सं शुरुं निसेहे नेपाल अधिराज्यया एकिकरण धकाः बय्बय्यायेगु यानावयाच्चंगु दु । अले थःगु राज्य विस्तारया अभियानयात न्ह्याकूम्ह पात्रयात राष्ट्र निर्माता धकाः च्छायेगुनं जुयाच्चंगु दु । पृथ्वीनारायणया राष्ट्र निर्माणया भवलय् आत्म सुरक्षाया अभावय् थःगु कूलभूमि स्वनिगः त्वःताः देया कुंकुलामय् चिच्चादनेमापिं , अले राष्ट्र निर्माता धाःम्हेसिया फौजया पाश्वकतापूर्ण व्यवहारया कारणं थःगु न्हाय्, म्हुतु, सपः धेकेमाःपिं नेवाःतय्सं एकिकृत नेपाल राष्ट्रया दुने थौतकनं थःगु थाय् गन धकाः मालेमाःगु विडम्बना धासाः गथे खः अथेहे ल्यनाच्वनतिनि ।

सत्तायापाखें नेवाःतय्त अनेक पनपक्षयायेगु क्रम शाहकालया शुरुनिसें थौतकनं दिक्गु मदुनिसां नेवाःतय्सं धाःसा थःगु नुगलय् न त प्रतिशोधया भावना ब्वलंकल, न त असहयोगात्मक प्रवृतिहे क्यन । संभवत् नेवाःतय्के संस्कारगत रुपय् दयाच्चंगु विनम्रताया लिच्वः खः - थ्व ! बरु हिलावंगु राजनीतिक यथार्थयात थुइकाः नेपाल अधिराज्ययात

थौं थनतक थ्यंकेगु अभियानय् थःथःगु थासं यायेफुगु मूवंगु तिबः
 व्युव्युवल-नेवाःतय्सं ! राष्ट्रप्रति निष्ठावान जुयाः राष्ट्रयात थकायेगुलि,
 न्ह्यज्याकेगुलि अले थ्वया न्हाय् विश्वया न्ह्यःने धस्वाकेगुलि महत्वपूर्ण
 भूमिका म्हितेगुलि नेवाःत गुब्सं लिमचिल । खः, नेपाःयात आधुनिक
 युगय् धस्वाकेगुलि देया मेमेगु समुदाययानं थःगु कथंया योगदान व
 भूमिका दु, तर, नेवाःतय्गु गुगु भूमिका दु व निश्चित रुपय् गुब्सं म्हो
 मखु । वास्तवय् थ्व सकतां नेवाः समुदाययाके दयाच्वंगु थःगु
 मांदेप्रतिया आस्था, श्रद्धा व सेवाया च्वन्ह्याःगु भावनाया लिच्वः खः ।
 नेवाःतय्के दुगु राष्ट्रियताया भावनाया जांथीगु दसि खः- थ्व ! थःगु
 मांदे नेपाःयानितिं मालावंवन धाःसा थःगु थासं फुगु न्ह्यागुनयायेत
 नेवाःत तयार धैगुया छुमां खः - थ्व !

“देसं थःत छुयात धकाः मखु, थःपिन्सं देयात छुयाना ?” धकाः
 च्यूताःतयेगु छम्ह इमान्दार व प्रतिवद्ध नागरिकया विशेषता खः । थ्व
 विशेषता छम्ह नेवाः नागरिकयापाखें व्यवहारिक रुपय् सलंसः दँ
 न्ह्यवनिसें क्यनावयाच्वंगु दु । थ्व प्रत्येक नेवाःया नितिं आत्म
 सन्तुष्टिया खँ खः, आत्मगौरवया खँ खः । अले थःगु राष्ट्र निर्माणया
 नितिं थुकथंया योगदान बियांतुं च्वनेफयेमा धैगु मनंतुनानं खः । तर,
 नेवाःतय्सं नेपाल राष्ट्र निर्माणया नितिं ऐतिहासिक कालनिसें मदिकक
 बियावयाच्वंगु थुकथंया योगदानय् राज्ययापाखें आत्मगौरवया अनुभव
 यानाच्वंगु दु वा मदु ? नेवाःतय्गु थुकथंया भूमिकाय् सत्तायानितिं
 आत्म सन्तुष्टिया विषय जुयाच्वंगु दु वा मदु ? नेपाल एकीकरण जुल
 धाःगु निसः व चाचू दँ लिपा थौं वयाः हानं थ्व खँ सार्वजनिक च्यूताःया
 विषय जुयाव्यूगु दु ।

नेवाः जुयाः नेवाःतय्सं थ्व देयानितिं थुकथंया योगदान याःगु
 दु धकाः नायखिं च्वयेकः जुइगु छगू अर्थय् भ्वासि व जातिय
 अभिमानया ध्वाय् ब्वयेकेथें जुइफु । भी थ्व पक्षय् मदु । नापं म्हिगःया
 दास युगय्थें लखं लख मनुखं थःगु ज्यानपानाः क्वबियाहःगु त्वहँ
 द्यतनाः धस्वाकुगु पिरामिड निर्माणया श्रेयया पगरी सुम्कच्वनाच्वम्ह
 जुजु फराहया छचनय् पुइकाः “साःक्वब्यूम्ह बाउचिया लाय्कुया
 च्यूताः” धकाः याइगु मध्ययुगीन व्यवहारनं भीत स्वीकार्य मखु । थौया

नेपाः प्रजातान्त्रिक नेपाः । प्रजातन्त्र धैगुहे जनता व सत्ताया दथुइया सामाजिक अनुबन्धनया लिधँसाय् न्ह्यज्याइगु राजनीतिक व्यवस्थाया नां खः । केवल दायीत्वबोध जक मखु, अधिकार प्रत्याभूतया खँन नापनापं वनेमाः-थौया युगय् । प्रजातान्त्रिक आदर्श थ्वहे खः । थ्व निताजिइ छता जक न्ह्यानाः मेगु अथें जुल धायेवं उज्वःगु प्रजातन्त्र खुत्यांकाइ । तापाक न्ह्यज्याये फइमखु । थौया प्रजातान्त्रिक नेपालय् नेवाः समुदायया सन्दर्भय् थ्वहे दायीत्व व अधिकारया खँ राज्ययापाखें त्याजिमफुगु समस्या भीसँ खनाच्चना । छखे नेवाःतय्सं नेपाः जिगु मातृभूमी धकाः श्रद्धापूर्वक राष्ट्र निर्माणया भवलय् मदिक्क योगदान बियाः थःगु दायीत्व अतिकं इमान्दारपूर्वक निर्वाह यानावयाच्चंगु दुसा मेखे वहे नेवाःतय्गुनिर्ति न्यूनतम नागरिक अधिकार कथं संवैधानिक रुपय् समानताया अधिकार प्रत्याभूतयायेगुलि राज्यया भूमिका लिकुनाच्चंगु विडम्बनाया स्थिति दु । थुज्वःगु इलय् आः तक नेवाःतय्सं थ्व नेपाल अधिराज्यया निर्माणयानिर्ति गुकथं तिबः बियावयाच्चन धकाः कुलेगु राज्ययात सचेतयायेयानिर्तिन आवश्यक खत । अथेला छगू प्रजातान्त्रिक प्रणालीयादुने समताया मिखां स्वयेबले राज्यश्रोत वीगु अधिकारया प्रत्याभूत गुगुं गुण विशेषताया लिधँसाय् निश्चित वर्ग वा पुचःयात उज्वः वा कम जुइमाः धैगु अवधारणा गुगुं कथं पाय्छि मखु । थुज्वःगु एरोस्टोक्राटिक बिचाःयात थौया इलं समर्थनयायेफैगु गथे जुइ ? तर, अधिकारयाहे खँलायेबले आकांक्षाया जक प्रस्तुति मजुसँ उकथंया अधिकार प्राप्तिया निर्ति योग्य खः वा मखु धकाः योगदानया चर्चा जुइगु धाःसा अनावश्यक मखु । थ्वहे भवलय् राज्यसत्तायापाखें मदिक्क पनपक्षया शिकार जुयावयाच्चपिं नेवाःतय् थुगु पक्षयात कयाः मूल्याङ्कनयायेगु ईया माग खः धकाः भीसँ थुइकाच्चना ।

राजनीतिक योगदान

अधिकार प्रत्याभूतया श्रोत न्ह्याब्लें राज्यसत्ताहे खः । अले राज्यसत्ताया घःमा धैगु सम्बन्धित राजनीतिक व्यवस्था खः । इतिहास पुइका स्वल धाःसा भीसँ खंके राणाया निरंकुश शासनसत्ता विरुद्धया विद्रोह कालनिसें देया राजनीतिइ नेवाःतय्सं निर्णायक भूमिका

म्हितावःगु दु । राजनीतिया लँपु कीगुलि नेवाःतय्सं सक्रिय सहभागिता
 क्यनावयाच्चंगु खः । राणा शासन क्वथलाः देसय् छगू प्रजातान्त्रिक
 व्यवस्था नीस्वनेगु तातुनाः न्ह्याकुगु क्रान्तिया मिंइ ह्वब्बानाः शुक्रराज
 जोशी, धर्मभक्त माथेमा, गंगालाल श्रेष्ठ, चिनियालाल सिंह, भोगेन्द्रमान
 मास्के, न्हुछेरत्न तुलाधार, चिनियाकाजी शाक्य थुज्वःपिं नेवाःया
 काय्मस्त शहादत प्राप्तिया भवलय् दनाः थ्व दसि ब्याच्चंगु दु ।

स्वीदँया निर्दलीय व्यवस्थायात न्हंकाः बहुदलीय व्यवस्था हानं
 नीस्वनेगु जन-आन्दोलनय् स्वनिगःया नेवाःतय्गु निर्णायक भूमिका
 जुयाबिल । बहनि बहनि ब्लायाक आउटयानाः आन्दोलनयात ग्वाकंगुलि
 जक मखु यलदेयात मुक्त क्षेत्रया रुपय् कब्जायायेत छँछाछँछा पतिकं
 नेवाः काय्मचा, न्ह्याय्मचा ल्हातय् कू, तःकू, न्वः, तरवार, भाला,
 खुकुरी ज्वनाः सतकय् कुहाँवयाः छगू निर्णायक थासय् थ्यंकाब्यूगु खः ।
 अथेहे ख्वप व किपूया नेवाः जनतां प्रहरी दमनया विरुद्ध छर्चौ धस्वाकाः
 याःगु संघर्ष इतिहासय् सदां लुँआखलं कियाच्चनि । स्वनिगःया जनता
 उगु इलय् शाहासपूर्वक नारायणहिटि लाय्कू न्ह्यःने दँमवंगु जूसा वा
 अन मग्यासैं थःगु छातिइ गोलि मफःगु जूसा शायद ०४६ सालया
 जन-आन्दोलनपाखें उलि याकनं निर्दलयात अन्त्य याकाः बहुदलीय
 व्यवस्थाया पुनर्स्थापना मजुइगु जुइ । थुगु जन-आन्दोलनय् नेवाःतय्
 सहभागिता गथे दु धैगु खँया यथार्थ ला थ्व भवलय् शहादतजूपिं अथेहे
 न्ययेम्ह मनूत मध्ये बच्चि सिबें उज्वः नेवाःतय् काय् न्ह्यायपिनि नां
 धलः खनेवं स्पष्ट जुइ ।

गणेशमान सिंह थुज्वःम्ह नेवाःया काय्मचा सर्वोच्च कमाण्डर
 जुयाः न्ह्याकूगु थुगु जन-आन्दोलनया मेगु शक्ति संयुक्त बाममोर्चाया
 नकिं जुयादीम्हनं आखिर नेवाःया न्ह्याय्मचा सहाना प्रधानहे खत ।
 ०९७ सालया राजनीतिक आन्दोलन जुइमा वा ०७ सालया जन-क्रान्ति
 अथेहे ०४६ सालया जन-आन्दोलनया इलय् नं नेवाःतय् सक्रिय व
 निर्णायक योगदान उतिकं दुगु खत ।

अथेहे नेपाःमिया नागरिक अधिकार प्राप्तिया सः थ्वयेकेगु निंतिं
 नेपाल नागरिक अधिकार समिति स्वनाः पलाः न्ह्याकेगु ज्याया नेतृत्वनं

शुक्रराज जोशी थुज्वःपिं नेवाःतय्सं इतिहासय् दक्कले न्हापां संगठित कुतः याःगु खँनं लोमंके मफैगु पक्ष खः ।

सामाजिक सेवा

नेवाः समाजय् छगू साँस्कृतिक परम्परा कथं गुथिया माध्यमं समाज सेवायायेगु प्रचलन अतिकं पुलांगु खँ खेत । अले त्वाः त्वालय् दयाच्चंगु सेवा खलः गुथियापाखें इलय् ब्यलय् तःत्वचं कइबले वा भ्वखाय् ब्वयाः, मिं नयाः, चलःवनाः धनमाल नोक्सान जुइबले ग्वहालियायेगु चलनहे खत । तर, न्हू परम्परा कथं गैरसरकारी सामाजिक संस्था स्वनाः संगठित रुपय् सामाजिक सेवाया ज्या न्ह्याकेगुलि दक्कले न्हापां लँपु क्यनेगु ज्या तुलसिमेहर श्रेष्ठ थुज्वःपिं नेवाः काय्मस्तयसं यानाःक्यंगु खः । गान्धी चर्खा प्रचारक गुथि स्वनाः समाजय् वायेत्यः फवायेत्यः जुयाच्चपिं मिसापिन्त म्वायेगु बांलागु लिधँसा चुलाकाब्यूगु खः - वयकलं । अले थ्वहे पलाखय् परोपकार थुज्वःगु मानव कल्याणकारी संस्थायात न्ह्याकीगु समाज सेवाया ज्याय् मेम्ह नेवाःया काय् मचा दयाबीरसिंह कंसाकार न्ह्यचिला दीगु जुल ।

शैक्षिक सेवा

सकसिनं स्यूगु खँ खः, शहीद चिनियालाल सिंहजुयात सर्वस्वहरण व आजन्म कारवाशया सजायँ जूगु कारण वयकःया शिक्षा प्रचारया कुतः खः । वयकलं थःगु छँया छेरिइ नेपाःया इतिहासय् दक्कले न्हापांगु जनस्तरया स्कूल महावीर इन्स्टिच्यूट चायेकाः मस्तय्त शिक्षाया जः बीगु कुतः यानादीगु खः । चिनियालाल सिंह छम्ह नेवाः-नेपाःया अग्रज शिक्षा प्रचारक !

थ्वहे भवलय् शहीद शुक्रराजया केहें चन्द्रकान्ता मल्ल गुम्हेसिनं नेपालय् नारी शिक्षाया अभियानया नेतृत्व यानादिल । अले नेपाःया दक्कले न्हापांगु मयजुपिनि स्कूल कन्या माध्यामिक विद्यालय चायेका दिल , वयकः नं आखिर छम्ह नेवाःया म्थ्यायमचा खत ।

शैक्षिक क्षेत्रया खँलायेबले देसय् सार्वजनिक पुस्तकालय स्थापना यानाः मनूतय् चेतना थनेगु कुतलय् दक्कले न्हापां प्रदीप्त

पुस्तकालय चायेकेगु भूमिका म्हितादीम्ह प्रेम्हबहादुर कसाःयातनं थ्वहे भवल्य् भीसँ लुमंकेफु ।

साहित्यिक सेवा

अथेला नेवाःतय् थःगुहे पुलां साहित्यिक परम्परा दु । तिथि मिति दसि दु कथं जक धायेगु खःसां न्यासः दसिवें न्त्यव महेन्द्र मल्ल थुज्वःम्ह कविया अस्तित्व थ्व भासाय् खनेदये धुंकल । अले थुकिया निरन्तरता कथं नेपालभाषाया माध्यमं साहित्य श्रृजनायाः देया इज्जत थकायेगुलि आपालं नेवाः साहित्यकारपिन्सं, स्रष्टापिन्सं थःगु कथं योगदान बियाच्चंगु दु । तर, खँय् भाय्या साहित्य श्रृजनायायेगु व थुकियात छगू दिशाबोध याकेगुलि नेवाःतय्गु भूमिका व योगदान तच्चकं महत्वपूर्ण जू । खँय् भाय्या साहित्यिक आन्दोलनय् नेवाः स्रष्टापिन्त छखेचीकल धाःसा सम्पूर्ण साहित्य विधाहे बांमलाक्क ह्याँकीवनाबी ।

आदि कविया थाय् बियातःम्ह भानुभक्त आचार्यसिवेंनं न्त्यव सुन्दरानन्द बाँडा थुज्वःपिं नेवाःतय्सं खँय् भाषाय् च्वसा न्त्याकाः साहित्य सृजना याः थःगु योगदान बी धुंकुगु खँ ऐतिहासिक दसिपाखें यच्चुक क्यनाच्चंगु दु । अले आधुनिक ईया खँल्हायेगु खःसा काब्य विधाय् रोमानीवादी शैलीया प्रस्तोता छम्ह नेवाः, कवि सिद्धिचरण श्रेष्ठयापाखें जूगु खत । प्रगतिवादी साहित्यया अग्रणी भूमिकाय् हृदयचन्द्रसिंह थुज्वःम्ह नेवाःया नां खँय् साहित्य फाँटय् मवसें मगाः । अले साहित्यया महारथीपिनि नां कायेबले न्त्यःने वडपिं सत्यमोहन जोशी गुम्हं ब्यक्तिं आःतक मदन पुरस्कार थुज्वःगु सम्मान स्वक्वः त्याकेफत, वयकः नं नेवाःया काय्मचा खत । अले ऋद्धिबहादुर मल्ल, खडगमान मल्ल, विजय मल्ल, गोविन्द 'गोठाले', रत्नध्वज जोशी, केदारमान 'ब्यथित', माधवलाल कर्माचार्य, कृष्णचन्द्र सिंह प्रधान, धूस्वां सायमि, वासु शशि, कृष्णभक्त श्रेष्ठ, तुलसि दिवश, परशु प्रधान, द्वारिका श्रेष्ठ आदि, आदि नेवाः प्रभृतिपिनि साहित्यिक योगदानयापाखे खँय् भाय् साहित्यया विविध विधायात थौं थुथाय् थ्यंकेगुलि तःधंगु भूमिका म्हितल ।

संगीत

संगीतया खँल्हायेबले नं नेवाःतय् शास्त्रीय व परम्परागत वाद्यवादन व रागयापाखें नेपाल अधिराज्ययात विश्वया न्ह्यःने म्हसिके बीगु नितिं गुकथंया तिबः बियावयाच्चंगु दु धैगु थःगुहे थासय् दु । नेपालय् रेडियो प्रसार शुरु जुइ धुंकाः अझ वसिबें न्ह्यव राणा दरवारदुने आधुनिक शैलीया संगीतया परम्परा न्ह्याये धुंकाः उकि तिबः बीगुलि नेवाः कलाकारपिनि भूमिका व योगदान च्वमछासैं मगाः । सेतुराम, उस्ताद वद्री, उस्ताद गणेशलाल, रत्नदास प्रकाश, मेलुवादेवी थुज्वःपिं नेवाः प्रतिभापिनि प्रारम्भिक व विशिष्ट भूमिकायापाखें खँय् भाय्या म्येया रिकर्डिङ्गया पलाः तायतिति जुल । थ्वया लिपा सीदयेक नातीकाजी, शिवशंकर, पन्नाकाजी, हरिवहादुर रञ्जितकारपिनिपाखें जूगु सांगीतिक योगदानया लिधँसाय् नेपाःया आधुनिक संगीतं छगू गति कायेफत । सांगीतिक ख्यलय् नेवाःतय् योगदानया नां न्ह्यथनेबले देसं स्वर सम्राटया सम्मान बियातःम्ह नारायणगोपालनिसैं प्रेमध्वज प्रधान, पुष्प नेपाली, पन्नाकाजी, फतेमान, दीप श्रेष्ठ, शरण प्रधान, किरण प्रधान, प्रकाश श्रेष्ठ, योगेश वैद्य, रुवी जोशी यक्व यक्वः प्रतिभा नेवाः समुदायपाखें ब्वलपिं खत ।

थौं वयाः पप संगीतया परम्परा न्ह्याये धुंकाःला संगीतया ख्यलय् थःगु कथं योगदान बियाच्चपिं नेवाः कलाकार, संगीतकारपिनि नां भीसँ अझ उप्चः ताहाकयेक न्ह्यथनेफु ।

चलचित्र

चलचित्रया विधा मुक्कं आधुनिक प्रविधिपाखें लिपा तिनि नेपालय् दुत बल । नेपालय् चलचित्र क्यनेगु व स्वयेगुया प्रचलन राणा इलय् विकास जुइ धुंकुसां नेपालीतय्सं थःगु कुतलं न्हापां दयेकूगु कथानक चलचित्र धैगु २०२२ सालया “आमा” खः । तर, संयोगया खँ धाये थथे दक्कले न्हापां निर्माण जूगु नेपाःया फिल्मया नायक/नायीका सु धकाः धायेबले नेवाःया काय्मचा शिवशंकर मानन्धर व म्थ्यायमचा चैत्यदेवी सिंह खः ।

थ्वया लिपा व्यवसायीक कथं कथानक चलचित्र दयेकेगु पलाः

न्त्यायेवं नेवाः कलाकारपिं शिव श्रेष्ठ, कृष्ण मल्ल, मदनकृष्ण, श्रीकृष्ण श्रेष्ठ, शान्ति मास्के, विमला श्रेष्ठ, नविना श्रेष्ठ, धिरेन शाक्य, सुधाशुं जोशी, पुरन जोशी, जया श्रेष्ठ, हिसिला महर्जन, मणि राजलवत, आदिया भूमिका कम मजु ।

चित्रकला

प्राचीन परम्परा कथं नेवाःतय् थःगुहे चित्रकला विधा विकास जुयाःवयाच्वंगु खँ सकसिनं स्यूगु जुल । पौभाः शैलीयात न्त्यथनेबले सिद्धिमुनी शाक्यनिसें प्रेममान चित्रकार, उदयचरण श्रेष्ठपिं न्त्यःने वइगुला दहे दु । तर, नेपालय् चित्रकला लेखनय् युरोपीय यथार्थवादी पहः राणा इलय् तिनि शुरु जुल । थौं थ्व शैलीया प्रभाव नेपाली चित्रकलाय् क्वातुक्क लानाच्वंगु दु । थुगु यथार्थवादी चिकं शैलीइ चित्र च्वयेगुलि अग्रणी कथं ल्हाः न्त्याकाः तःजिगु योगदान बियादीम्ह कलाकार चन्द्रमान मास्के खः । थ्व भवलय् मेम्ह न्त्यथनेबहःम्ह नेवाः खः- अमर चित्रकार, मनोहरमान पुं । थथेहे आधुनिक शैलीया चित्रकला विधायात न्त्याकेगुलि बिस्कंगु तिवः बियाः वयाच्वपिनि धलखलय् उत्तम नेपाली, किरण मानन्धर, उज्वल कुन्दन ज्यापु, वत्सगोपाल वैद्य, मिलन शाक्य, आदि आपालं नेवाः नां दुथ्याः ।

धार्थे धायेमाल धाःसा नेवाःतय्पाखें देयानितिं बियावयाच्वंगु योगदानयात छता छता यानाः दुवालेबले थुकथंया तहाकःगु धलः दयेकेफु । उकिसनं बनेज्या व आर्थिक ख्यलय् ला नेवाःतय्गु भूमिका च्वन्त्याः धकाः देसं स्वीकार यानावयाच्वंगु खँ खः । सिंहसार्थ बाह थुज्वःपिं नेवाः पूवर्जपिन्सं ल्हासा वनाः सयेकावयाच्वंगु बनेज्या नेवाः समुदायया विशेष दखल दुगु लागा खः । थ्वहे कारणं थःगु राज्य दुने बनेज्याया विकासयायेगु तातुना उब्ले गोरखाया जुजु रामशाहं यलया नेवाः साहुतय्त थःथाय् देसय् सःताः पसः चायेकव्युगु खः ।

अले बनेज्या जक मखु थ्वया नापनापं न्यकभनं बजार विकास व नगरीकरणयायेगुलि नेवाःतय्गु कुतः च्वछाये बहः । पहाडी लागाया चैनपुर, भोजपुर, धरान, धनकुटा, पोखरा, पाल्पा,बागलुङ्ग, रिडि, बन्दीपुर, सिलगढी, आदि फुक्क धैथें थाय्या बजार विकास व

नगरीकरणया ज्याय् नेवाःतय्गुहे योगदान खः । थौं वयाः विकास जूगु नारायणगढ, हेटौँटा, गोरखा,पुतलीखेत, कुस्मा,खस्योली बजार विकास जूगु नं अन लागाय् नेवाःतय् उपस्थितिं खः धकाः धायेफु ।

अथेहे देया थीथी औद्योगिक विकासया ज्याय् राणा इलनिसें थौं तकहे नं नेवाःतय् भूमिका उतिकं दनि । म्हिगः थीथी खानी दुगु लागाय् वनाः अनया धातुत लिक्काः उकिया बसजाः दयेकेगु निसं टकमारीयायेगु उद्योगया भाला नेवाः उद्यमिपिन्सं कुविया वयाच्वंगु खत । लिपा आधुनिक उद्योगया विकास जुइ धुंकाः नं विराटनगर, वीरगञ्ज, वुटवल, नेपालगञ्ज वनाः औद्योगिक विकासयायेगुलि नेवाः उद्यमिपिन्सं माःगु भूमिका म्हिताः क्यन । यद्यपि थौं वयाः पिनेवःपिं मारवाडीतय्सं नेवाःतय् थ्व ख्यलं ग्यानापुक विस्थापित यायायंका मच्वंगु मखु ।

राष्ट्रिय म्हसीका व नेवाः सृजना

तर, आधुनिक नेपाः निर्माणया क्रमयात दुवालेबले थौं नेपाःया म्हसिका धैगु निताजि भीसं खनाच्वना व धैगु छता प्रकृति खःसा मेगु संस्कृति खः । संभवत् थ्व निताजि नेपाःयाके मदुसा विश्वय् नेपाःया बिस्कं म्हसिका दयेकाच्वने थाकुइ जुइ । प्रकृतिं ब्यूगु हिम श्रृंखला, सौन्दर्य व वनस्पति नेपाःया छता तःजिगु धुकू खःसा मेगु मनूया श्रृजनात्मक प्रतिभां धस्वाकातःगु पुरातात्विक सम्पदा व साँस्कृतिक धरोहर खः । नेपालय् पिनेया मनूत वइगुहे थ्वहे निताजि स्वयेत अले उकिया अनुभवयायेत खः । हिम श्रृंखला, वनस्पति व प्राकृतिक सौन्दर्य ला भीत प्रकृतिहे ब्यूगु वरदान जुल । थुकि गुगुं वर्गया छुं योगदान मदु । तर मनूया कुतलं धस्वानाच्वंगु कलात्मक स्मारक व साँस्कृतिक सम्पदात गुगु नेपालय् ल्यनाच्वन, न्ह्यानाच्वन उकिया श्रजक धैपिं नेवाःत खः । नेवाःतय्गुहे श्रृजनात्मक कुतलं नेपाःया न्हाय् विश्वय् धस्वाके फयाच्वन । नेपाः धैगु खुल्ला संग्राहलय खः धकाः गर्वयायेगु आधार नेवाःतय्सं चूलाका बिल । अभूला थ्वहे लिधँसाय् थौं नेपाःदुने विदेशी पर्यटकपिन्त सालाकयाः पार्यवर्त्य मुद्रा कमेयायेगु देयानितिं छगू बांलागु लँपु जुयाबिल । नेपाःया पर्यटन उद्योगयात थातंतयेगु छता मू

लिधँसा थ्व जुयाच्चन - थौं ! नेवाः कला, संस्कृति व स्मारकयापाखें देया अर्थतन्त्रय् बियाच्चंगु थुकथंया योगदान अवश्य चाचु मखु ।

थःगु कुतलं अन्तरराष्ट्रिय सम्मान व इज्जत प्राप्तियानाः देयात म्हासिकाबीगु व न्हाय् म्वाकेवीगु नं राष्ट्रप्रति व्यक्तिया योगदान खः । संभवत् थुकथं अन्तरराष्ट्रिय स्तरया पुरस्कार प्राप्तियानाः नेपाःया इज्जत थकयाबीगु ज्याःनं दक्कले न्हापां नेवाःया काय्मचापाखें जूगु खः धकाः न्ह्यथनेफु । समाजसेवी मदुम्ह तुल्सी मेहर श्रेष्ठजुं थ्व भवलय् अन्तरराष्ट्रिय नेहरु पुरस्कार त्याका दिगु खँ लुमंके बहःजु । अथेहे जन-आन्दोलनया सर्वच्च कमाण्डर गणेशमान सिंहजुं राष्ट्रसंघीय मानवअधिकार शान्ति पुरस्कार त्याकादिगु खः, वयकःपि निम्हं नेवाः समुदायया सन्ततीपिं खः ।

सन १९५० या दशकय् तिनि विश्व दबुलि पिलुवंम्ह नेपाःयाके नेवाः पुर्खापिन्सं रचनायानातःगु रञ्जना लिपि अले नेपाल संवत् मदुगु खःसा संयुक्त राष्ट्र संघयादुने स्वतन्त्र देकथं दुतिने मदइगु खः। अले थौं तक नं भीगु दे अन्तरराष्ट्रिय जगतनापया स्वापुतिं तापनाः संभवत मध्य युगीन अवस्थाय् लिकुना च्वनेत बाध्य जुइगु खइ । अले अन्तरराष्ट्रिय सहयोग व समर्थनया लँपु मचालाः नेपालय् थौं गुलि विकास जुल उलि तक नं जुइ मफैगु अवस्थाय् लिकुना च्वनिगु जुइ ।

यदि ऐतिहासिक दसि कथं नेपाल धैगु नां स्थानवाचक मखु जातिवाचक खः धकाः स्पष्ट यानाच्चंगु दुसा उकिया स्वापु मालायकेबले नेवाःत तक याउँक थ्यंवइ । स्वयं इतिहास शिरोमणी बावुराम आचार्यजुया धापू कथनं नेवार, नेवाल, नेपाल धैगु छताहे खः, नेपाः धैगु व नेवाः धैगु वहे खः । तिस्तुङ्गय् च्वंगु इस्वी ५१२ या वसन्तदेवया त्वहँपतिया दक्कले न्ह्यःने लाक्क सम्बोधन यानातःगु “स्वस्तिनैपालभ्य” धकाः नेपाल खँग्वःयात जातिवाचक अर्थय् बहुवचनकथं छ्चलातःगुलि नं नेपाल धैगु प्राचीनकालय् भीगु देसय् च्वनीपिं आदिवासी मनूतय्त् सम्बोधनयाइगु खँग्वः खः धकाः स्पष्टयाः । थुकिया अर्थ खः, थौं भीगु देसयात विश्वया न्ह्यःने नेपाल अधिराज्यया नामं गुगु म्हासिका बियाच्चन उगु नांहे तकं नेवाः जातियापाखें चूलाःगु खः धकाः क्यनाच्चंगु दु । नेवाः धैगु मदुगु जूसा

थौं देया नां नेपाल मजुसैं मेता छु जुइ खः, सुनां बिचाः यायेफु ?
 नेवाः समुदाययापाखें मुलुकयात बियाच्वंगु थुज्वःगु योगदानया भवलय्
 न्त्यमथसैं मगाःगु छगू पक्ष खः- थ्व !

अथेहे संसारय् देयात छगू स्वतन्त्र व थःगु बिस्कं अस्तित्वया
 म्हसिका ब्वयाबीगु लिधँसा उगु देया राष्ट्रिय ध्वाँय् खः धैगु खँय् विवाद
 मदु । उकिं प्रत्येक स्वतन्त्र देसं थःथःगु बिस्कंगु राष्ट्रिय ध्वाँय् ब्वयेकाः
 क्यनाच्वनि । अले उज्वःगु राष्ट्रिय ध्वाँय् सदां धस्वाकातयेगुलि राष्ट्रिय
 प्रतिष्ठाया चिंतायेकाः मनूतय्सं थःगु ज्यानया वलिदान तकं
 यानाक्यनि । राष्ट्रियता, राष्ट्रिय भावनानाप क्वातुक स्वापु दयाच्वनिगु
 राष्ट्रिय ध्वाँय् मेमेगु देसय् आपालं लिपा लिपा तिनि विकसित जुल ।
 अले राजनीतिक उथलपुथलया भवलय् आपालं देसय् थुकथंया राष्ट्रिय
 ध्वाँय् हिलावंवन । तर, नेपालय् प्राचीन इलनिसें वहे चन्द्र सूर्यया
 स्वकुलाःगु ध्वाँय् ब्वयाच्वन, थौनं भीगु राष्ट्रिय ध्वाँय् जुयाः
 धस्वानाच्वन । थुकिया इतिहासयात मालास्वयेबले भीसँ खने, थ्व वहे
 ध्वाँय् खः गुगु ध्वाँय् नेवाः पुर्खापिन्सं थःगु साँस्कृतिक चिंथं देगः
 देगःया लुखा जःखः धस्वाकावन । अथे धैगु नेवाःतय्सं विकासयाःगु,
 नेवाःतय्सं छ्यलावयाच्वंगु ध्वाँय् थौं नेपालया राष्ट्रिय ध्वाँय्या थाय्
 कयाच्वन । थौंया नेपाःया राष्ट्रिय ध्वाँय् ब्वयेकेबीगुलिनं नेवाःतय्
 पुर्खापिनि सृजनात्मक परिकल्पनाया योगदान खत ।

नेपाल देसयात छगू पूर्णता बीत, सम्पन्न दयेकेत व थःगुहे
 बिस्कं म्हसिका दुगु स्वतन्त्र दे खः धकाः स्थापित याकेगुलि
 नेवाःतय्पाखें देया नां छुइगुलिनिसें राष्ट्रिय ध्वाँय् ब्वयेकिगुलि तक
 फुकथं योगदान प्राप्त जुयाच्वन । थःगु तःजिगु साँस्कृतिक सम्पदाया
 लिधँसाय् नेवाःतय्सं देयाहे न्हाय्म्वाकेगु लिधँसा चुलाका बियाच्वन ।
 राजनीतिक ख्यलय् जीवन वलिदानयायेगुलि जुइमा वा आर्थिक क्षेत्रं
 देयात तःमियायेगुलि जुइमाः थःगुपाखें योगदान बीगुलि नेवाःतय्पाखें
 गुब्सं नुगः कयेमकुंकू । थःगु थासं थःगु दायीत्व पूर्वकेगुलि नेवाः गुगुनं
 कथं ल्युनेमलाः । नेपाःदुने नेवाःया कुतः सदां नेपाःया प्रतिबद्ध,
 इमान्दार नागरिकया ल्याखं जुयाच्वंगु दु । नेवाःयापाखें राष्ट्रया सुख
 दुःखय् सदां थःगु सहभागीता सक्रिय कथं क्यनेगुलि गुब्सें लिमच्यु ।

थुकथं थन थ्व सकतां खँया मूल्याङ्कन जुइ धुंकाः स्वभाविक रुपय्
 ब्वलनिगु न्त्यसः खः, 'अथे खःसा थ्व नेपाल धैगु देय् नेवाः धैपिं
 मनूतय्गु नं खः वा मखु ?' निसः व चाचू दँ न्त्यवहे एकिकरण जुल
 धाःगु थ्व देसय् नेवाः धैपिनिगु नितिं आत्मसम्मानपूर्वक धस्वाना
 म्वायेगु थाय् गन ? अले नेवाःतय्सं थ्व देसय् थः नं प्रथम श्रेणीया
 नागरिक खः धकाः अनुभवयायेगु आधार ग्व ?

भीी थ्व देया नागरिक , अझ धाये थनयाहे धरतीया भूमिपुत्र ,
 आदिवासी भीी ! थ्व देयात स्वांथें ह्वयेकेगु नितिं थःगु श्रृजना, सकतां
 सकतां तच्चकं श्रद्धापूर्वक लःल्हानावयाच्चना । माःबले थःगु चःति जक
 मखु हि बीत तकं गुब्बसं लिमचिल, तर, भीीत थौतक थ्व देसं छिपिनं
 थ्व देय्या समान हकदार नागरिक खः धकाः व्यवहारयाःगुया दसि ग्व ?
 भीीसँ अनुभव यानाच्चना, गुब्बे नेवाः जातिया भाषा, संस्कृतिया खँ
 वइ, उब्बे उब्बे राज्ययापाखें थुपिनं थ्व देया नागरिक खः, थन थुमिगु
 नं उतिकं अधिकार दु धकाः लुमंकेगु मयाः । मथ्याम्ह मांया मस्तय्संथें
 नेवाःतय्सं थःगुहे देया दुने आः तक राज्ययापाखें दोस्त्रो श्रेणीया
 नागरिकया व्यवहार यानाच्चंगु अनुभवयायेत बाध्य । अथे मखुसा,
 नेवाःतय्गु मांभाय्यात अदालतं निषेधितयायेगु ज्या मयाइगु जुइ । अथे
 मखुसा, थौया संविधानयापाखें खँय् भाय्यात राष्ट्र भाय्या थाय् बियाः
 भीीगु भाय्यात गनं छचलेमदैगु भाय् कथं क्वय्या दर्जाय् मतैगु जुइ ।
 अथे मखुसा, भीी मस्तय्त थःगु मांभासं ब्वनेसयेकेगु अवसरं
 बञ्चितयायेगु ज्या राज्यस्तरं यानामच्चनिगु जुइ । अथे मखुसा,
 प्रशासनिक क्षेत्रय् ल्यतुल्ययाः नेवाः धाःपिन्त पितिनिगु ज्या मयाइगु
 जुइ । अथे मखुसा, नेवाःतय् थःगुहे आदिभूमि स्वनिगलय् नेवाःतय्त
 अल्पसंख्यक स्थितिइ थ्यंकेगु षडयन्त्र राज्यस्तरं मयाइगु जुइ ।

प्रजातान्त्रिक प्रणाली नागरिकया हैषियतं नेवाःतय्सं मदिक
 थःगु दायीत्व जक पूर्वकेगु, तर मेखे राज्ययापाखें उमिगुनितिं
 प्रत्याभूतयायेमाःगु न्यूनतम नागरिक अधिकार धाःसा प्राप्त जुइमफैगु
 जुल धाःसा थुकथंया राज्य व्यवस्थायात गुगु अर्थय् थुइकेगु ? अले
 थुज्वःगु शासन पद्धतियात स्विकार यायेमाःगु वाध्यता नेवाःतय् नितिं
 गुब्बे तक ल्यनाच्चनिगु खः ?

खः, “यः जितः नं जिगु देस यः, तर जिं मखं जिगु देस ग्वः ?”
कवि दुर्गालालया थ्व न्ह्यसः प्रत्येक नेवाःतय् मंकाः न्ह्यसः खः ।

नेवाः संगठन व आन्दोलन

नेवाःतय् संगठनात्मक प्रवृत्ति

मनू स्वभावतः पुचः मुनाः अले थवं थवय जानाः पानाः जीवन हनीपि प्राणी खः। उकिं थुमित समाज माः , समाज दयां मगाः समाजयात न्ह्याकीगु छगू क्वात्तूगु संगठन प्रणाली नं उलि हे मदयेकं मगाः । छगू ल्याखं संगठित समाज मनूया सुरक्षा व संरक्षणया मू लिधँसा जक मखसं उमित सुसंस्कृत व सभ्य लूपुइ न्ह्यज्यायेत ग्वाकिगु केन्द्रनं खः । उकिं प्रत्येक मनूयात स्वयेवं उम्ह मनू ब्वलंगु समाज गथेच्चं धैगुया किचः लुयाच्चनिसा प्रत्येक समाजया लिच्चः उगु समाजदुनेया प्रत्येक व्यक्तिया विचार व व्यवहारय् खनेदयाच्चनि । मनूत गुब्लेनिसं सामाजिक संगठनया दुने जीवन हनेसयेकल धैगु खँ धाये अःपू मजू । तर , गुब्लेनिसं मनूत सामाजिक रुपं संगठित जुयाः न्ह्यज्यात उब्लेनिसं मनुखं सभ्यताया त्वाथः गयाः क्यन । उकिं समाजशास्त्रीतय्सं गुगु नं समाजया संस्कार व सभ्यताया आधार मालेमाल धायेवं उगु समाजया संगठनात्मक संरचनायात निं बांलाक थुइकेत व दुवालेत स्वइगु खः ।

नेपाःया परिप्रक्षय् समाजशास्त्रया ल्याखं ब्याख्या याइबले थन

तःता जाति, भाषा व संस्कृति दुगुया नापनापं थनया सामाजिक संरचनाय् नं उकथं हे विविधता दुगु खँयात क्लेगु यानावयाच्वंगु दु । अले नेपाःदुनेया थीथी सामाजिक संरचनात मध्ये भी नेवाःतय् गुगु सामाजिक संरचनाया स्वरुप दु उकियात कयाः न्ह्याम्हेसिनं नं छप्वाः म्हुतु धैथें थुकिदुने दुगु बिशिष्टतायात कयाः च्वछायेगु यानाच्वंगु दु । छाय् धाःसा नेपाःदुनेया थीथी जाति समुदाय मध्ये नेवाःहे उज्वःगु समुदाय खः गुगु समाज दुनेया संगठन स्वरुप अतिकं क्वातु, तहाकःगु परम्परा क्वबियाः न्ह्यानावयाच्वंगु दु अले,संगठनया प्रभाव समाजय् तच्चकं धिसिलाः । थुकिदुनेया संचालन प्रक्याय् उतिकं प्रजातान्त्रिक पद्धतियानं अभ्यास जू । नेवाः समाजयात थथे छगू बिशिष्ट अवस्थाय् थ्यंकातःगु थुकथंया सामाजिक संगठन स्वरुप खः - गुथि !

नेवाःतय् संगठनया प्राचीन स्वरुप

नेपाःया सन्दर्भय् छगू वा मेगु अर्थय् धायेगु खःसा गन गन गुथि दु अन अन नेवाः दु धैगुया अर्थ खः। अभ् धाये गुथि व नेवाः छगू पर्याय खः । नेवाः समाजय् गुथिया परम्परा गुब्लेनिसें न्ह्यज्यात धैगु ला अभ् माले हे मानिगु बिषय जुइ । तर जुजु शिवदेवया शक सं ५२५ गोदावरी लेलेया शिलापत्रय् *ध्वजगौष्टि*, *प्रदीपगौष्टि*, *वादित्रगौष्टि*, *मल्लयुध्दगौष्टि*, *प्रणालिकागौष्टि*, आदि व्यवस्थायाबारे गुगु खँ न्ह्यथनातःगु दु उकिं छु खँ स्पष्टयाः धाःसां गुथि संगठन स्वरुप थुब्लेहे गाक्कं सुथालाये धुंकल । उकिं छु अनुमान यायेफु धाःसां थ्व ई सिबेंनं यक्वः यक्वः न्ह्यवहे गुथिया परम्परा भीगु समाजय् न्ह्याये धुंकल जुइ । भी नेवाः समाजया संगठन स्वरुपया थुगु प्राचीनतम संरचना गुथि खः, थ्व केवल सामाजिक, धार्मिक वा राजनैतिक आस्था वा विवशतावश न्ह्याकावयाच्वंगु छगू औपचारिकताया अस्तित्व जक मखु । नेवाः समाजयात दुग्यंक वालास्वबले स्पष्ट छु खने दु धाःसा गुथिहे नेवाः समाजया जीवन खः, अले गुथिहे शक्ति खः । गुथिया प्रभाव नेवाः समाजय् थुभनं क्वातु कि गुथिनं छ्खेरिखे च्वनाः गुम्हं नेवाः नेवाः जुयाः म्वायेहे फैमखु ।

बुसानिसें सी धुकाः तकया गुलिनं सामाजिक विधि व्यवहारयात न्त्याकेमाः उकिया नितिं छगू हे जक लँपु धैगु गुथिहे जक खः । थ्व ल्याखं धायेगु खःसा गुथि नेवाः समाजया परम्परा नं खः, अले म्वायेगु छगू प्रवृत्ति नं । उकिं नेवाःत थःगु कुल, थाय्वाय् त्वःताः स्वनिगः पिने च्वनेगु याःसां थःगु लागाय् गणेद्यः छम्ह जक थापना यानाः जूसां , चीभाः छगः दनाः जूसां वा बाजं खलः दयेकाः गुथि स्वनेगु व उकिया दुने अनुशासित जुयाः च्वनेगु यानावयाच्वंगु दु । नेवाःतय्त देखि ब्वनाः भ्वय् नकेमाःगु देगुथिनिसें कयाः घाय्पुङ्गु वा तुङ्गु ज्या न्त्याकेया नितिं गुथि थुज्वःगु संगठित शक्ति माः ।

मेखे बौद्ध धर्मया त्रिरत्न (बुद्ध, धर्म व संघ) यात थःगु आस्था कथं जीवनय् नालावयाच्वं पिं नेवाः समाजया बौद्ध कवः दुनेया सर्व्वसंघ, बहि वा बहाःया व्यवस्थानं थुज्वःगुहे क्वाःतुगु संगठन संरचनाया स्वरूप खः । गुकिं उगु समाजयादुने तःधंगु प्रभाव लाकावयाच्वंगु जक मखसें छगू निर्णायक भूमिका समेत म्हितावयाच्वंगु दु ।

प्राचीन संगठनयापाखें बियाच्वंगु तिबः

व्यक्तिया जीवनय् जक मखु समष्टिया ख्यलय् नं उकथंया सकारात्मक तिबः बियावयाच्वंगु गुथिया भूमिकायात दुवालेबले भीसँ छु खंकेफु धाःसा थुगु सामाजिक संगठनया निरन्तरतां यानाःहे भीगु नेपाल राष्ट्रया न्हाय् कथं विश्वया न्त्यःने ब्वयेगु गौरवया चिंथें जुयाच्वंगु साँस्कृतिक धरोहरत देगः, चीभाः, बहाः, बहि, सतः, फलेचा, मठ आदि गुलि दु थुकियात थौं तक धस्वाकातयेत सफल जुयाच्वंगु खः । संसारया नितिं अति आकर्षणया बिषय जुयाच्वंगु भीगु जात्रा, पर्व, मेला, प्याखं आदि साँस्कृतिक निधिया संचालन व संरक्षणया आधारनं गुथिया नामं न्त्याकावयाच्वंगु संगठनात्मक कार्य शैली खः ।

भीगु समाजय् थुकथं संगठित रुपय् थःगु कथंया भूमिका म्हितावयाच्वंगु गुथिया लागायात अभ तब्ब्या व चकंका स्वयेबले ऐतिहासिक भोलय् आपालं उज्वःगु दसित नं ध्वदु गुब्ले थ्वहे गुथियापाखें प्रशासनिक व न्यायिक इकाई कथं नं महत्वपूर्ण

ज्यायानावःगु दु । लिच्छवी कालय् अले मल्लतय् शासनया इलय् तक नं पाञ्चाली व्यवस्थाया अन्तर्गत त्वालं त्वाःया गुथियात राजस्व संकलनयायेगुनिसं स्थानीय स्तरया कचवंयात कयाः सहलहयानाः ज्यंकेगु, न्याय बीगु भाला गुथियापाखें कुबिया वयाच्चंगु खः । थ्व सिबें नं महत्त्वपूर्ण खँ छु धाःसां राज्यया विरूद्ध शत्रुतय्पाखें हमला जुइबले, देया सुरक्षाय् संकटया ई वइबले राजकीय सल्लाह बीगु थुज्वःगु अति संवेदनशिल व महत्त्वपूर्ण भूमिका गुथि संगठनपाखें म्हितावयाच्चंगुनं भीसँ इतिहासया दुने लुइकेफु । वास्तवय् थ्व सकतां नेवाः समाजय् गुथिया नामं न्ह्यानावं वयाच्चंगु सलंसः दैनिसंया छगू सामाजिक, साँस्कृतिक विशिष्ट प्रवृत्ति खः ।

ने.सं. ८८८ लिपा नेवाःतय् विघटन

नेपाल संवत् ८८८ स नेपाःया सत्ताशक्तिइ गुगु दुर्घटना जुल उकिं सम्पूर्ण नेपाःया राजनैतिक संरचनाय्हे बांलाः बांमलाः लिच्चः लाकां त्वःतल । सत्तासिन जुयाच्चपिं नेवाःत छक्कलं हे जनताया स्तरय् कुतुंवयाः लाय्कुपिने वायेत्यः फवायेत्यः जूवल । एकीकरणया नामं विजित जातिया मनूतय्सं नेवाःतय् न्हाय्, म्हुतुसि, सपः ध्येनाः थःगु बहादुरी क्यंसानं स्वनिगःदुने गुथिया माध्यमं न्ह्यानावयाच्चंगु गुगु सामाजिक व साँस्कृतिक संगठन स्वरूप खन उब्ले अतिकं चंख व धूर्तम्ह पृथ्वीनारायण शाहं थःगु विजय राजनैतिक रुपं जूसां साँस्कृतिक रुपं नेवाःतय् न्ह्यःने आत्मसमर्पणयायेत विवश जुल । सैनिक बलं व क्रुरताया ख्याच्चः क्यनाः स्वनिगः थःगु ल्हातय् लाकेधुंकुसां उब्ले तक पृथ्वीनारायणं थःत औपचारिक रुपय् जुजु धकाः घोषणायायेगु आँटयायेमफुत गुब्ले तक नेवाःतय् गुथियापाखें वयात 'जुजु' खः धकाः अनुमोदन मयात । तर , विडम्बनाया खँ गुब्ले संगठन शक्तिया उच्चतम स्वरूप राज्यसत्तायातहे नेवाःतय्सं थःगु ल्हाःतं त्वःफिकल उब्ले छगू लिपा मेगु यानाः नेवाःतय् सामाजिक विघटनया क्रम शुरु जुल । खः, पृथ्वीनारायणया राज्यकालय् तक नेवाःतय् संस्कृति, रितिथिति व परम्पराया विरूद्ध उक्तं तप्यंक गुगुं आक्रमण मज्जनि । छाया धाःसा स्वनिगलपिने वयाः सैनिक बलया लिधँसाय् जक सत्ता

ल्हाःतय् लाकेत सफलजूम्ह जुजुया नितिं थःगु सत्तायात स्थायीत्व बीगु
 खःसा स्वनिगःया मूलवासी नेवाःतय् संवेदनशिल पक्षय् गुगुं घाःमलाकेगु
 हे भिं धैगु चंखम्ह जुजुं बांलाक थू । थ्व सिबेनं महत्वपूर्ण खँ
 स्वनिगःयात देया केन्द्र दयेकाः प्रशासन न्ह्याकेया नितिं जुजु
 पृथ्वीनारायणयात थनयाहे अनुभवी नेवाःतय् न्ह्यःने ग्वहालिया नितिं
 ल्हाःफयेगु त्वःता मेगु विकल्प मदु । उकिं छगू कथं नेवाःतय्
 साँस्कृतिक परम्पराया निरन्तरताय् उब्ले राज्यसत्तायापाखें उपायच्वं
 तच्चःगु पंगः मथंगु नेवाःत प्रति क्यंगु उदारता मखसें रणनीतिक
 वाध्यता जक खः ।

नत्रसा थ्वहे जुजुं नेवाःतनाप वैवाहिक स्वापूतयेगु नितिं मल्ल
 जुजुपिनि भारदारतय्त बल प्रयोगयात अले उकियात
 स्वीकारयायेमफुपिं सकसितं ल्यत्तुल्ययाः खलःका खलःहे न्हंकेगु
 अभियान मन्त्याकीगु जुइ । गुकिं यानाः स्वनिगःया नेवाःत दक्कले
 न्हापां थःगु भूमि त्यागयानाः जीवन रक्षाया नितिं बागलुङ्ग, पोखरा,
 पाल्पा, धरान, धनकुटा, रिद्धि, डोटी,चैनपुर, भोजपुर आदि लागाय्
 चिच्चादनेत वाध्य जुल । राजनैतिक रुपं विस्थापितयाये धुंकाः
 नेवाःतय्त सामाजिक रुपं नं विस्थापितयायेगु क्रमया थ्व शुरु खत ।
 पृथ्वीनारायण नेपाःगाःयानं जुजु जूगु पायछि दच्छि लिपा ८८९ ने.सं.
 थिलां यलया ६२ म्ह नेवाःतय्त इसाई धर्म नालाकाल धैगु आरोपय्
 कैपुचियन पादरीतनापं देसं पितिनाः उमित भारतया वेतिया जिल्लाय्
 प्रवास जीवन हनेत वाध्य याकल । नेवाःतय्त स्वनिगलं पितिनेगु नितिं
 शासन सत्तायापाखें न्ह्याकायंकुगु थुकथंया अभियान उब्ले तिब्र जुल
 गुब्ले रणबहादुर शाह जुजु जुयाः सिंहासनय् च्वन, केवल थः युवराज
 छम्हेसिया सुरक्षाया चाहनाय् द्दलंदः कचिमचाया नापनापं मा-अबुपिन्त
 नं महांतयसं ख्याकाः तामाखुसि पारी पितिना व्छल ।

गुब्ले नेपाःया शासनाधिकार पूर्ण रुपं राणातय् ल्हातय् लात,
 उब्ले खनेदयेक हे नेवाःतय् विरूद्ध निता खँ न्ह्याकल । वेलायत
 चाहलाः पश्चिमी फसं कयेकावःम्ह जङ्गबहादुरं नेपाःयात संसारया
 न्ह्यःने म्हसिकेगु आधार जुयाच्वंगु नेवाःतय् मौलिक वास्तुकला व
 स्थापत्यकलायात लाकमंच्वानाः आँयपापौ पियाः, कलात्मक त्वानासिं

स्वहायेका: रोमन व यूनानी शैलीया दरवार धस्वाका: साँस्कृतिक रूपं नेवा:तय् विस्थापितयायेगु अभियान न्ह्याकल । नेवा:तय् कलात्मक लाय्कू पिया: यँया गद्दी बैठक, ख्वपया लाल बैठक व यलया बहादुर शाह बैठकत थ्वहे भ्वलय् दयेका: शासकतयसं थ:गु पुरुषार्थ क्यन । शाह जुजुपिन्सं छक्कलं आँटयाये मछ्वा:गु खँ राणातय्पाखें जुल । खँ केवल भ्या:, खापा वा त्वानासिया जक मखसें थ्व छगू प्रवृति कथं ब्वलन । छगू लिपा मेगु याना: विघटन व विस्थापनया थ्व भोलय् नेवा:तय् शास्त्रिय व लोक प्याखँया थासय् थियटरया परम्परा न्ह्यात । अले क्वँचाखिं, दाफा, धा:, धिमेया थासय् बाछैबाजं थाकेगु यानाहल ।

पिनें वया: सत्ता ल्हातय् लाकूपिन्सं न्ह्याथाय् नं थ:गु सत्ता क्वात्तुके चाहनाय् उगु थाय्या मूलवासी वा आदिवासीपिन्त साँस्कृतिक व समाजिक रूपं विघटनयाना: सदांया नितिं क्वथलेत स्वइगु छगू कथं रणनीतिक प्रक्या हे खत । अमेरिका, अष्ट्रेलिया, न्यूजिलैण्ड, अफ्रिका दक्कोभनया ऐतिहासिक तथ्यं थ्वहे सत्यया धकिं उलाच्चंगु दु । वेलायतं भारतीय उप-महाद्वीपयात उपनिवेश दयेके धुंका: अनया जनताया मनोबलयात क्वात्तुका: बौद्धिक रुपं धस्वाके मबीगु रणनीति कथं अनया मौलिक संस्कृतिया थासय् वेलायती शैलीयात स्थापितयायेत स्व:गु खँ भीत लुमं । थुकिया नापनापं थथे पिनें व:पिं प्रत्येक समुदाययाके न्ह्याथाय् नं छता ज्वलिंज्व:गु मानसिक स्थिति नं छु खने दु धा:सां थुमिसं थ:त न्ह्याब्ले उच्च व विशिष्टतायेका: उगु लागाया आदिवासीपिन्त क्वथुनेगु व क्वतुनेगु कुत:याइगु ।

बस, राणात नं थ्वहे प्रवृति या दास । अले थ्व मानसिक त्वचं ग्रष्ट जुया: थुमिसं थ:त रजपुत धका: दावीयासें थ:गु वंशगत स्वापू भारत चित्तौरया राणा पृथ्वीराज चौहान, राणा प्रताप सिंह आदि लिस्से स्वायेगु स्वल । थ्वहे भोलय् थुमिसं नेपा:या राष्ट्रियता व इतिहासनाप स्वानाच्चंगु नेपाल संवत्यात नेवा:तय् संवत्थें तायेका: राजकीय बहिष्कारयात बरु थ्वया पलेसा भारतया मालवीयतय्सं न्ह्याकात:गु विक्रम संवत्यात नाला: राष्ट्रिय रूप बीगु दुस्सहास याना: क्यन । अथे धैगु ने.सं. १०२५ या खँखः, थुब्ले हे राणा शासक चन्द्र शम्सेरं

नेपाल संवत्स्या बहिष्कार याःथें छगू समन जारीयाना : नेपालभाषां च्वयातःगु कालबिलया भाँया कानूनी प्रमाण लगेमजू धकाः नेवाः भाय्यात नं कानूनी मान्यता मबीगु नीति नाल । थ्वया लिपा मनूतय्सं आकाशवाणी खँल्हाबँल्हायायेबले नेवाः भाय् छचले मन्त । बहाःपूजा थुज्वःगु मुक्कं धार्मिक ज्या भवल्य् छपु बौद्ध तुतः नेवाः भासं च्वयाः द्यःया नामय् छाल धकाः तुतः छाःम्ह भवानीवीरसिंह कसाः व च्वःम्ह योगवीरसिंह कसाः निम्ह डण्डित जुल । नेवाः जुयाः ब्रम्हुत नाप वेद व सनातन धर्मयात कयाः जुजुया लाय्कुलि शास्त्रासयायेगु शहासयाःगुया डण्ड स्वरुप माधवराज जोशी देसं पितिका च्वनेमाल । अथेहे नेवाः जुयाःहे म्हासुक बौद्ध चिवर पुनाजुगुया सजाँय कथं भिक्षुत समेत देसं पित्युंका म्वायेत वाध्यताया स्थिति वल । थःगु मांभासं कविता चिनाजुगु अपराध ठहरेयानाः चित्तधर "हृदय"यात जेलय् तःपिं शासकतय्सं "क्रान्ति विना थन स्वच्छ शान्ति वइमखु" धकाः च्वयाजुम्ह कवि सिद्धिचरणयात त्वःतिगुला खँहे मखुत , सर्वस्वहरण व कारवासया सजायँ जुल । बुद्धया सन्देश व आदर्शयात संगीतबद्ध यानाः म्ये हालाजूपिं ज्ञानभाला भजन खलःया मननूतय्सं नेवाःभाय्यात माध्यम कथं नालाबीवं उपिं नं राणातय् मिखाय् धूजुल । अले ज्ञानमाला भजनयात सफूया रुप बियाः पिकाःगु द्वपनय् ने.सं. १०६३ या दँय् भक्तबहादुरं सास्नानयेमाल ।

नेवाःतय्त थुकथं सामाजिक, साँस्कृतिक, भाषिक आदि ख्यलय् विस्थापित यानावयंकेगु क्रम गण कालय् तच्चकं आक्रमक व तिब्रतम रुपय् अनुभव जुल । १०७१ ने.सं. लिपा देसय् राण शासन सत्ता क्दलाः न्हू राजनीतिक प्रणालीया शुरुवात ला जुल, तर १०७९ ने.सं.या दँय् जुजु महेन्द्र "प्रजातान्त्रिक" धाःगु संविधान ब्यूबले नेपालय् दक्कले न्हापां देया बहुभाषिक व बहुजातीय विषेशतयात लाकमंच्वानाः खँय् भाय्यात नेपाली नाँछुसैं राष्ट्रभाषाया दर्जा बीगु ज्यायात । अले ला देसय् पंचायत नांया शासन व्यवस्था ने.सं. १०८१ लिपा न्च्यायेवं नेवाःतय् विरूद्ध विघटन व विस्थापनया ज्या छगू नियोजित षडयन्त्रया रूप काल । अले, थुगु षडयन्त्रयात मूर्त रूप बीगु कुतलय् दक्कले न्हापां नेवाः सामाजिक संगठनया मू लिधँसा

जुयाच्चंगु गुथिया परम्परा व प्रचलनयात न्हंकाळ्येगु नितिं गुथिया आर्थिक श्रोत गुथिबुँ दक्को कथित भूमिसुधारया नामय् सरकारं दुकयाबिल । सरकारी स्तरय् न्ह्याकुगु थुकथंया षडयन्त्रया लिच्चः कथं नेवाःतय् आपालं गुथित न्ह्याकेमफैगु जुयाः दिनावन, गुथि अन्तर्गतया जात्रा, पर्व, मेला, प्याखँ आदिनं दिनावं वनेगु क्रम शुरू जुल । थ्वया नापनापं गुथिया संरक्षणय् धस्वानाच्चंगु कलात्मक देगः, सतः, चीभाः, बहाः, बहि जक दुनावंगु मखसें नेवाःतय् सलंसः दँ न्ह्यवनिसें क्वातुक न्ह्यानाच्चंगु थःगु कथंया सामाजिक संगठनया स्वरूपय् समेत भ्वखाय् ब्वल । पंचायती कालय् नेवाःतय् विरुद्ध जुजु रणबहादुर शाह नं थें बलपूर्वक स्वनिगलं पितिनेगु ज्या ला मजू तर , षडयन्त्रया मेगु पलाः कथं स्वनिगःदुने देया फुक्क धैथे जिल्लां जनसंख्याया अप्रवासनया चाप थुकथं उप्वयेकाः बिल कि नेवाःतय् आदिस्थानय् नेवाःतहे अल्पसंख्याय् हीकेगु अभियान जुल, गुगु अभियान अभं न्ह्यानातुं च्वंगु दनि । सत्तारूढ वर्ग छु खँ बांलाक थू धाःसा नेपाःदुने नेवाःतहे जक उज्वःगु समुदाय खः गुगु समुदाय उपिनाप प्रत्येक ख्यलय् प्रतिस्पर्धायायेत सक्षम खः । उकिहे सत्तारूढ समुदायया मनूत नेवाःतय् विकास, प्रगतिपाखें न्ह्याब्लें सशक्तित । जीवित नेवाःत खनाः जक मखु मदयेधुंकुम्ह नेवाः मास्टर जगतसुन्दर मल्लया शालीक खनाःतकनं पंचायती शासकत सशक्तित । उकिंला ख्वपया खौमा त्वाल्य तात्कालिन ख्वप नगर पंचायतयापाखें धस्वाकातये धुंकुगु वयकःया शालीकयातनं ने.सं १९०५ कौलागाः १३ कुन्हु चांचां प्रहरीत वयाः ध्येनायंकेगु घच्चायापूगु ज्या तकं यात । मूलतः थुब्लेया शासकतय् मनंतुना धैगु नेवाःतय्त स्थापित जुइके मबिगु, संगठित पलाः न्ह्याके मबीगु अले गुकथं जिल उकथं नेवाःतय्त बिस्थापित व विघटनया लँपुइ घ्वानाळ्येगु खः।

पंचायतया स्वंगू दशकयादुने सत्तायापाखें नेवाःतय्त विघटन व विखण्डनयायेगु तातुनाः न्ह्याकुगु पलाःत प्रत्यक्ष कथं अनुभव जूगु छगू लागा शिक्षा खःसा मेगु लागा संचार खः । भाय्या छछलाबुला व प्रचार प्रसारया दक्कले महत्त्वपूर्ण माध्यम थ्वहे निता खः । थ्व निगू माध्यमं नेवाःभाय्यात तापाकेफत धाःसा सलंसः दँ न्ह्यव निसें

नेपाःया समाजय् थःगु विशिष्ट थाय् कयावयाच्चने धुंकूगु थ्व भाय्या प्रभाव व प्रयोगयात लिक्का बीफै, पंचायती साम्प्रदायीक पुचलं थ्व खँ बांलाक थू । अले उमिसं थ्व खँनं थू कि भाषिक रुपं नेवाःतय्त विस्थापितयायेत सफल जुल धाःसा नेवाःतय्त युगौनिसं एकताया खिपतय् चिनातःगु छगू क्वातुगु लिधँसा हे फ्यासुयां वनि । उकिं थुमिगु मू प्रहार शिक्षाय् जुइगु स्वभाविक खत । अले ने.सं. १०७९ या दँय् न्हू शिक्षा योजना लागू यानाः प्राचिन इलनिसं नेपालभाषा धकाः धयावयाच्चंगु भीगु मांभाययात सत्ताया बलं क्वत्यलाः सरकारी छचलाबुलाय् नेवारी धायेगु यानाहल । प्राथमिक तहया शिक्षा बीगुलि समेत नेपाली भाय्हे माध्यमयायेमाःगु ब्यवस्थायात । थनलि छगू क्रमहे न्ह्यात माध्यमिक व कलेजया तँय् छगू पूर्वीय भाषाया विषयकथं पाठ्यक्रमय् दुथ्याकावयाच्चंगु नेपालभाषायात ने.सं. १०९१ निसं राष्ट्रिय शिक्षा पद्धतिया नामय् लागू जूगु शैक्षिक ब्यवस्थाय् तःता ब्यवसायीक विषयनाप त्वाकःबुकःयानाः इच्छाधीनया पुचलय् क्वकया बिल । ने.स. ११०५ थ्यंबले ला नेपालभाषा विषय कयाः एम.ए. व पीएच. डी. डिग्री कयातःपिन्त लोकसेवा आयोगया कर्मचारी नियुक्ति व वदुवाय् बीगुलि ल्याः मबीगु कानून छयलाः नेपालभाषायात अतिकं पनपक्षयायेगु ज्या सरकारयापाखें जुल ।

अथेहे संचारया ख्यलय् पंचायती शासनयापाखें जूगु नेपालभाषा विरुद्धया न्हापांगु संकीर्ण पलाः धैगु देसय् प्रजातान्त्रिक ह्चूपाः वसानिसं अथे धैगु ने.सं. १०७१ निसं रेडियो नेपालयापाखें प्रसारण यानावयाच्चंगु नेवाःभाय्या समाचार बुलेटिन प्रसारणयात छुं कारण मदयेक ने.सं. १०८५ वछला खाइसंलु लिपा दिकाबिल । अले थ्वया लिपा ने.सं. १०८० निसं रेडियो नेपालय् बाःछिइ छक्कः न्ह्याकावयाच्चंगु जीवन दबू ने.सं. १०९१ निसं लिकाल । दक्कले अजूचायापूगु -सरकारी स्वामित्व दुगु संचार माध्यमय् नेवाः भाय् व नेवाःतय् सम्वन्धी न्ह्याक्व हे महत्त्वया गुगुं ज्याभवः जूसां छुं समाचार पिमकायेगु सरकारी नीति जुल । दां पुलाः पिकायेगु विज्ञापान नेवाः भाय्या जुइवं हे उकियात अघोषित रुपय् प्रतिबन्धतयेगु तकं यात । अले पंचायत कालय् नेपालभाषा माध्यमया गुगुं

पत्रिकायात दर्ता मबीगु व दयाच्चंगु नेवाःभाय्या पत्रिकायात सरकारी स्तरया विज्ञापन पनाः आर्थिक रूपं नाकावन्दी याना बिल ।

सरकारी स्तरं थुकथं मदिक दँदं तक पक्षपात व अघोषित प्रतिबन्धया अभियान न्ह्याकावं यंकूगुलिं यानाः स्वभाविक रुपय् नेवाः भाय्या प्रसार व विकासया प्रकृयायात तच्चकं लिंकुंका बिल, गुकिया तप्यंक लिच्चः छेंय् छेंय् खँल्हाबँल्हायायेगुलिनिसें थःगु मांभाय् मस्तय्त स्यनिगुलि तकं लात । देया जनसंख्याय् नेवाःभाय् ल्हाइपिं नेवाःत छक्कलं ३७ प्रतिशतया ल्याखं म्हो जूवन । भीगु जातिया छगू मू म्हसीका व लिधँसा जुयाच्चंगु नेवाःभाय् नेवाःतय्पाखें थुकथं विचलित यानाबियागुलि उब्जेया सत्तासिनतसें सखे थः सफल जूगु तायेकल जुइमा ।

अथेला ने.सं. ११०९ या जन-आन्दोलन लिपाया राजनीतिक ह्यूपालं सरकारी संचार माध्यमय् ने.सं. १०८५ स दिक्गु नेपालभाषाया समाचार वुलेटिन व ने.सं. १०९१ स लिकागु जीवन दबूयात हानं थाय् बीगु ज्या जुइ धुंकल । उलि जक मखु खुल्ला संचार नीतिकथं चालाच्चंगु नीजि स्तरया एफ.एम. रेडियो प्रसारणयापाखें न्ह्याकावयाच्चंगु नेपालभाषाया थीथी ज्याभ्वलं आः वयाः विशेष यानाः स्वनिगः लागादुने भीगु भाषाया प्रचार प्रसारय् छगू बांलागु लिच्चः लाकाहयाच्चंगु अनुभव यानाच्चना । थ्व सन्तोषया खँ खत । तर, शिक्षा क्षेत्रया धाःसा जन-आन्दोलन लिपाया प्रजातान्त्रिक धाःगु सरकार स्वने धुंकाः मांभाय्या माध्यम आखः ब्वने मदैगु व विद्यालयया पाठ्यक्रमय् संस्कृत शिक्षा अनिवार्य यानाः नेवाःयाः नापनापं जनजाति मस्तय्त शैक्षिक ख्यलय् लिंकुंकेगु ज्या धाःसा जुयांतुं च्वंगु दनि ।

आन्दोलन व संगठनया विकास

सत्ताया स्तरं थथे योजनावद्ध ढंगं न्ह्याकावयाच्चंगु षडयन्त्रया थुज्वःगु पलाःयात कयाः गुलिखे सर्वसाधारण नेवाःतय्सं वाःचायेके मफु । उलि जक मखु सत्ताया षडयन्त्रया वातावरणनाप भ्यलेपुनेगु व धस्वायेगु नामय् उप्चःसिनं स्थितिनाप आत्मसमर्पण यानावन । अले, थःत विघटनपाखे घ्वाघ्वां यंकाः आः केवल थःगु नांया ल्यूने

चव्यावयाच्वंगु थर वा जात छगूलि जक नेवाःया चिं ल्यंकाच्वंगु दनि । थःगु मांभाय् व नेवाः संस्कृतियात त्वतावं वनाच्वंगु दु । तर, मेखे नेवाःतय् पुचलय् थुज्वःगु स्थितिया गम्भिरतायात थूपिन्सं धाःसा जुजु रणबहादुर शाह थुज्वःम्ह अतिकं निरंकुश मनूया शासन कालय् न स्वनिगःया नेवाःतय् बस्थापितयायेगु कुतलय कचिमचाया त्वहचिनाः तामाकोशी पारी वायेयकिगु ज्या जूबले नेवाःतयसं “स्वहुन प्रजाया गथे न हवाल” धकाः म्ये हालाः थःगु अभ्यन्तरया विद्रोहयात पिब्वःयेगु मत्वःतू ।

शासकतय् थुकथंया हाकुनुगःया खँथूम्ह महाकवि सिद्धिदास महाजुं उकिं उब्ले हे भी सम्पूर्ण नेवाःतय् नुगलय् चेतनाय जः ह्वलेगु मनंतुनाः “भाषा म्वाःसा जाति म्वाइ” धैगु नेवाः जातिया नितिं मूलमन्त्र हे कनाः सामाजिक व भाषिक जागरणया कुतः याना दिल । राणा शासनया खूँ जगतय् “फलया आशा त्वःता नेपालभाषाया समुन्द्रय् क्वब्बाये त्यना ” धकाः न्ह्यज्यानादीम्ह शुक्रराज जोशीजुं पाय्छि थ्वहे इलय् “हे जक मस्त दँ दँ मिखा निगलं कं कं , तुति निपां चू चु ” धकाः याःगु इनापनं अथें मखु । नेवाः समाजय् उगु इलय् भाषिक, साहित्यिक अले सामाजिक व धार्मिक ल्याखं चेतना थनेगु कुतलय कवि योगवीर सिंहया समाज सुधारया कुतः अले “जिर्ण जूगु नेपालभाषा अल्सि मचासे भिंकेनु , भारतीय शास्त्रभवनं मान थ्वैत बींकेनु” धकाः गुगु चाहना यानादिल उकिं तात्कालिन सचेत समाजया न्ह्यलंचायेकेगु ज्यायात । गुरु निष्ठानन्द वज्रचार्यजुं ललितविस्तर थुज्वःगु अतिकं महत्त्वपूर्ण धार्मिक सफू भीगु मांभासं हीकाः थःपिन्संहे छापेयानाः सफूया कथं पितबिया बीवं उकियापाखे स्तसयाना नेवाःभाय्या गद्य लेखनय् न्हू आयाम तनाब्यूगु जक मखसैं नेवाःभाय्यात धर्मया लैपुं प्रसारयायेगुलिनं तिबः बिया दिल । सत्ताया निरंकुशता अले न्हिथं थुमिगुपाखें जुयावयाच्वंगु अत्याचारयात स्वयाः मौन च्वनेगु धैर्ययाये मफयेवं ल्याय्म्ह फत्तेबहादुर सिंहजु थःगु सम्पादनय् पिदंगु नेपाली विहार सफुती गुगु भूमिका च्वयाः छगू क्रान्तिकारी भाव ब्वयादिल उकियापाखें आम नेवाःतय् नुगलय् सुपिलाच्वंगु मंकाः विद्रोहया सः पितब्युगु गथे मखु धकाः धाये ? थथे

सत्य व निर्भिक धारणा न्ह्यब्वया मनूतयूत थनेत्यंगु अपराधय् फतेबहादुरजुं सर्वस्वहरण व जेलदुने कारावासया सजाय् फयेमाःगु दुःखद् पक्ष ला मेखे दहे दु । राणा इलय् नेवाःतय् पुचलय् थःगु कथंया मौलिक अभियान न्ह्याकाः चेतनाया लहर थनेगु कुतलय् मास्टर जगतसुन्दर मल्लयापाखें छिना दीगु पलाः उज्वःगु पलाः खः गुगु पलाः धाधें धायेमाल धाःसा प्रत्येक समाजया बिकास व प्रगतिया मू आधार खः । “ थः मस्तयूत माथं आखः स्यनेगु खःसा मां भासं स्यना दिसँ ” धकाः उगु इलय् वयकलं गुगु सन्देश ज्वनाः थःगु अभियान न्ह्याकादिल मानवीय चेतना थकायेगु नितिं मदयेक मगाःगु शिक्षाया शाश्वत लंपु थ्व खः । यद्यपि मास्टर जगतसुन्दर मल्लजुं उलिमछि न्ह्यव भीत न्वानावंगु मांभाय्या माध्यमं शिक्षा बीगु ब्यवस्था थौं तक नं ब्यवहारय् छ्यलेत सरकारं पलाः मल्ल्वनि । तर, थुकथं गुलिं नं जुल, वयकःपिनि दुनुगलय् दुगु थः जाति, भाषा प्रतिया अनुराग अले चिन्ताया अभिव्यक्ति कथं ब्यैयक्तिक हैसियतं न्ह्याकूगु आन्दोलनया स्वरूपत खः धकाः भीसँ नालेमाः ।

यद्यपि, थवं थवय् जानाः पानाः अले छथासं मुनाः ज्यायायेगु नेवाःतय् जातिय् स्वभाव व प्रवृति हे खः, अथे खःसा नं तात्कालीन राजनैतिक लःफय् अले मनूतय् चेतनाया म्हतिया कारणं यानाः नेवाःतय् समाजय् सत्ताया दमनया लिच्वलं छखे विघटनया किचः जक खने दयाच्वनसा मेखे संगठनया तुयूजः उजुं सुजुं त्वया मवः । खः, नेवाःतहे न्ह्यलुवाः जुयाः थ्व इलय् नं राजनैतिक आजु पूर्वकेगु मनंतुना नेपाली नागरिक अधिकार समिति (संस्थापक-शुक्रराज जोशी, ने.सं. १०५०), महावीर इन्स्टिच्यूट (संस्थापक - चिनियालाल सिंह, ने.सं. १०५०), प्रजातन्त्र संघ (संस्थापक- प्रेमबहादुर कसाः, ने.सं. १०६७), नेपाल कम्युनिष्ट पार्टी (संस्थापक -पुष्पलाल श्रेष्ठ, (ने.सं १०६९) आदि नांया संगठनत न्ह्यःने मवःगु धाःसा मखु ।

तर, मुक्कं भाषिक अले जातिया समस्यायात कयाः पलाःछीगु कथंया संस्थाया अस्तित्व धाःसा उगु इलय् काचाक्क खने मदु । यल महाबौद्धया खरिदार जगतमान वैद्य गुम्हेसित लिपा सकसिनं धम्मादित्य धर्माचार्य कथं म्हसिकल, थ्वयकःया कुतलं भारतया

कलकत्तां ने.सं. १०४५ निसं १०५० तक नेपालभाषाया न्हापांगु पत्रिका बुद्ध धर्म व नेपालभाषा जक पिदंगु मखसं ने.सं. १०४६ या श्रीपंचमि कुन्हु नेपालभाषा साहित्य मण्डल नामं छगू संस्थाया नीस्वनेगु ज्या नं यानादिल । यद्यपि, थ्व संस्था थथे नीस्वंगु जक खने दुसा अनं लिपा छु जुल वा थुकिं थःगु ज्या गुकथं न्ह्याकेत सफल जुल धैगु छुं न्यनेकने मदु । तर, गुब्ले राणा प्रधानमन्त्री जुद्धशम्सेरं धार्मिक व जातीय संकीर्ण नीति नालाः ने.सं. १०६४स बौद्ध भिक्षुपिन्त देसं पितिन, अले पित्युपिं भिक्षुगण भारतया सारनाथय् छथासं मुन, उब्ले अथे धैगु ने.सं. १०६५ स कछलां धर्मोदय सभा नांया संस्था नीस्वनेगु ज्या जुल । खतुं महास्थविर चन्द्रमणि थुज्वःम्ह गैरनेवाःया अध्यक्षताय् स्वंगु थुगु संस्थाया मूआजु धैगु बुद्ध धर्म सम्बन्धी नेपाःदुने प्रचार प्रसार व प्रकाशन खः, तर पायछि निदं लिपा ने.सं. १०६७ कौलानिसं थ्व संस्थां नेवाःभायया माध्यमं धर्मोदय थुज्वःगु पत्रिका पिकायेवं थुकियापाखें नेपालभाषाया साहित्य छगू न्हू ईया शुरुवात नापनापं थुकिया लँपु आपालं च्वमिपिं नं स्थापित जुल । अले ला धर्मोदय सभा ब्यवहारिक रुपय् नेवाः समुदायया प्रतिनिधि संस्था कथं मनूतय्सं नालायन । नेपाःदुने थुकिया आपालं कचा स्वनाः नेवाःतय्सं थः संगठित जुइगु चाहनायात ब्याहल । नेवाःतय् दथ्वी संगठन प्रकृया थुकथं प्रारम्भ जुइ धुंकाः भारतीय भूमि कलकत्ताय् राजनैतिक कारणं निर्वासित जुयाच्वपिं प्रेमबहादुर कंसाकार व मदनलोचन सिंहपिं जानाः मुक्कं नेवाःतय् भाषा, साहित्य, लिपि व संस्कृतियात थःगु लागा दयेकाः ने.सं. १०७० स्वांयापुन्हि कुन्हु च्वसापासा स्वन । गुगु संस्था थःगु गौरवमय् इतिहासयात ल्यंकाः थौं नेवाःतय् दथु अभं न्ह्यानावं च्वन । थ्वया लिपा देसय् राजनैतिक ह्युपाः वयेधुनेवं नेपाःदुनेहे कविकेशरी चित्तधर “हृदय”जु, मास्टर लोकमान सिंह, प्रिन्सिपल भैरवबहादुर प्रधान आदिपिनि कुतलं नेपालभाषा परिषद् थुज्वःगु महत्वपूर्ण संस्थाया जन्म जुल । थ्व संस्थानं थौं तक उलि हे सृजनात्मक पलाः न्हकाः भी न्ह्यःने धस्वानावं च्वंगु दु । थ्वया लिपा नेवाःतय्सं थः दुनेया भाषा व जातीय अनुरागयात ब्याः छगू लिपा तःगु संस्थात चायेकाः संगठित पलाः न्ह्याकायंकल ।

भाषिक व साहित्यिक संस्था जक मखु ने.सं १०७५ पाखे वयाः नासःखलः थुज्वःगु मुक्कं सांस्कृतिक संस्था नं नेवाःतयसं जन्म बिल । थौं भी दथुइ नेवाः साहित्य, संस्कृति अले भाषा जातिया सम्बन्धय् प्राज्ञिक स्तरया ज्या न्ह्याकीगु नेपालभाषा एकेदमि (ने.सं. १११३) निसें कयाः नकतिनिया मस्तयूत भाषिक शिक्षा बीगु जगतसुन्दर ब्वने कुथि (ने.सं. ११११) तकया संगठित स्वरूप धस्वानाच्चंगु दु । अले नेवाः समुदाय दुने नं थःगु कवःया भियायेगु तातुनाः स्वनातःगु नेपालभाषा मिसा खलः , केन्द्रीय मानन्धर संघ, पुं समाज, नकःमि समाज, तण्डुकार समाज, बज्राचार्य गुथि, उदाय समाज, खडगी समाज, ज्यापु महागुथि व थुज्वःगु जातिय गुथिया मंकाः दबू नेवाः महागुथि निसें मुक्कं भीगु मौलिक लिपिया संरक्षणया नापनापं प्रचार प्रसारयायेगु भाला क्वबियावयाच्चंगु नेपाल लिपि गुथि (ने.सं. ११००) नं दु । रेडियो प्रसारणयात संस्थागत रुपय् विकासयायेगु तातुनाः नेवाःतयसं ज्वज्वलपा प्रा. ली. स्वनातःगु दु । अले भीगु पुलांगु अले मौलिक लोक साहित्यया अध्ययन व अनुसन्धानया नापनापं संरक्षणया नितिं नेपाल लोक साहित्य परिषद् (ने.सं. ११०५) न्ह्यानाच्चंगु दु । अले, नेवाःत स्थानीय कथं जक मखु राष्ट्रिय स्तरय् संगठित जुइमाः धैगु वाःचायेकाः ने.सं १११६ स नेवाः दे दबूया नामं छगू साकार रुप बीगु ज्या जुल । थ्व सकतां भी नेवाःतय् संगठित जुयाः न्ह्यायेगु चाहनाया ब्यवहारिक अभिव्यक्ति खः ।

लुमंकेमाःगु खँ छु धाःसा नेवाःतं थथे थीथी संस्थायादुने संगठित जुयाः छम्ह साहित्यिक स्रष्टा वा छम्ह भाषासेवीया नामय् क्वथा प्वालयदुने लिकुनाः केवल थःकथं च्वसा न्ह्याके धुनेवहे दायीत्व फुत धकाः जक च्वनामच्चं, बरु सत्तायापाखें थःगु जाति, भाषाया विरुद्ध जुयावयाच्चंगु अत्याः,अन्याः व दमनया विरोधय् निरन्तर रुपय् पलाःत च्वयेकावं वयाच्वन । बरु, खःका थुज्वःगु गुगुं पलाखें छगू आन्दोलनया रुप काल सा गुलिं केवल इतिहासया धलकय् दुध्याकैथें जक जुयाः क्वचाल । च्वसापासापाखें ने.सं. १०७३ सिल्लाथ्व ८, ९ व १० स्वन्हु यंक यें, हनुमानध्वाखा लाय्कूया नासःचुकय् गुगु ऐतिहासिक साहित्य सम्मेलन जुल नेवाःभाय्या ख्यलय् जक मखु नेपाः अधिराज्यदुने हे

साहित्यिक गतिविधियात थथे लाछि वा चुकया चकं थासय् न्ह्याकेगु न्हू परम्परायात स्वना बिल । च्वसापासाया थ्वहे ज्याभ्वलं प्रभावित व प्रेरित जुयाः साहित्य सम्मेलनया क्रम छगू आन्दोलनया रुपय् न्ह्यात । पायछि निर्दलीपा नेपालभाषा विकास मण्डलया ग्वसालय् नेपाःया इतिहासया मेगु न्हू पलाः कथं दक्कले न्हापांगु नेपालभाषा महिला साहित्य सम्मेलन जुल । अले, ने.सं. १०७६ थ्यंबले पद्मोदय हाईस्कूलया विद्यार्थीतय्सं न्हापांगु अन्तर हाईस्कूल नेपालभाषा साहित्य सम्मेलनया ग्वसाः ग्वयाः थ्वया लिपा दैय् दसं स्कूल स्कूल पतिकं थुज्वःगु सम्मेलनया भवः न्ह्याकल । अले ने.सं. १०८० निसं ला थुकथं दैय् दसंया सम्मेलनया ज्याभवः कलेज स्तरय् नं न्ह्याकेगु अभियान त्रि-चन्द्र कलेजया नेपालभाषा साहित्य पालापाखें जुल । स्कूल व कलेज(क्याम्पस) स्तरया थुकथं साहित्य सम्मेलनया अभियान थौं तक मदिक न्ह्यानावं च्वंगु दु । नेपालभाषाय् जनसाहित्य ब्वलंकेगु ताःतुनाः ने.सं १०८२ निसं ख्वपया प्रगतिवादी पुचलं न्ह्याकुगु विराट नेपालभाषा साहित्य सम्मेलन व ख्वपयाहे मेगु पुचलं ने.सं. ११०२ निसं स्वंगु नेपालभाषा साहित्य तःमुँज्या गुकिया क्रम थौं तक नं उगु हे गतिं न्ह्यानाच्वंगु भीसं खनाच्वना । थ्व सकतां वास्तवय् नेवाःतय्सं भाषिक अधिकार व मान्यताया निति थःगु कथं न्ह्याकावयाच्वंगु आन्दोलनया थीथी स्वरुपत खः धकाः मधासैं मगाः । संभवत उकिंहे जुइ नेपालभाषाया माध्यमं साहित्यिक ज्याभवः न्ह्याकावयाच्वपिं विराटया ग्नुत सरकारया मिखाय् सदां सत्ताया शत्रु वा प्रतिपक्षथें जक च्वन , अले ने.सं. ११०९ कछलागाः ११ कुन्हु छकू बहाःदुने शान्तिपूर्क व संयमित कथं साहित्यिक रचनाया पाठयानाच्वपिनि छचनय् प्रहरीया कथि अकारण मूवल । विराटया तात्कालिन नायः भाजु रत्नगोपाल सैजुया नापनापं आपालं प्रहरी हिरासतय् लात । दैय् दसं मोहनि भाः जुयावयाच्वंगु विराट व तःमुँ ज्याया साहित्य सम्मेलन यायेगुलि तकं निषेधित जुल । विराटयापाखे साँस्कृतिक ज्याभवःया दबुली “सन २०००” ख्यालः क्यपिं सकल ख्यालःम्वःपिं व च्वमियात समेत ज्वनाः प्रहरीं कुनेगु ज्याजुल ।

शायद ने.सं. १०८० लिपा देसय् संसदीय ब्यवस्था

विघटनयानाः जुजु महेन्द्रं न्ह्याकावयाच्चंगु निरंकुश शासन विरूद्ध उगु इलय् जनताया थःगु नुगःदुनेया असन्तोष व विरोधयात प्वकेगु मेगु वैध गुगुं नं लँपु मदुगुलि यानाःनं थथे अनेक नांया साहित्य सम्मेलनया दबू ग्वयाः दँवयेगु प्रचलन उप्चयावं वंगु खइ । मखुसा, पंचायती सरकारं ने.सं. १०८५ बछला खाइसँल्लुनिसँ रेडियो नेपालया समाचार प्रसारणया नेवाः भाय्या वुलेटिनयात दिका ब्यूबलेनं उकिया विरोधय् नेवाःतय्सं मंकाः कथं ग्वःगु दबू नं साहित्य सम्मेलनया दबू जुया मबीगु जुइ । अथे खःसा नं शनिवाः पतिकं स्वनिगःया त्वाःत्वाल्य् दच्छि यंक न्ह्यानावंगु साहित्य सम्मेलनया थुगु आन्दोलनं छु खँ स्पष्ट यानाब्यूगु दु धाःसां नेवाःतय्दुने तज्यायेत स्वयाच्चंगु मिजला दु । थुज्वःगु मिजलाःया जः थःथःपिनि कविताया माध्यमं ग्वाकेगु स्वःबले यलया भाजु मंगलमान शाक्य सुरक्षा कानून अन्तर्गत गुला तक जेल दुने क्वचिने माल । यँया श्रीकृष्ण “अणु “ या फलेचिया वादशाह व बुँख्याःचा कविता व यँया ओमबहाःया मेम्ह मंगलमान शाक्यया मल्ला थें पालूगु न्वचूया कारणं वयकःपिं लां लां तक भूमिगत जीवन हनेत वाध्य जुल । नेवाःतय्त सत्तायापाखें जुयावयाच्चंगु पक्षपात व अन्याःया कारणं थःगु नुगलय् बुयावयाच्चंगु विद्रोहया सः थ्वयेकाः थ्व इलय् जेलय् वनेमाःपिं गुलिनं दु उपिं सकलें नं थथे हे साहित्य सम्मेलनया दबुली दंवःगुया सजाय् फयेमाःपिं जक खत । ने.सं. १०८२ स सुरक्षा कानून अन्तर्गत ज्वनाः न्यवः न्ह्याकाः कुपिं सूर्यबहादुर पिवाःजु व लक्ष्मण राजवंशीजु छम्ह पद्मकन्या माध्यमिक विद्यालयया ग्वसालय् जूगु साहित्य सम्मेलनय् दनादीम्ह खःसा मेम्ह वटु ,यँया त्वाल्य् जूगु साहित्यिक व संगीत सम्मेलनया दबुली पिलूम्ह खः । ने.सं. १०८८स पंचायती शासनयापाखें सुरक्षा कानून अन्तर्गत कुंकेमाःम्ह भिक्षु सुदर्शन त्रि-चन्द्र कलेजया वाणिज्य विभागया विद्यार्थीतय्पाखें जूगु साहित्य सम्मेलनया दबुलीं दनाः नेपाली भाय् व नेपालभाषाया दथुइ सरकार यानावयाच्चंगु पनपक्षयात कयाः पतिं धस्वाकादीम्ह खत । अथेहे प्रहरीया हिरासतय् शारिरिक व मानसिक यातना तकं फयेमाःम्ह हितकरवीर सिंह कसाःजुनं ने.सं. १०९३ स ख्वपय् जूगु विराट नेपालभाषा साहित्य सम्मेलनया दबुली दनादीम्ह खः ।

आन्दोलनया रुपय् नेवाःतय्त छथासं मुंकाः साहित्यिक कथं जुइमा वा मेकथं सम्मेलन यायेगुलि नेपालभाषा परिषदया ग्वसालय् १९९१ सिल्लागाः ११ व १२ निन्हुयंक राष्ट्रिय सभागृहस जुगु “नेवाः जाति व भाषा विषयक तःमुँज्या” छगू विस्कंगु कुतः खत । संभवत् स्वनिगःपिनेया थीथी जिल्लाया सकल नेवाःतय्त छथासं मुंकाः नेवाः जाति व भाषाया सम्बन्धय् सहलह ब्याकाः छगू रणनीति दयेकेगु ज्या नेवाःतय् इतिहासय् दक्कले न्हापां जुगु ग्वसाः खः थ्व । थ्वहे सम्मेलनया कुतलं दे न्यंकया नेवाःतय्के “भीी नेवाः” धैगु भावना थनाब्यूगुलि सन १९९१ या जनगणनाय् सीदयेक नेवाः जनसंख्याया ल्याखय् सुधार जूवल ।

थथेहे नेपाल संवत् १९९५ कउलागाः ७ व ८ निन्हु यंक दे न्यंकया नेवाःतय्त छथासं मुंकाः याःगु राष्ट्रिय सम्मेलनयापाखें थौंया भीगु नेवाः दे दबू थुज्वःगु नेवाःतय् राष्ट्रिय स्तरया संगठनयात जन्म बीगु ज्या याःगु खँ लुमंके बहःजू ।

थ्व सकतां नेवाःतय्सं थःगु जातिय व भाषीक अस्मिता ल्यंकातयेगु नितिं थःगुहे कथं न्ह्याकावःगु आन्दोलनया थीथी रुप खत । थुकथंया संगठित आन्दोलन गुलित ब्यापक व गुलित सफल खः धैगु पक्षयात कयाः आपालं खँल्हाये थाय् मदगु मखु , तर थुपिं भीगु कुतःया निरन्तरताया चिं मखु धकाः धाये थाय् मदु ।

मंकाः खलः व नेपाल संवत्तया आन्दोलन

हिलावंगु राजनैतिक व सामाजिक अवस्थाया लःफय् कथं नेवाःतय्सं गुब्ले नेपाल राष्ट्रिय विद्यापीठ, गुब्ले श्री ५ या सरकार, शिक्षा मन्त्रालय व त्रिभुवन विश्वविद्यालय लुखाय् ब्वांजुयाः नेपालभाषायात शिक्षाया ख्यलय् क्वनिसैं च्वय् थ्यंक दुथ्याकिगु पलाः नं न्ह्याकुगु दु । अले थुकिया लिच्चः कथं स्कूल , क्याम्पसय् जक मखु एम.ए.निसैं पीएच.डी.या स्तरय् तकं नेपालभाषा कयाः ब्वनेगु ब्यवस्था जुइ फत । थथे थःगु समाजय् चेतना थनेगु चाहनाय् नेपालभाषा पत्रिका, राजमति, इनाप, विश्वभूमि, न्हू विश्वभूमि, सन्ध्या टाइम्स, नसना, देसय्मदु भ्याः व स्वनिगः थुज्वःगु समाचार पत्र-पत्रिका

पिकायेगु कुतः नेवाः सचेत पुचलं यानावं क्यन । यद्यपि थुकि मध्ये गुलिखे पत्र-पत्रिकात आः पिदनाच्चंगु अवस्थाय् मदु । अथेहे संचारया थीथी माध्यमं मनूतय्त नुगलय् भाषिक अनुराग, जातीय गौरवया भावना थनेगु कथं थःगुहे साधन व श्रोतया लिधँसाय् सिलु, राजमति, पःखाः थुज्वःगु फिचर फिल्म व चिपनिप, सर्वाथसिद्ध, चरित्र, न्हिलान्हिला हुं , निपाः ख्वाःपाः आदि भिडिओ फिल्म निर्माणया ज्या नं न्ह्याकुगु दु । अले इल ब्यलय् ख्यालः कासा, छ्वाः पाखँकासा, न्ह्यसः लिसः कासा, संगीत सम्मेलनया ग्वसाः ग्वयाः , थीथी कथंया म्ये क्यासेट सीडीचाः पितबियाः नेवाःतयसं थःगु कला संस्कृतियात ब्वयेगुया नापनापं विषम युगया फसं थःगु जातिया साँस्कृतिक सम्पदा न्हना मवनेमा धकाः फुफु कथंया पलाः च्वयेकावयाच्चंगु दु । थुपिं सकतांयात नं छगू अर्थय् आन्दोलन कथं नाले मज्यूगु मखु ।

खः, नेवाःतय् थुकथंया कुतः वा आन्दोलनया क्रम गुब्ले प्यान्हुल जुइ, अले गुब्ले उलि व्यापक व प्रभाकारी नं मजुल जुइ । अथेखःसां त्यान्हुचायाः दिपाः काःगु धाःसा मदु । यदि दुवालाःस्वल धाःसा नेवाःतय् थुकथंया पलाः थथे थथ्याःक्वथ्याः जुयाः, म्वयेम्वयेद्याक न्ह्यायेमाःगु छता प्रत्यक्ष कारण देया राजनैतिक वातावरण व सत्तां नालाच्चंगु नीति नं खः धकाः मधासैं मगाः । भीसैं खनाच्चना गुब्ले देया सत्ता कयेकुन, उब्ले भीगु जाति दुनेया थीथी पलाःत नं उकथं हे लिक्कूगु दु, गुब्ले देसय् राजनैतिक वातवरण चकन उब्ले सीदयेक भाषिक, साहित्यिक, साँस्कृतिक व जातिगत ज्या बांलाक च्वःगु जक मखसैं तब्या जुयाः न्ह्यज्याःगु दु । संभवत् थ्व छता आम मनोवैज्ञानिक कारणहे खः । उकिहे जुइ, देसय् ने.सं. १०९९ स विद्यार्थीतय्सं न्ह्याकूगु आन्दोलनया लिच्वः कथं जुजुयापाखें निर्दल वा बहुदल शासन प्रणाली मध्ये छता ल्ययेगु निती जनमत संग्रहया घोषणा जुयाः छगू राजनैतिक वातावरणय् चकं पंहःवयेवहे तार्निसें चकने मखीपिं नेवाःत नं चकनेत स्वल । अले थथे चकनेगु कुतलय् थुब्ले नेवाःतय्सं ल्ह्वंगु सकारात्मक पलाः धैगु नेपालभाषा मंकाः खलः स्वनेगु कुतः खः । ने.सं. १०९९ दिल्पापाखे यें, क्षेत्रपाटीया चाकला दबूया कुतलय् स्वनिगःया तःधं, चीधं नेपालभाषा सम्बन्धित खलः पुचः आदियात

छथासं मुकाः सकलं नेवाःतय् छगू मंकाःगु संस्था मंकाः खलः स्वनेगु ज्या जुल । यद्यपि मंकाः खलकं न्हापांगु तःमुंज्या यानाः थःत वैधानिकताया रुप वीगु ज्या ने.सं.११०९स तिनि जुल । नेपालभाषा व जातिया मान्यता व अधिकार अले देया फुक्क भाषाया समानताया मू नारा बियाः न्ह्यःने वःगु थ्व मंकाः खलकं थःगु जन्मया पायछि लच्छि लिपाहे देसय् दक्कले न्हापां विविध भाषाभाषीतय् आमसभा यँया जनबहाःदुने ग्वसाःग्वयाः थःगु अस्तित्व पितब्वल । मंकाःखलकं यायेमाःगु वा यायेफुगु आपालं ज्याखँ दु, अथे हे थुकिं आः तक न्ह्याकावयाच्चंगु थीथी पलाखय् मंनूतय् थःथः कथं लिच्चःक्यनेगु थाय् नं मदुगु मखु, तर, भाषिक समानता अले नेवाः जाति, भाषा, संस्कृतिया अधिकार व सम्मानया नितिं व राज्यया साम्प्रदायीक संकीर्ण नीतिया विरुद्ध थीथी पलाः ल्ह्वनेगु भवलय् सत्तायापाखें जुयावयाच्चंगु दमन व ख्याच्चःया छुं च्यूताः मकासैं थौं तक थ्व खलः न्ह्याना वयाच्चनेफुगु हे थ्वया छता बिस्कं स्वरुप खः ।

भीसँ लुमं मंकाः खलःया ज्याखँ क्वथले कथं वा पने कथं ११०० ने.सं.बछलाथ्वः १२ कुन्हुया सरकार विरोधी जुलूस पिथन धकाः उल्लेया मंकाः खलः दांभरिं मदुम्ह भाजु काजिलाल श्रेष्ठयात विना पूर्जी कुने यंकल । थ्वया दच्छि लिपा अथे धैगु ने.सं ११०२ न्हूदँया आमसभाय् नेपाल संवत् राष्ट्रिय संवत् धकाः नारा ब्यूगु साम्प्रदायीक जुल धकाः खलःया नायः भाजु पद्मरत्न तुलाधरयात कुना बिल । उलि जक मखु खलःया ग्वसालय् ने.सं. ११०७ व ११०९ या न्हूदँया लसताय् जूगु पुचः ब्वाज्या (**Mass Running**) या दथुइ निर्ममपूर्वक लाठीचार्जयानाः आपालं सहभागीतयत ज्वन । अले, पंचायतया निरंकुश कालय् सत्तायापाखें भी महाकवि सिद्धिदास महाजुया बुन्हिया लसताय् दँय् दसं यंलागाः द्वितीया कुन्हु सुथय् जुयावयाच्चंगु मंकाः खलःया नसंचा उलेगु ज्याभवःयात प्रहरीयापाखें पनाः मकाः खलःया उल्लेया न्वकू कवि दुर्गालाल श्रेष्ठ , छयाँज्ये मल्ल के. सुन्दर नापनापं मस्तमिस्त व बुरापिं नापं सच्छिसिबें उप्चःसित ज्वन । मंकाः खलःया संघर्षशिलता हे थ्वया छता विषेशता खः थ्व ।

नेपाल संवत् ११०० न्हूदँ क्यंगु लसताय् म्हपूजा कुन्हु थ्व

खलकं ग्वसाः ग्वःगु तःजिगु साँस्कृतिक जुलुस, सकल नेवाःतय् नितिं तसकं तःधंगु सार्वजनिक प्रदर्शनया न्हापांगु अनुभव जक जुयामबिसें आम नेवाःत सतकय् कुहाँवयाः थःगु नुगःदुने दुपिनाच्वंगु जातिय अनुराग ब्वयेगु थुकिं छगू अवसर चूलाकल । थुकिं खने दयेक हे नेवाःतय् चेतनायात कुलेगु व चिच्चाःदनाच्वपिं नेवाःतय् फुफु थें संगठित जुइगु ज्याय् ग्वाकेगु ज्यायात । छखे थःगु जातिय अभिमान व परिचय ब्वयेगु छगू मंकाः लंपु चूमलानाच्वपिं सकल नेवाःतय् नितिं नेपाल संवत् न्हूदँया भिंतुना ज्याभवः हनेगु उकथंया वांलाःगु अवसर जुयाबिलसा मेगु थ्व नेपाल संवत् भी नेवाःतय् मौलिकताया परिचय खः, थ्वैत भी सकसिनं थः नालाः हनेमाः धैगु नेवाःतय् वाःचायेके बियाः छथासं मुंकेगु व संगठित जुइगु लंपु चूलाका बिल । अले सीदयेक ने.सं. १९०० लिपा स्वनिगः पिनेया नेवाःत नं थथे संगठित जुइगु क्रम वीरगंज नेपालभाषा खलःयापाखें शुरु जुल । थ्वया लिपा हेटौँडा, नारायणगढ , विराटनगर, धरान, जुजुं पोखरा , वागलुङ्ग, नेपालगंज, धनगढी आदि नेपाःदुने जक मखु नेपालपिने भारतया दार्जिलिङ्ग, सिक्किम, कालिम्पोङ्ग, अले संयुक्त राज्य अमेरिकाय् थ्यंक नेवाः खलः पुचः स्वनेगु ज्या जुल । थुज्वःगु ज्या गनं मंकाः खलःया प्रत्यक्ष ग्वहालि व सल्लाहया लिधँसाय् सा गनं केवल थ्वया हःपाः कयाः स्थानीय मनूतय् सक्रियताय् नेवाःतय् संगठन स्वनेगु जुयावं वन । थुकिया लिच्वः खः, थौं भीसँ खनाच्वनागु स्वनिगःपिनेया जक न्यागू दर्जन सिवें उज्वः नेवाः संगठनया अस्तित्व !

नेवाः आन्दोलनया न्हू लंपु

खतुं भीगु भाषा व जातिया थौं थन थ्यनाच्वंगु आन्दोलन छगू लिपा मेगुया निरन्तरता व विकसित स्वरुप खत । समग्र भीगु आन्दोलनपाखें बिस्कं मखु ।

भीगु भाषिक आन्दोलनया दबुली खास यानाः १०८५ या शनिवाः पतिकया साहित्य सम्मेलनया भवलय् दबुली दनीपिन्सं इलय् ब्यलय् नागरिकतय् हक, अधिकारया खँ ल्हानाः राजनीतिक रङ्ग बीगु कुतः मयाःगु मखु । अले खास यानाः ख्वपया विराट गुथि व

तःमुँज्याया साहित्य सम्मेलनया दथुनं जनताया अधिकारया सः थ्वयेकाः राजनीतिक उद्देश्य पूर्वकेगु कुतःत मयागु मखु । अथे जूसां नेवाःतयगु जातिय व भाषिक समस्यायात मुक्क नागरिक अधिकारनाप स्वानाः थुगु आन्दोलनया मात्र साहित्यकार वा च्वमि वर्गपिनिगु भालाया विषय खः धैगु मान्यताया पःखालं पितहयाः सर्वसाधारण नेवाःतय दथुइ तक्क थ्यंकाः चकंकेगु कुतः नेपालभाषा मंकाः खलः ने.सं. १०९९ स स्वनेवं उब्लेया नेतृत्व वर्ग “देया सकल जाति भषायात समान अधिकार दयेमाः ” धैगु समतावादी सः थ्वयेकाः शुरुयाःगु खः । थ्वहे न्हूगु कुतः कथं नेवाःतयपाखें दक्कले न्हापां ११०० बछ्लाथ्वः १२ कुन्हु मंकाः खलःया ग्वसालय् “भाषिक समान अधिकार”या मागयासं तात्कालिन साम्प्रदायीक सत्ताया विरोधय् जुलुसय् कुहाँ वयेसयेकल । नेवाःतयसं न्ह्याकावयाच्चंगु आन्दोलनय् थ्व छगू न्हूगु पलाः व न्हूगु लँपु खत । यद्यपि थ्व कुतलय् उघिमय् गुगुं विशेष लिच्चः खनेमन्त थ्व मेताहे खँ जुल । तर, उब्ले मंकाः खलकं थ्वयेकूगु “देया सकल जाति भषायात समान अधिकार दयेमाः ” धैगु समतावादी सलं देया मेमेगु भाषाभाषी व जातियापिं मनूतयत् भाषिक आन्दोलनय् सकलें मंकाः कथं छगूहे संगठनय् संगठित जुइगु वातावरण ब्वलंका बिल । अले नेवाःतयगुहे विशेष कुतलय् देया थीथी जाति भाषाभाषीपिन्त छथासं मुंकेगु न्हापां न्हापांगु कुतः कथं नेपाल मातृभाषा परिषद व सर्वजातीय अधिकार मञ्च स्वनेगु जुल । नेपाल जनजाति महासंघ थौंया साकार रुप कायेत थ्व सकतां कुतः सीदयेक छगू पूर्वतयारी वा पूर्वाधार जूवन । नेवाःतयसं न्ह्याकावयाच्चंगु भाषिक आन्दोलनया हःपालं देया मेमेगु जाति व भाषाभाषीपिन्त नं थःथःगु समुदायया विकास, संरक्षण, सम्बर्द्धन व अधिकार प्राप्ति तातुना न्ह्यज्यायेगुलि चायेकं वा मचायेकं सकारात्मक लँपु चायेकाबिल । तःदँ न्ह्यव नेवाःत अले छगू निगू मेमेगु भाय्या मनूत जक थःगु कथं भाषा आन्दोलनया ख्यलय् पलाः न्ह्याका वयाच्चंगु भ्वलय् आः वयाः सकलें ऐक्यबद्ध कथं सः थ्वयेकेगु वातावरण तयार जुल । नेपाःयाहे मुक्क भाषा जाति आन्दोलनया थ्व छगू सकारात्मक न्हू पलाः खत ।

ने.सं. ११११ पाखे देसय् पुनर्स्थापित संसदीय व्यवस्थाय् न्हूगु

सरकारला स्वनेगु ज्या जुल, तर थुज्वःगु प्रजातान्त्रिक धाःगु सरकारं नं शैक्षिक ख्यलय् “अनिवार्य संस्कृत” पाठ्यक्रम क्वचिनेगु ज्यायायेवं उकिया विरूद्ध विशेषतः नेवाःतय्गु सक्रियताय् न्ह्याकूगु सतक आन्दोलनपाखें छक्कः हानं देया मेमेगु जनजाति व भाषाभाषीपिं नापं मंकाः कथं पलाः न्ह्याकेगु अवसर नेवाःतय् चूलात । खास यानाः नेपाल जनजाति महासंघनाप जानाः भाषिक अधिकार प्राप्ति या आन्दोलनयात संगठित रुप बियाः न्ह्याकेगुलि नेवाःतय् निंतिं थ्व छगू बांलागु अनुभव जूवन । ने.सं. १९९६ स श्री ५ या सरकारं रेडियो नेपाल संस्कृत भाय्या समाचार वुलेटिन प्रसारणयाःगुया विरोधय् जूगु सतक आन्दोलनय् नेवाःत मेमेगु जनजातिलिस्से जानाः मंकाः उद्देश्यया निंतिं ज्यायायेगु लँपु चाल । वास्तवय् नेपाःदुनेया भीषक व जातिय समस्या गुगुं छगू जाति विशेषया जक समस्या मखसें देया सकल उपेक्षित भाषाभाषीपिनि मंकाः च्यूताःया विषय जुगुलिं थुगु आन्दोलनया उक्तं मंकाः आन्दोलनया रुप बिया न्ह्याकेगु आवश्यकता खः । छगू लिपा मेगु संघर्ष व आन्दोलनया भवलय् नेवाःतय् मेमेगु भाषाभाषी व जनजातितनाप दयावंगु बांलागु स्वापुया कारणं नेवाः आन्दोलनय् मेमेगु जाति भाषाया मनूतय्गु दुरयंगु सहयोग व समर्थन प्राप्त जुजुं वनाच्चंगु जक मखसें भी नेवाः आन्दोलन धैगुनं समग्र नेपाः राष्ट्रया भाषिक व जातिय मुक्ति आन्दोलनया छगू अभिन्न अङ्ग कथं विकसित जुइत स्वयाच्चगु खत ।

सकसिनं स्यूगुहे खँ खः , भाषा सम्बन्धी सर्वोच्च अदालतय् जूगु मुद्दाय् गुब्ले न्यायाधीश हरिश्चन्द्र प्रसाद उपाध्यायया याकःचिया इजलासं अन्तरिम आदेश जारीयानाः स्थानीय निकायदुने नेपालभाषा छचलेमदु धकाः पनेगु अतिकं साम्प्रदायीक ज्या यात उब्बेनिसें नेवाःतय् दुने छगू आक्रोशया स्थिति जक ब्वलंगु मखसें उकिया विरोधय् न्हू कथंया आन्दोलनया वातावरणनं तयार जूवन । उक्तिसिनं १९९९ तछलाथ्व २ (१९९९ जुन १) कुन्हु सर्वोच्च अदालतया डिभिजन वेञ्चया न्यायाधीशपिं टोपबहादुर सिंह व कृष्णजङ्ग रायमाभीपिन्सं भाषा सम्बन्धी उगु मुद्दाय् नेपालभाषायात स्थानीय निकायस छचलाबुलायाये मदइ कथंया अन्तिम निर्णय बी धुंकाः नेवाःतय्सं

आःतकया आन्दोलनयात संवैधानिक अधिकार प्राप्तिया आन्दोलनया रुपय् विकसितयायेगु आवश्यक तायेकल । सम्पूर्ण अधिकारया श्रोत जुयाच्चंगु देया कानून अर्थात थौया संविधानहे त्रुटीपूर्ण व थुकिदुनेया थीथी प्रावधानयापाखें भीगु भाषिक व जातिय अधिकार पूर्णरूपं प्रत्याभूत जुइ मफयाच्चंगु वाःचायेकाः थुज्वःगु विभेदपूर्ण वर्तमान संविधान व दुगु सकतां कानून संशोधनया सःतसें नेवाः आन्दोलनया पलाः न्ह्याकेगु वाध्य खत । अले, नेपालभाषा संघर्ष समिति थुज्वःगु छगू मंकाः मोर्चा नीस्वनाः ने.सं. १९९८ चउलाखः ४ कुन्हुनिसें नेवाःतय् न्हू कथंया सतक आन्दोलन न्ह्यज्यात । संवैधानिक अधिकारया सःथ्वयेकाः न्ह्यज्यागु थ्व आन्दोलनया भ्वलय् स्वनिगःदुने विरोध जुलुसुऱ्याली, धर्ना, आमसभा तःगु जुल । अले, थुगु आन्दोलनया विशिष्ट स्वरुप कथं १९९९ यंलाखः ५ (१९९९ सेप्टेम्बर १५) कुन्हु नेवाःतय्सं न्ह्याकावयाच्चंगु आन्दोलनया इतिहासय् दक्कलें न्हापां स्वनिगः बन्द थुज्वःगु विरोध ज्याभवः तःजिक व व्यापक जनसहभागिताय् वञ्चाल । भाषिक अधिकार संयुक्त अधिकार समितिया मंकाः इनापय् जूगु थुगु बन्द ज्याभवलय् नेवाःतय् नापनापं मैथिली, तामाङ्ग, राई, लिम्बु जातिया मनूतय् तःजिगु ग्वहालि व सहभागि दत धाःसा नेपाल जनजाति महासंघदुनेया थीथी जनजाति संघ संस्थातयपाखेंनं व्यापक समर्थन मुंकेफत । प्रहरी व प्रशासनया ख्याचः व दमनया दथुइ नं तःजिक क्वचाःगु “स्वनिगः बन्द” या भ्वलय् तःम्ह मनू ज्वन, कुन, घाःपाः जुल । अले यैय् संघर्ष समितिया दुजः नविन चित्रकारनापं केशवमान चित्रकार, ज्ञानु श्रेष्ठ व थक्वाःयापिं श्याम श्रेष्ठ, पशुपति गोपाली, विकास श्रेष्ठ, सुरेश गौतम, काँइला गोपाली व अशोक गुरुङ्ग अथेहे यलया आकाश महर्जन, आनन्द माली, ईश्वर माली, हरि प्रसाद चौधरी, गंगाराज स्याङ्गताङ्ग, राज कुमार कार्की, दिल बहादुर परियार, कृष्ण महर्जन, अलेन महर्जन व उज्वल जोशीयात सार्वजनिक अपराध ऐन अन्तर्गतया मखुगु मुद्दाया तारीखय् तक्कंकाः दुःखबीगु व्यवहार प्रजातान्त्रिक धाःगु सरकार नं यात । वयकःपिं बाहेक बन्दया भ्वलय् ज्वपिं मध्ये मंकाःखलःया नायः पद्मरत्न तुलाधर, नोर्बु लामा, रामबहादुर खड्का, मुक्तिनाथ फुयाल, कविन्द्र गिरि,

अमरनाथ गुप्ता, श्यामबहादुर मगर, मदनगोपाल रञ्जित, विश्वकिरण शाक्य, इशवरलाल श्रेष्ठ, श्यामकाजी श्रेष्ठ, हरि श्रेष्ठ, सुमन साही, सानुभाइ डगोल व गणेशप्रसाद श्रेष्ठयात धाःसा छन्हु निन्हु जक कुनाः अर्थे त्वतल । नेवाःतयसं दँदँ न्ह्यवनिसँ न्ह्याकावयाच्वंगु भाषिक व जातिय अधिकारया आन्दोलन थौं वयाः मूलतः नेपाः अधिराज्यया नेवाः नागरिकतय समानताया अधिकारया न्ह्यसः जुयाः दंवयाच्वंगु दु । नेवाः नागरिकतय मौलिक अधिकार प्राप्तिया आन्दोलन कथं तब्या जुयाब्यूगु दु । उकिं थ्व आन्दोलन आः वयाः बुलुहुँ सकल नेवाःया च्यूताःया विषय जुजुवःगु दु । दलीय कचवं व राजनीतिक विचाःया पःखाः हाजांगायाः सकल नेवाःतय छगू मंकाः विषय कथं तब्या जुइगु कुतलय नेवाःतय आन्दोलन ब्वलनिगु वातावरण तयार जुजु वंगु दु ।

तःगु त्वाःथः गये धुंकाः, अले आपालं दुवाःत पुलेधुंकाः नेवाःतय आन्दोलन थौं वयाः छगू निश्चित स्वरूप कायेत स्वःगु दु । खतुं नेवाःतयसं इतिहासय दक्कले न्हापां थःगु भाषिक आन्दोलनया माग छु खः धकाः देया शासकतय न्ह्यःने न्ह्यःब्वयेगु कुतः १०८२ थिंलापाखे अन्तर कलेज नेपालभाषा साहित्य पालाया कुतलय जूगु खः, शिक्षा मन्धालयपाखें भूगु नेपालभाषायात “नेवारी” धकाः धायेगु नीति नालेवं उकिया विरोधय जुजु महेन्द्रयात नेपालभाषा भाषीपनिपाखें न्यागू बुंदाया विन्तीपत्रतयेगु क्वःछयूगु खः । गुकिया नितिं पालाया नायः हितकर वीरया नेतृत्वय छगू प्रतिनिधि मण्डल जुजुयाथाय वनेगु ग्वसाः खः । तर लिपा गथे जुया खः केदारमान “व्यथित”, प्रेमबहादुर कसाः व सत्यमोहन जोशी स्वम्हं जक जुजुनापलायेगु ज्या जुल । जुजुयात नापलापिन्स भूगु मांभाय्यात “नेवारी” मध्यासँ नेपालभाषायहे धायेमाःगु, माभासं शिक्षा बीकेमागु व नेपालभाषाया विकासया नितिं सरकारी स्तरं आर्थिक ग्वहालि दयेमागु माग न्ह्यब्वःगु खःसां जुजुया पाखें लिसलय गुंगुं सकरात्मक खँ मवल । थ्वया लिपानं मदिकक भूगु आन्दोलनया आजु छु धकाः त्याजिके कुतः जुयाच्वंगु दु । नेपालभाषा मंकाः खलः स्वनेधुनेवं पितब्यूगु भिछगू बुंदाया मागया लिपा ने.सं १९९५ सिल्लाथ्वः १४ स नेवाः दे दबू (राष्ट्रिय सम्मेलन ग्वसाः खलः), नेपालभाषा मंकाः खलः, च्वसापासा, नेपालभाषा परिषद, नेपालभाषा

एकेदमि, मंकाः खलः, यल, विराट गुथि, नेपालभाषा मिसा खलः, अन्तर क्याम्पस नेपालभाषा पालायापाखें मंकाःकथं मुक्क भिनिगू बुंदाया दुगु उब्लेया प्रधानमन्त्री मनमोहन अधिकारीयात न्ह्यब्वःगु भिनिगू बुंदायामाग व ने.सं. १११९ कछलागा १० कुन्हु नेवाः देय् दबू, नेपालभाषा मंकाः खलः, च्वसापासा, नेपालभाषा परिषद्, नेवाः गुथि, नेपालभाषा संघष समिति व ने.सं. १११९ न्हूदँ हना ग्वसाः खल जनाः उब्लेया संचारमन्त्री राधाकृष्ण मैनालीयात लःल्हाःगु न्हयगू बुंदाया मागपाखेनं भी नेवाःतय्सं न्ह्याकाच्वंगु आन्दोलनपाखें प्राप्ति या निंतिं तातुनाच्वंगु खँ छु धकाः यच्चुक क्यानाच्वंगु दु । थुकिया तंसा कथं वा न्हू रुप कथं नेपालभाषा संघष समितिपाखें ने.सं. १११९ तछलाख १० कुन्हु यँया लुमदिइ धर्ना च्वनाः सार्वजनिक याःगु सविधान संशोधनया न्यागू बुंदाया माग न्ह्यब्वयाः नेवाः आन्दोलनया तातुनायात अभ प्रष्ट यानाबिल । अले थ्वहे आन्दोलनया भवलय् थःगु न्यागू मागत पूवकेया निंतिं प्रधानमन्त्री कृष्णप्रसाद भट्टराईया ११२० कललागाः ८ कुन्हु ज्ञापनपत्र लःल्हानाः ध्यानकर्षण याःगु खः।

नेवाःतय् आन्दोलन न्हिथं न्हू अवस्थाय् न्ह्यानाच्वंगु दु, अथेहे नेवाःत थःथःगु लागाय् थःथःकथं संगठित जुयाः माःगु भूमिका म्हितावयाच्वंगु दु । यद्यपि भीसँ संगठित रुपय् न्ह्याकावयाच्वनागु समग्र आन्दोलनया लिच्वः कथंहे श्री ५ या सरकारं ने.सं. ११२० न्हूदँया लसताय् नेपाल संवत् स्वम्ह शंखधर साख्वालायात राष्ट्रिय विभूतिया थाय् बियाः सत्तापाखें छुं भचा सकारात्मक लिच्वः मक्यंगु मखु । अथे खःसां भीसँ थ्वयेकाच्वनागु मूमू मागत गुगुनं कथं पूवंगु मदुनि , अले पूवकेपाखे सम्बन्धित थासं कुतः जुयाच्वंगु नं भीसँ अनुभवयाये मखं । अथे धैगु नेवाःतय् भाषिक व जातिगत अधिकारया समस्या अभं मज्यनि । थुकिया अर्थ खः - भीगु भाषा, जाति व संस्कृतिया अस्तित्व संरक्षणया सम्बन्धय् थौनं ग्यानापूगु ख्याच्वः ल्यनाच्वंगु दनि । थौनं नेवाःत संगठित जुयाः सचेत जुयाः आन्दोलित जुइमाःगु आवश्यकता दु, नेवाःतय् संगठित आन्दोलनया निरन्तरता इलं फवनाच्वंगु माग खत ।

लिखँ

नेवाःत न्ह्यागु अवस्थाय् ,न्ह्याथाय् च्वनाच्वंगु जूसां नेवाःत नेवाः हे खः । तर, सत्ताया संकीर्ण नीति, थीथी सामाजिक सम्पर्कया अभाव अले, थःथगु ज्ञानया म्हतियानाः नेवाःत ब्यापक रुपय् भाषिक विघटनया ग्यानापूगु गालय् कुतुवनाच्वंगु दु । अथेहे, गैरनेवाःतय् प्रभाव व आधुनिकीकरणया भ्रमय् लानाः नेवाःतय् दथुइ साँस्कृतिक विचलनया समस्या नं उलिहे ग्यानापुस्सेच्वं । मेखे खुल्ला सीमा क्षेत्र व खुल्ला अर्थतन्त्रया त्वचंकःगु वर्तमान ब्यवस्थाया अभिषाप कथं नेवाःतय् थीथी लजगाःया ख्यलं पितिनाः आर्थिक विस्थापन समेत यानायंकाच्वंगु दु । थ्व भवलय् सत्तायापाखें प्रशासन सेवा, प्रहरी सेवा व सैनिक सेवाय् नेवाःतय् विरुद्ध यानाच्वंगु षडयन्त्रया कारणं यानाः शासन सत्ताया ख्यलं ला नेवाःत भनहे वामलाक पितिनेगु ज्या जुइ धुकल । थुज्वःगु अवस्थाय् न्ह्याथाय् च्वमह नेवाः जूसां उमिगु समस्या वा चिन्ता धैगु छ्ता हे , व खः नेवाःया अस्तित्वया रक्षा । थ्व अवस्थाय् आः थयें हे भीसँ संगठित पलाःत मच्येकुसँ मगाः,बरु उकथं च्वयेकिगु पलाः छ्खें भीगु अधिकार प्राप्ति यायेगु आन्दोलनकारी रुपय् जुइमाःसा मेखें भीगु जाति, भाषा, संस्कृति या संरक्षण , सम्बर्द्धन व विकास या निंतिं भीसँहे यायेफुगु अन्तरमुखि ज्या कथं जुइमाः । केवल सत्तायापाखें थथे मयात अथे मयात धकाः असन्तोष प्वंकाः थःपिन्सं यानाः ज्यूगु ज्या तकं मयासँ च्वनाः भिं जुइमखु । भीगु अधिकार प्राप्ति या संगठित आन्दोलन या निंतिं थःगु थासं न्ह्यानाच्वनिगु गुलि आवश्यक खः , उलिहे भीगु दथ्वीइ भीसँ यायेमाःगु अन्तरमुखि ज्याखँ थुकथं न्ह्याकेगु आवश्यक खना ।

अ) भाषिक - नेवाःत उज्वःगु समुदाय गन विविधता दु । विविधता धार्मिक आस्था व आचरणया ,अले विविधता संस्कार व परम्पराया । नापनापं शारिरिक वनौटय् तक नं समानता मदु भी नेवाःतय् दथुइ । थथे थीथी नश्ल , वंश, संस्कृति व धर्मया मनूतय् नेवाःया समाजय् छ्धियानाः चिनातःगु खिपः खः भीगु नेपालभाषा, नेवाःभाय् । सत्ताया दमन व पक्षपातया कारणं यानाः

नेवाःभाय् सरकारी ज्याय् छचले मदुगु ला दहे दु , नापनापं थःगु मांभासं आखः ब्वनेगु थुज्वःगु नैसर्गिक अधिकार तकं प्राप्त मजुल भी नेवाःतय्त । अले भण्डै छगू दर्जन धैथें थःगु मौलिक लिपि दुपिं नेवाःतय्सं सरकारी अंकुशं यानाः न्हियाहिथंया छलाबुलाय् हयेमखनं । गुकिं यानाः नेवाःतय् दथुइ नेवाः लिपिया ज्ञान तकं मदया वन । अथेहे व्यवहारया भवलय् सामाजिक, भौगोलिक अले राजनैतिक कारणं यानाः आपालं नेवाःतय्सं थःगु मां भाय् अले भी नेवाःतय् परिचयया मू आधार नेवाः भाय्ल्हायेगु, ब्वनेगु अले च्वयेगु त्वःतावं हयाच्चंगु दु ।

राणा कालय् दरवारया प्रभावय् व चाकरी प्रथाया संस्कार कथं मुन्सि खलः नेवाःतय्सं शुरुयाःगु थ्व ल्वय् आः समग्र नेवाःतय्त पुंनावं वनाच्चंगु दु । नेवाःतय् दथुइया थ्व भाषिक विचलन धैगु नेवाः समुदाय विघटनया दक्कले तःधंगु दुरावस्था खः । गुब्ले तक थ्वैत पनेफैमखु उब्ले तक नेवाः समुदाययादुने जुइगु गुगुं नं अभियान वा कुतलं नेवाःया मौलिक परिचययात रक्षायायेगु ज्यायाये फैमखु । थ्व अतिकं ग्यानापुगु ल्वय्यावारे नेवाःतय् नुगलय् हिइस्सेच्चंगु घाःथें चायेकेबीगु बिस्कं आन्दोलनहे जुइमाः । थ्वया नापनापं थः मस्तय्त संसारया न्ह्यागुहे भाय् व आखः स्यनेगु याःसां थःगु मांभाय् नेवाः भासं खँल्हाकेगु व नेवाः लिपि सयेके बीगुयात गुगु नं अवस्थाय् त्वफिके मबीगु जुइमाः । नेवाः भाय्ल्हायेगु व नेवाः लिपि च्वये-ब्वने त्वःफी धुंकीपिं अले मसःपिं नेवाःतय्त हानं ल्हाकेबीगु व भाय् स्यनेगु अभियानयात संगठनात्मक रुपय् न्यंकभनं न्ह्याकेमाः । नेपाल लिपि गुथि, लिपि थपु गुथि थें नेपालभाषा शिक्षण केन्द्र वा संस्था स्वनेगु व थुकिया नितीं मां कथंया पाठच सफू विकासयायेगु व प्रशिक्षकत समेत व्यवस्थायायेगु कुतः जुइमाः । अले, जिल्ला जिल्लाय् प्रशिक्षकपिं इलय् ब्यलय् व्छयाः भाषा व लिपि प्रशिक्षणया ज्याभवः न्ह्यकावं यंकेमाः । नापं विद्यालय व क्याम्पसया स्तरय् विद्यार्थीतय्त नेपालभाषा विषय कयाः ब्वनेगुलि हःपाः बीगु व नेपालभाषा विषय कयाः ब्वनातःपिं मनूतय्त नेवाःतय्सं न्ह्यकावयाच्चंगु ज्याकुथिइ लजगाः चूलाकाबीगुलि प्राथमिकता बीकेगु अभियान जुइमाः ।

आ) साँस्कृतिक- नेवाःतं साँस्कृतिक रुपं तःमि अले भीगु कला, संस्कृति अतिकं तःजि, तर थ्व आः अबु - बाज्यां घ्यः व जा नयावन जिमिगु ल्हाः नतुनास्व धया थें जक जुइ धुंकल । सत्तायपाखें माःगु संरक्षण मदुगु खँला दहे दु ,थ्व सिबें नं ग्यानापुगु खँला छु धाःसां छगू सुनियोजित षडयन्त्रहे न्ह्याकू गुलिं यानाः नेवाःतय् थ्व तःजिगु व तहाः परम्परादुगु कला, संस्कृतिया ख्यलय् बांमलाःगु संकट वयाच्वंगु दु । उकिसनं पिनेया संस्कृति व संस्कारं दुस्प्रभाव लाकाः भीगु कला संस्कृतियात मेकथं स्यंकायंकाच्वंगु दु, न्हंकावयाच्वंगु दु । अले वर्तमान आर्थिक विपन्नताया कारणं समेत भीगु साँस्कृतिक सम्पदा व परम्परायात न्ह्याकेगुलि पंगः थनाच्वंगु दु ।

खतुं नेवाः समाजय् दुगु तःता जात भी दुनेया व्यवसायीक विविधताया छगू अतिकं गौरवमय् सामाजिक संगठन स्वरुपया चिं खः । तर, समाज दुनेया संकीर्णता व थीत्यः व मत्यः अले थँजात व क्वजातया विभेदया कारणंयानाः गुलिखे जातियात थःगु लजगाः ज्वनाच्वनेगुलि लघुताभास जुइगुलिं यानाः उज्वःगु लजगाः त्वःतावं वनेमाःगु जुल । भीगु समाजया साँस्कृतिक संकटया थ्व छता मेगु गम्भिर पक्ष खः । इलय् वाःचायेकाः भीगु साँस्कृतिक ख्यलय् थथे प्यखें वयाच्वंगु समस्या व संकटयात थुइकेमाःगु न्हापांगु दायीत्व खःसा मेगु कर्तव्य धैगु थ्व समस्या चीकाः नेवाःतय् साँस्कृतिक धरोहरयात म्वाकांतुं तयेगु व न्ह्याकांतुं तयेगु व्यवहारिक लँपु मालेमाः । दुगु अन्ध संस्कृति व थौंया ईयात मत्वये धुंकूगु , आः नालेहे थाकूगु , आर्थिक रुपं क्वबीहे मफैगु आदि संस्कार व परम्पराय् न्हूधाः यायेगु वा सरलिकृत यायेगु कुतः जुइमाः । तर, थुज्वःगु पलाखं समग्र नेवाः समुदाययातहे लिच्वः लाकीगु जुइगुलिं थ्व कुतः सकल नेवाःतय् स्विकार्य व नालाकाये फैकथंया जुइमाल । अथे धैगु थुज्वःगु कुतः फुक्क नेवाःतय् प्रतिनिधित्व यायेफैगु मंकाः संगठनयापाखें जक यायेफैगु खँ जुल ।

नेवाःतय् दथुइ धार्मिक रुपं विविधता दुथें उमिसं हनावयाच्वंगु विधि व्यवहार व कर्मकाण्डय् नं उकथं छगू पहः मदु । थुकिंयानाः नेवाः नेवाःया दुने मचायेकः संस्कारगत, साँस्कृतिक अन्तरविभेद ल्यनाच्वंगु

यथार्थयात भीसँ लोमंके मज्यू । थुज्वःगु अन्तरविभेद नेवाः नेवाःया दथुइ एकता ब्वलंकीगुलि पंगः कथं ल्यनामच्चनेमा धैगु वाःचायेकाः बुलुहुँ भीसँ सकल नेवाःया मंकाः संस्कृति ब्वलंकेगु अभियानयात न्हाकेगु आवश्यकता दु । थौं नेपाल संवत्था न्हूदँ हनेगु व म्हपूजायायेगु गुकथं सकल नेवाःया छगू मंकाः संस्कृति कथं थाय् कयावःगु दु उकथहे मेमेगुलि नं थुज्वःगु एकरुपता बीगु अभियानयात नेवाःतय् केन्द्रीय नेतृत्वं क्वातुगु भूमिका म्हितेमाः ।

स्वनिगलपिने च्वनाच्चापि नेवाःतय् पुचलय् लोमनावने धुंकूगु व तनावने धुंकूगु नेवाः संस्कार व संस्कृतियात हानं छचलाबुलाय् हयेकेबीगु नितिं सम्बन्धित विषयया थीथी सफू च्वसु पिकयाः उखेपाखे थ्यंकाबीगु जक मखसँ फुसा थुज्वःगु विधि ब्यवहार व संस्कृति संस्कारया भिडियो सिरियलत दयेकाः प्रचारयायेगु दक्कले प्रभावकारी जुइ । नापनापं थुकिया नितिं नेवाः संस्कार व संस्कृति हनेत सम्बन्धित थासय् गुरुजु-बाज्यापिं थ्यंकाबीगु ब्यवस्था जुइफत धाःसा थ्व छगू भीगु साँस्कृतिक पुनर्जागरणया क्वातुगु पलाः जुइफइ ।

इ) आर्थिक - थ्व खँ धयाच्वनेमाःगु मदु , सलंसः दँ न्ह्यवःनिसंया इतिहासं नेवाःत धैपिं छगू उद्यमि वर्ग खः धकाः दसि ब्यावयाच्चांगु दु । सुकू थायेगुनिसं कयाः विश्वयाहे वास्तुकलाया अनुपम ब्वसा जुयाच्चांगु कलात्मक देगः, गुम्बा, लायकू समेत धस्वाकेगु ज्यायानावयाच्चापिं खः नेवाःत । थीथी कुटिर उद्योग व बनेज्या यानाः थःगु आर्थिक स्थितियात क्वातुकेगुलि सिद्धापिं समुदाय खः, भी । तर, सीदयेक देसय् निर्दलीय शासन ब्यवस्था शुरु जुसानिसं नेवाःतय् लजगाःया परम्परागत ख्यलय् पिनेवःपिं मनूतय्सं विस्थापितयायेगु जुयावल । अंगः दनीम्ह छम्ह साधरण दँकःमिनिसं कयाः देया आन्तरिक व वैदेशिक व्यापारया ख्यलय् तकहे नेवाःतय् थाय् मेपिन्सं कयावं यंकल । नेवाःतय्सं प्रतिस्पर्धा यायेमफयाः मखसँ सत्तायापाखे माःगु संरक्षण मदयाः थथे जूगु धकाः सकसिनं अनुभवयानाच्चनागु खँ खः । स्पष्टतः थथे जीवनया धस्सायेगु मू लिधँसा आर्थिक ख्यःहे बमलायेवं थुकिं समाजया समग्र ख्यलय्

बामलाःगु लिच्चः लाकाः नेवाःतय्त धेधेचुकाबीगु स्वभाविक खत । थ्व अवस्थाय् नेवाः नेवाः छ्वाः धैगु नारा कःधानाः थवं थवय् जायेगु पायेगु नितिं संगठित कुतः यायेगु हथाय् जुइ धुंकल । जुइफु, थुकिया नितिं नेवाः कल्याकारी (कोष) धुकू थुज्वःगु वित्तिय संस्थाहे स्वने मालेफु । थकाली समुदायपिन्सं सलंसः दँ न्ह्यवनिसें न्ह्याकवयाच्चंगु ढिकुरी परम्परापाखें भीसँ हःपाः कायेफु । अथे मारवाडीतय् दुनेया थवंथव आर्थिक तिबःया भावनायात नेवाःतय्सं नालेफु । नेवाःतय्त लजगाःया ख्यलय् माःगु सल्लाह व सुरक्षाया व्यवस्थायायेया नितिं च्यूताःकाइगु व्यवसायीक पुचःया आवश्यक जुइफु ।

थ्वहे खँ वाःचायेकाः विराटनगरया भी पुचलं थुकथंया सहकारी कोष स्वनाः थःगु आर्थिक कारोवार छुं दँ न्ह्यव न्ह्याकाः थ्व ख्यलय् अनुभव मुंकाच्चंगु दुसा हेटौंडा नेपालभाषा खलकं नं याकनं थुकथंया पलाः न्ह्याकीगु जुयाच्चंगु दु । नेपाल नेवार समाजयापाखें थुज्वःगुहे कुतः कथं डवली सहकारी संस्था प्रा. लि. चायेके धुंकुगु दु ।

ई) राजनैतिक - ने. सं. ८८८ या लिपा सत्ताया दबुलीं कुहाँवयेत वाध्य जूसानिसें नेवाःतय् राजनैतिक विघटन शुरु जूगु खत । अथेला ने.सं ८९० लिपा थः अवु जुजु रणजीत मल्ल काशीवास वंबले नापं निर्वाशित जुइमाःम्ह राजकुमार अवधूत सिंहया नेतृत्वय् भारतया भूमिं नेवाःतय्सं राजनैतिक सत्ता प्राप्तिया नितिं कुतः याःगु ला खः , तर, उकिं मूर्तरुप धाःसा मकाल । थ्वया लिपा नेवाःत न्ह्यलुवाः जुयाः थीथी राजनैतिक संगठन स्वनेगु व नेतृत्वयायेगु ज्या नं जुल । १०५० या राजनैतिक काण्डय् शहादत प्राप्त याःपिं प्यम्ह मध्ये स्वम्ह ला नेवाःहे खत । अथेहे ने.सं. ११०९ या जन-आन्दोलनया भवलय् न्ह्यलुवाः जुयाः ज्यानपाःपिं मध्ये बच्छिसिबें उप्वः ला नेवाःत दु । अथे खःसां राज्य संचालनया निर्णायक थसय् नेवाःतय् स्थान व भूमिका गुलि दु,अले थुकिया प्रभावकारीता छु धकाः दुवालेबले धाःसा उकियापाखें नेवाः समुदायया भिया नितिं , नेवाः भाय् ,संस्कृतिया संरक्षण व बिकासया नितिं गुगुं सकारात्मक लिच्चः वःगु धाःसा खने

मदु । मखुसा पंचायतया अन्तिम शासनकालय् सत्ता प्रमुख पदय् छम्ह नेवाःहे थ्यंगु खः । थथे सुं छम्ह मनू जातिया रुपय् जक नेवाः जुइवं प्रयाप्त मखसैं उम्ह मनूया नुगःदुनेया भावना व प्रतिबद्धताय् नेवाःया अन्तरभाव मन्त धाःसा महत्त्वपूर्ण थासय् थ्यंसां नं यायेमाःगु वा जुइमाःगु छुं जुइमफैगु जुयाच्वन । आखिर थ्व दक्वं नेवाःतय् दुने छगू बिस्कं राजनैतिक पहिचानया अभावया लिच्वः खः वा नेवाःतय् दथुइ राजनैतिक सहभागिताया अनिच्छा वा जि नेवाः खः धैगु राजनैतिक चेतनाया अभाव जक ? तर, थ्व खँ स्पष्ट खः कि गुब्ले तक राजनैतिक संरचनाय् नेवाःतयगु प्रतिनिधित्व सही रुपय् जुइमखु उब्ले तक गुब्सं नं सत्ताया स्वविवेकं नेवाःतय् माःगु सकतां पूर्वकाबी धकाः बिचाः यायेगु भीगु राजनैतिक अज्ञानताया प्रदर्शन जकहे जु । उकिं, नेवाःतय् थःगु समस्या ज्यंकेगु व हक अधिकार संरक्षणया नितिं थःगुहे वर्गया प्रतिनिधिपिं नीति निर्धारण तहतक थ्यंकेगु राजनैतिक अभियान जुइमाः, नेवाः आन्दोलनया छगू अङ्ग जुइमाः । संभवत थ्वहे खँ वाःचायेकाः स्वनिगःया छपुचः नेवाः न्ह्यलुवाःतय्सं “नेवाः राष्ट्रिय आन्दोलन” या नामं छगू अवधारणा-पत्रया घोषणायासैं नेवाःतय् नितिं जातिय स्वशासन व स्वायत्तताया पक्षय् सःथ्वयेकेगु ज्या याःगु खः ।

“संगठनहे शक्ति खः ” धैगु शाश्वस्त सूत्रयात सुनां सुनां गुब्ले लोमंकी उब्ले उज्वःपिन्स इतिहासय् तःधंगु दुर्घटना न्ह्यचिलेमालि । स्वनिगःया नेवाः जुजुपिन्स थःगु सत्ता त्वःफिकेमाःगु खायूगु यथार्थनं थथेहे खः । अले, नेवाःतय् आदिभूमिइ मेथाय्पिं वयाः नेवाःतय् तहे मथ्याःपिं मांया भस्तय् तथें व्यवहार यानाच्वंगुया रहस्यनं थ्वहे खः । तःता कथं विस्थापित यायां यंकेधुंकूपिं भी नेवाःत, भीगु नितिं थःगु जातिय अस्मिता ल्यंवातयेगुया छताहे जक लैपु खः - भी सकले संगठित जुइगु, छप्पं जुइगु, छधी जुइगु । संगठित नेवाः शक्ति थौंया चाहना खः ।

नेवाःतय्सं इतिहासय् दक्कले न्हापां १०८२ थिला कुन्हु भाषा समस्यायात कयाः शासकतय् न्ह्यःने न्ह्यब्वयेगु नितिं तयारयाःगु माग पौ । अन्तर कलेज नेपालभाषा साहित्य पालाया सक्रियताय् थुक्रिया नितिं छगू प्रतिनिधि मण्डल नीस्वंगु खः ।

श्री ५ महाराजाधिराजया हजुरय्,
नारायणहिति लाय्कू ,
यें, नेपाः ।

देनायः छलपेल,

भाषा शिक्षाया विषय शिक्षा मन्त्रालयपाखें छःपिनिगु पवित्र इच्छाया विरुद्ध अशान्त वातावरण ब्वलनि कथं पलाः ल्हवनेत स्वयाच्चंगुलिं जिमिगु सःया च्यूताः मतसें उक्रियात क्वत्यलेगु कुतः कथं क्वय् बियागु विषयस् क्वय् बियाकथंया उजं जूगुलिं उगु मन्त्रालयय् मज्यूगु व मछिगु खँयात कयाः तक्वः खँतयेत स्वयाबले न्यहे मन्यसें थःगु न्हापायाहे उजंयात नालावःगुलि सरकारयाके विन्तियासें क्वय् न्ह्यथनागु विषयस् क्वय् बियाकथं मन्त्रालयया नामय् उजं जुयाबिज्यायेत फ्वनाच्चना ।

भाय्या हकय् क्वय् बियागु दसिकथं नेपालभाषा धयावयाच्चंगु खनेदु अथेहे थौंया सरकारहे नेपालभाषा धकाः मान्यता बी धुंकूगुलि आः वयाः शिक्षा मन्त्रालयपाखें त्रिभुवन विश्वविद्यालययात २०१८ बैशाख २९ स बियाहःगु सुचनय् “ नेपालभाषा धकाः धायेबले नेपाली राष्ट्र भाषानाप भ्रम जुइगुलि आः तकया प्रचलित नां “नेवारी” धकाःहे पाठचक्रमय् दुथ्याकाः ब्वंकेगु व्यवस्थायायेगु” धकाः धयाहःगुलि त्रिविविया नेपालभाषा पाठचक्रम उप-समितिया कजि कविकेशरी चित्तधर “हृदय”जुं विरोधयासें दसिनापतसें नेपालभाषा हे धायेमाः धकाः ब्यूगु सुभाब न्यनेगु मजू । थुकिं यानाः क्वय् बिया कथंया पंगः ब्वलंगु वाःचायेकागु जुल ।

१. भ्रम ब्वलनी धाःगु सम्बन्धय् - नेपाली व
नेपालभाषाय् गुकथं व गथे भ्रम ब्वलनि ,थौतक गन,
छु खँय् भ्रम ब्वलन धकाः क्यनेफुगु मदु । भारतय्
हिन्दुस्तानी व हिन्दीया दथुइ गुगुं भ्रम ब्वलन धकाः
गुगुं विरोधया सः मवयेक न्ह्यानाच्चंगु दु ।
२. नेपालभाषायात आवलि नेवारी धकाः धयाबीबले
अन्तरराष्ट्रिय ख्यलय् तकं भ्रम ब्वलकि । पुलां पुलांगु
फुक्क सफुतिइ, अभिलेखय् तकं थ्व नां हीकेमालिगु
जुइ ।
३. श्री ५ यात जुजु कथं व नेताया कथं जक मखु द्यःया
कथं बीमाःगु पूजाआजा बौद्धतय् बिचापूजा, सम्यक
भव्य् , इत्यादिया ब्वनापतिइ, दानपत्रय् “ अथः
नेपालभाषा, अथः देशभाषा ” धकाः संस्कृतं श्लोकया
क्वसं थ्वहे नेपालभाषां च्याः द्यछायेगु
यानावयाच्चंगुलि उगु ब्वनापौ व दानपत्र मदयेक
उज्वःगु पूजाआजा तकं दिकेमालाः धर्मय् तकं हन्ता
जुइगु संभावना दु ।
४. छ्यलाबुलाय् नेपालभाषाहे धयावयाच्चंगु दु धैगुया
दसितः

- क) अभिलेख
- ख) ल्हातंच्चयातःगु सफूत
- ग) पुलां भ्वंत/दानपत्र आदि
- घ) ध्वानासफूत
- ङ) थीथी भाय्या हनेबःपिनि धापूत

५. मान्यता:

- क) संस्था
- ख) पत्रपत्रिका
- ग) पाठ्यक्रम
- घ) दसिपौत
- ङ) नगरपालिका
- च) नेपाली भाषा प्रकाशन समिति
- छ) गोरखापत्र

आज्ञाकारी

श्री ५ महाराजधिराजया हजूरय,
नारायणहिटि लायकू,
येँ, नेपा: ।

देनाय: सरकार,

शिक्षाया विषयस शिक्षा मन्त्रालययापाखें छःपिनिगु पवित्रगु
इच्छाया अःखः अशान्त वातावरण ब्वलनी कथं थःगु ज्याः खँ
न्याकूगुलि जिमिगु सःया च्यूताः मतःसें क्वत्यलेगु खँयात कयाः छःपिनि
न्याःने बिन्तीयायेया नितिं कन्या मन्दिर हाई स्कूलस् जूगु मुंज्याय् मूपिं
नेपालभाषा भाषीपिन्सं भाला ब्युपिं क्वय् न्याथनापिनि छगू प्रतिनिधि
मण्डलयात छःपिनि दर्शन भेटया ई फ्वनाच्वना ।

सरकारया आज्ञाकारी
हितकर वीर सिंह

प्रतिनिधि मण्डल

हितकर वीर सिंह	१	चित्तधर “हृदय”	१
केदारमान “ब्यथित”	१	प्रेमबहादुर कंसाकार	१
सत्यमोहन जोशी	१	सूर्यबहादुर “पिवाः”	१
दुर्गालाल श्रेष्ठ	१	श्यामसुन्दर सँयजु	१
सुदर्शन श्रामणेर	१	पूर्णनारायण प्रधान	१

इति संवत् २०१८ मार्ग गते रोज शुभम्

तंसा-पौ २

नेपालभाषा मंका: खल:या १०९९ दिल्लागा: १४ (२०३६ असार ९)
शनिवा:या मुँज्यां न्ह्यब्ब:गु भिंछगू बुंदाया माग:

- क. नेपालभाषा लिस्सें नेपा:या मेमेगु भाषाया पत्रिकानं रजिष्टर्ड जुइमा ।
- ख. नेपालभाषा व नेपा:या मेमेगु भाषायातनं रेडियो नेपालया दैनिक कार्यक्रमय् थाय् दयेमा । विज्ञापन सेवाय् नं समान व्यवहार जुइमा: ।
- ग. प्राथमिक शिक्षा मातृभाषां बीमा: ।
- घ. माध्यमिक स्तरय् , अनिवार्य भाषास् नेपा:या प्रमुख भाषा मध्यय् छता ल्यया: ब्वने दयेमा: ।
- ङ. प्रज्ञा प्रतिष्ठान अन्तर्गत जुइगु ज्याखँय् नेपा:या व्याक्क भाषं समानताया उपभोग याये दयेमा: ।
- च. प्रसार विभागपाखें जुइगु ज्याखँ नेपा:भाषा व नेपा:या मेमेगु भासनं जुइमा: ।
- छ. विश्वभाषा क्याम्पसय् नेपालभाषानं दुध्यायेमा: ।
- ज. नेपा:या गुगुनं भाय्या अनुसन्धान व शोधया निंतिं इच्छुकपिन्त त्रिभुवन विश्वविद्यालय अन्तर्गत एसियाली अध्ययन संस्थानं मान्यता बीमा: ।
- झ. नेपा:या विभिन्न भाषाया प्रतिभा सम्पन्न व्यक्तिपिनिगु किपा तया: हुलाक टिकट पिथनेमा: ।

- ज. अदालतय् थःगु भासं न्ववायेगु, वकालत यायेगु व सरकारी कार्यालयस थःगु भासं निवेदन तयेगु अधिकार दयेमाः ।
- ट. नेपाल संवत्प्रात नेपालिया राष्ट्रिय संवत् कथं सरकारं नालाकायेमाः ।

तंसा-पौ ३

प्रधानमन्त्री मनमोहन अधिकारीयात नेवाःतय् थीथी गुंगू संस्थातय्पाखें
मंकाः कथं १११५ सिल्लाथ्वः १४ (२०५१ फागुण २) कुन्हु लःल्हागु
भिनिगू बुंदाया मागपत्रः

हनेबःम्ह प्रधानमन्त्रीजु
प्रधानमन्त्रीया सचिवालय,
सिंहदरवार,यें ।

ने.सं. १११५ सिलाथ्वः १४
फाल्गुण २ गते

मूखः नेपालभाषा भाषीपिनि माग

हनेबःम्ह प्रधानमन्त्रीजु,

जिपिं नेपालभाषा भाषीतय् प्रतिनिधित्व
यानावयाच्चनागु थीथी लागा व थाय्यां खलः पुचःयापिन्सं नेवाः जाति
व भाषा अले उमिगु संस्कृतियात कयाः मंकाः कथं वाःचायेकागु
मागत छता छतायानाः छि थाय् न्त्यव्वयागु जुल ।

गुलिफत उलि याकनं पूर्वकेगु निंतिं न्त्यव्वयाच्चनागु
सकतां मागयात कयाः हनेबःम्ह प्रधानमन्त्रीजुं माःगु उजं बीगु ज्या
जुल धाःसा नेपाःया संविधान - २०४७ पाखें प्रत्याभूत बहुभाषिक, बहु
धार्मिक व बहुजातिय नेपाः देया जिपिं नेवाः समुदायनं राष्ट्रिय मूल
प्रवाहयादुने दुथ्याःगु कथं वाःचायेकेगु अवसर चूलाइगु धकाः भलसा
कयाच्चना ।

सुभाय् !

प्रतिनिधि मण्डल

नायः	नेपालभाषा मंकाः खलः, यै	पद्मरत्न तुलाधर
"	नेवाः राष्ट्रिय सम्मेलन गवसाः खलः भक्तिदास श्रेष्ठ	
"	चवसापासा	डा. कमलप्रकाश मल्ल
"	नेपालभाषा परिषद	सत्यमोहन जोशी
"	नेपालभाषा मंकाः खलः, यल	भुवनेश्वर जोशी
"	विराट नेपालभाषा साहित्य गुथि	त्रिरत्न शाक्य
"	अन्तर क्याम्पस नेपालभाषा साहित्य पाला	रत्न वीर शाक्य
सदस्य सचिव	नेपालभाषा एकेदमि	मल्ल के. सुन्दर
सचिव	नेपालभाषा मंकाः खलः	नरेश वीर शाक्य
नकिं	नेपालभाषा मिसा खलः	डा. ज्योति तुलाधर
महासचिव	" "	डा. चुन्दा बज्राचार्य
सांसद	यै क्षेत्र नं - ७	मा. कृष्ण गोपाल श्रेष्ठ

१. नेपाःया थःगु राष्ट्रिय महत्वं जाःगु नेपाल संवत्यात सरकारी मान्यता विसैं न्हिथंया छयलाबुलाय् हयेमाः ।
२. सरकारी संचार माध्यमं नेवारी भाषा धकाः धयावयाच्वग्यात नेपालभाषा धायेमाः ।
३. नेपाल लिपियःनापनापं राष्ट्रिय महत्वं दुगु लिपितय्गु संरक्षण सम्बर्द्धन राष्ट्रिय स्तरं यायेगु विशेष व्यवस्था जुइमाः ।
४. विद्यालय स्तरया कक्षा प्यंगुनिसैं दुथ्याकातःगु अनिवार्य संस्कृतयात उघिमय् रद्द यानाः अनिवार्य यायेगु दिकेमाः ।

५. नेपालभाषा एकेदमियात मान्यता बीगु भवलय् थ्व सम्बन्धय् छगू बिस्कं विधयेक संसदयापाखें व्वछिनाव्यू ।
६. नेवाः समुदायया थःगु साँस्कृतिक ज्याभवः न्ह्याकेत तःदँ न्हयव निसें न्ह्याकावयाच्चंगु दबूछें धस्वाकेगु ग्वसालय् तिबः बीकथं राज्ययापाखें माःगु थाय् व वजेटया व्यवस्था जुइमाः ।
७. नेपाल राजकीय प्रज्ञा प्रतिष्ठानं नेपालभाषाया मौलिक कृति व अनुवाद प्रकाशन यायेगु, प्रज्ञासभाय् नेपालभाषा विज्ञ व थुगु भाषाया साहित्य व कलाकारपिनं दुथ्याकेगु वैधानिक व्यवस्था व प्रतिष्ठानयापाखें लःल्हाइगु थीथी सिरपाः थ्व ख्यःया मनूतय्तनं बीगु जुइमाः ।
८. थौंया संविधानय् नेपाः दुने ल्हाइगु थीथी मांभाय्यात राष्ट्रिय भाषा कथं मान्यता बियातःकथं उगु राष्ट्रिय भाषात छुछु खः व उकिया स्तर व ख्यः छु खः धैगु खँ संविधानया दुने बिस्कं अनुसुची तयाः दुथ्याकेमाः ।
९. थुगु थीथी माग व सुविधा राज्यस्तरं व्यवस्था यायेगु भवलय् नेपालभाषायात थें देया मेमेगु भाषायात न माःकथं थाय् बिया समानताया नीतियात व्यवहारिक कथं नालाकायेमाः ।
- क. प्राथमिक शिक्षा अनिवार्य यासें नेपाःया थीथी भासं शिक्षा बीगु व्यवस्था राज्यस्तरं जुइमाः, नापं फुक्क शैक्षिक तहलय् थःथःगु मांभाय् भर्नाकुलर भाषाया कथं व्वके दयेमाः ।

- ख. लोकसेवा आयोग व थीथी सरकारी संघ, संस्थानय् पदपूर्तीया नितिं काइगु आन्तरिक व वाह्य परीक्षाय् भाय् व प्राविधिक विषय त्वःताः मेगु विषय थःथःगु मांभास बीदइगु व्यवस्था जुइमाः ।
- ग. सामान्य प्रशासन मन्त्रालयं न्हापाथें लोकसेवा आयोग दुनेया थीथी पदया बहुवायाइबले ल्याःखाइगु ल्याख्य नेपालभाषा साहित्य विषयस् एम.ए. व पी.एचडीपिन्त न्हापा थें मान्यता बीमाः ।
- घ. स्थानीय निकायस (वडा, गा.वि.स., नगरपालिका) मांभाय्या माध्यमं ज्या न्हाकाकेगु व्यवस्था व राज्यस्तरं प्रसारण याइगु सार्वजनिक महत्वया फुक्क समाचार नेपालभाषांनं प्रसारण यायेमाः ।
१०. एन.टी.भी.या प्रसारणय् नेपालभाषां समाचार व मनोरञ्जनात्म व शिक्षामुलक ज्याभवः दुथ्याकेमाः ।
११. रेडियो नेपालं न्हापा थें नेपालभाषाया मनोरञ्जनात्मक व शिक्षामुलक ज्याभवः प्रसारण जुइमाः।
१२. रेडियो नेपालं नेपालभाषां प्रसारण जुइगु समाचारया ई १० मिनेट यासैं थुकिया नितिं माःपिं रेडियो पत्रकारपिं चूलाकाब्यू ।

स्वनिगः बन्द सम्बन्धी ज्याइवःयाबारे भाषिक अधिकार संयुक्तसंघर्ष समिति व नेपालभाषा संघर्ष समितिया मंकाः प्रेस विज्ञप्तिः

भाषिक अधिकार संयुक्त संघर्ष समिति व नेपालभाषा संघर्ष समितियापाखें देसय् थुथाय् ब्वलंगु भाषां समस्या व उकियात ज्यंकेगु सम्बन्धय् गुंगू सूत्रीय मागत न्ह्यब्वसें थ्वहे २०५६ भदौ ३० गते “स्वनिगः बन्द” या ज्याभवः मंकाः कथं आह्वान याःगु खँ सकसिनं स्यूगु खँ खः । “स्वनिगः बन्द” यात तयारी कथं थ्वया न्ह्यव जुइगु ज्याभवः क्वय् बियाथें जुइगु खँ थ्व विज्ञप्तियात पितबियागु दु । सकतां ज्याभवः अतिकं संयमित व शान्तिपूर्ण न्ह्याकेगु जिमिगु प्रतिवद्धता जूगुलिं थ्व ज्याभवःया समर्थक व ऐक्यवद्ध मेमेगु ख्यःयापित्सं नं जिमिगु थुगु भावनायात नालाः थःथःगु थासं ब्वतिकाइ धैगुलि भलसा कया च्वना ।

जिमिगु मागतः

१. सर्वोच्च अदालतया २०५६ जेठ १८ गतेया निर्णययापाखें संविधानया राष्ट्रिय भाषाया ल्याखं मान्यता बियातःगु मांभाय् संरक्षण, सम्बर्द्धन व छचलाबुलाय् स्थानीय स्वायत्त शासन ऐनयापाखेंनं बियातःगु अधिकार लिक्केंगु ज्या जूगुलिं संविधानय् दुगु भाषा सम्बन्धी विभेदपूर्ण फुक्क प्रावधानत हीकाः मातृभाषायात समान रुपय् छचले दैगु अधिकार प्रत्याभूत जुइमा
२. वर्तमान संविधानय् दयाच्वंगु भाषिक अधिकार सम्बन्धी प्रावधानत भिकेबले विश्वव्यापी मानअधिकार सम्बन्धी घोषणायापाखें नालातःगु मूल्य व मान्यतायात पूवक नालेमाः ।

३. स्थानीय निकायतय्त कानूनतः स्वायत्त शासनया अधिकार प्रत्याभूत यानातःगु भवलय् उज्वःगु इकाईया दुने अनया सामाजिक वनौट व आवश्यकताकथं उज्वःगु लागाय् बाहुल्यदुपिं नागरिकपिनि मांभाय्यातनं ज्याखँय् छचलेगु / छचयेकेगु अधिकार कानूनतः ख्छीमाः ।
४. मांभाय्या माध्यमं आखः ब्वनेगु अधिकार राज्ययापाखें व्यवस्था जुइमाः ।
५. आःया शिक्षा प्रणालीदुने पठनपाठनय् अनिवार्य यानातःगु संस्कृत भाषाया पाठचक्रम थथें चीकाच्छ ।
६. लोक सेवा आयोगयापाखें मूल्याङ्कनयाइबले संविधानयापाखें राष्ट्रिय भाषाकथं मान्यता बियातःगु भाषाय् कयातःगु डिग्रीयातनं नेपाली भाषायात बियातःगु कथंया मान्यता बीमाः ।
७. लोक सेवा आयोगयापाखें न्ह्याकीगु परीक्षाय् संविधानयापाखें राष्ट्रिय भाषाकथं मान्यता बियातःगु फुक्क भाषायातनं ऐच्छिक बिषयकथं दुथ्याकेमाः ।
८. सुनं नेपाली नागरिक अदालतय् बयानया नितिं दबनेबले वयात अःपुइक व याउँक खतयेफइकथं थःगु मांभाय् माध्यमया कथं छचलेगु अधिकारया ग्यारेण्ट दयेमाः ।
९. सरकारी संचार माध्यमय् गुगुं पनपक्ष मयासें नेपाःया फुक्क राष्ट्रिय भाषाय् प्रसारणया अवसर बीमाः ।

ज्याभवः

१. भदौ २५ शुक्रवाः- जुलुस - टेकु - हिनय ३.३० ताः
२. भदौ २६ शनिवाः-जुलुस- वसन्तपुर- हिनय ३.३० ताः
३. भदौ २७ आइतवाः-मशाल जुलुस-भिन्चोत्वा-सनिलय ६ ताः
४. भदौ २८ सोमवाः-प्रचारात्मक जुलुस-थाय्मदु-सुथय ७ ताः
५. भदौ २८ सोमवाः-ब्वाज्या जुलुस-चुच्चेपाटी-सनिलय ६ ताः
६. भदौ २९ मंगलवाः-मशालजुलुस-ओमवहाल-सनिलय ६ ताः
७. भदौ ३० बुधवाः- जुलुस - असं - सुथय ६ ताः

थ्वया नापनापं स्वनिगःया यल, ख्वप, किपू, व थिमिया संघर्ष समितितय् ग्वसालय् आमसभा, दौड, जुलुस, मशाल जुलुसत जुइगु खँ नं कनाच्चना । नापं स्वनिगःपिनेनं थ्व आन्दोलनय् छप्पं जुयाः थीथी ज्याभवः जुयाच्चंगु दु ।

नेपाल अधिराज्यया आपालं नागरिकतय् भाषिक अधिकार कायेगु नितिं न्ह्यानाच्चंगु थुगु आन्दोलन खतुं न्हापांगु त्वाथलय् पलाः तयाच्चंगु दुसां थ्व मुक्कं नेपाःया प्रजातान्त्रिक आन्दोलनया छगू ब्व खः । नागरिकतय् सांस्कृतिक, भाषिक वा जातिय अधिकार न्यायोचित कथं मदुतले गुगुनं देया राजनीतिक व्यवस्था प्रजातान्त्रिक अर्थय् पूवंगु जुइमखु । भाषा व जातिय अधिकार थुज्वःगु अतिकं संवेदनशिल समस्या ज्यंकेगु खँय् राज्ययापाखें चकं नुगलं कुतः मयायेगु खत धाःसा थुकिं राष्ट्रिय एकता व सामाजिक सदभावनाया वातावरणयात तकं बांमलागु लिच्वः लाकीगुलि सकलें सचेत जुइत इनापयासैं “स्वनिगः बन्द” या भवलय् जिमिसं न्ह्यब्वयागु फुक्क ज्याभवलय् ब्वति कयाबियादीत सकल जनसमुदाययात हान छक्वः इनाप यानाच्चना । सुभाय् !

अमरेश नारायण भ्ना
कजि

मल्ल के. सुन्दर
कजि

भाषिक अधिकार संयुक्त संघर्ष समिति

नेपालभाषा संघर्ष समिति

२०५६ भदौ २५

(९३)

तंसा-पौ ६

श्री ५ या सरकारयापाखें नियन्त्रित थीथी संचार माध्यमय् नेपाल संवत् व नेपालभाषायात थाय् बीकेगु सम्बन्धय् १९९९ कछलागाः १० (२०५५ कात्तिक २७) कुन्हु नेवाःतय् न्त्यगु थीथी खलः पुचःया जिम्मेवार मनूतय्सं संचार मन्त्री राधाकृष्ण मैनाली नापलानाः लःल्हाःगु मागत । गुगु सकतां माग पूर्वकेगु निंतिं मन्त्री थःम्हेस्यां उघिमय् तोक आदेश च्याबीगु तकं ज्या जूगु खःसां मन्त्रालयया सचिवपिन्तं षडयन्त्रपूर्वक पनेगु ज्या जूगु खः ।

हनेबःम्ह मन्त्रीजु

श्री ५ या सरकार,
संचार मन्त्रालय,
सिंहदरवार, येँ ।

मूखँ - नेपाल संवत् व नेपालभाषायात थायः बीगुवारे

हनेबःम्ह मन्त्रीजु,

जिपिं नेपालभाषाया थीथी खलः पुचःया प्रतिनिधिपिं छिनाप क्वय् न्त्यब्वयागु मागत उघिमय् पूर्वकाबीगु निंतिं इनाप याःवयाच्चनागु जुल ।

मागतः

क. नेपाल संवत्या ऐतिहासिक मूयात नालाकासें
फुक्क सरकारी संचार माध्यमया प्रसारण व प्रकाशनय्
नेपाल संवत्या माःकथं छचयेकेगु जुइमाः ।

ख. नेवाःतय्सं मांभाय् कथं न्ववानावयाच्चंगु भाय्
नेपालभाषा खः । थ्व भाय्यात नेपालभाषा कथं

महसीकावयाच्चंगु खः आपालं ऐतिहासिक ज्वलनं क्यं ।
उकिं थ्व भाय्यात नेपालभाषाया पलेसा मेगु गुगु
नामं सरकारी संचार माध्यमय् यानावयाच्चंगु
छचलाबुलायात दिकाः थ्वया थःगुहे नां नेपालभाषां हे
धायेकेगु जुइमाः । लुमकेबहःगु खः खः, २०५२ भदौबले
उब्लेया प्रधानमन्त्री मनमोहन अधिकारीजुया
अध्यक्षताय् च्वंगु मन्त्रीपरिषदया मुंज्यां नं थ्व
सम्बन्धय् माःगु क्वछी धुंकूगु दु ।

ग. रेडियो नेपालया सुथसिया प्रसारणय् न्हिथं
नेपालभाषाया समाचार बुलेटिन प्रसारणयात आः तक
न्यागू मिनेटया जक ई प्यानातःगुलि उकियात भिगू
मिनेटयानाः उकियात माःगु जनशक्ति नं
चूलाकाबीमाः ।

घ. नेपाल टेलिभिजनया प्रसारणय् नेपालभाषाया माध्यमं
सूचना मूलकं, मनोरञ्जनात्मकं, साँस्कृतिक व
साहित्यिक ज्याभवःया निंतिं छगू ई क्वछीमाः । थ्वलिसें
नियमित कथं नेपालभाषाया समाचार बुलेटिन
प्रसारणया नं व्यवस्था याकनं जुइमाः ।

ङ. रेडियो नेपालपाखें प्रसारण जुइगु साहित्य संसार व
टेलिभिजनं प्रसारण जुइगु अभिव्यक्ति ज्याभवलय्
नेपालभाषाया साहित्यिक गतिविधयात नं माःगु थाय्
बीमाः ।

च. सरकारी स्वामित्वय् दुगु फुक्क संचार माध्यमय्
नेवाःतय् नखः चखःया ई ब्यःकथंया माःमाःगु ज्वलं
प्रसार प्रसारणया यायेगु ज्या जुइमाः ।

छ. सरकारी स्वामित्वय् दुगु संचार माध्यमं आःतक
नेपालभाषाया ज्याभवःया समाचार सङ्कलन व प्रचार
प्रसारय् नालावयाच्चंगु उदासिन स्थितियात
मदयेके माः ।

प्रतिनिधि मण्डल

सत्यमोहन जोशी
डा. कमलप्रकाश मल्ल
पद्मरत्न तुलाधर
दुर्गालाल श्रेष्ठ
उत्तम नारायण श्रेष्ठ
मल्ल के. सुन्दर
नरेश वीर शाक्य

नायः नेपालभाषा परिषद्
नायः च्वसापासा
नायः नेपालभाषा मंकाः खलः
नायः नेवाः गुथि
नायः ने.सं. १११९ न्हूदँ ग्वसाः खलः
कजि नेपालभाषा संघर्ष समिति
छर्चाज्ये नेवाः देय् दबू

२०५५ कात्तिक २७
१११९ कछलागा १०

तसापौ-७

स्वनिगः बन्दया ज्याभवः धुंकाः नेपालभाषा संघर्ष समितियापाखें प्रधानमन्त्री कृष्णप्रसाद भट्टराईयात ११२० कछलागाः ८ (२०५६ मंसिर १४) न्ह्यब्बःगु खुगू बुंदाया मागपत्र :

१. राष्ट्रयात परिभाषित यायेबले अन्तरराष्ट्रिय मान्यता व परिभाषापाखें निर्देशित जुइमाः ।
२. संविधानय् धर्म, वर्ण, लिङ्ग, जात, जाति वा विचारया लिधँसाय् भेदभाव मयाइगु धकाः धयातःगु दु । थथेहे भाय्या लिधँसाय् न नागरिकपिन्त गुगुं कथं भेदभाव मयाइगु खँ समानताया हकय् त्याजिक न्ह्यथनेमाः ।
३. मुलुकदुनेया फुक्क मांभाय् व उकिया लिपिया विकास राज्ययापाखें समान अवसर बीगु खँ संविधानयापाखें घोषणा जुइमाः ।
४. संविधानया धारा६(२)पाखें नेपाःया थीथी लागाय् न्ववाइगु मांभाययात राष्ट्रिय भाषाया कथं बियातःगु मान्यताया भावना कथं उज्वःगु भाय्या अधिकारया लागाया सम्बन्धय् संविधानयापाखें राष्ट्र संघीय मूल्य मान्यता कथं त्याजिक न्ह्यथनेगु जुइमाः ।
५. सर्वोच्च अदालतया २०५६ जेठ १८ गतेया डिभिजन बेञ्चयापाखें भाषा सम्बन्धी मुद्दाय् ब्यूगु आदेशयापाखे राष्ट्रिय भाषाया छ्यलाबुलायायेगुलि पनेगु ज्या जूवंगलिं लिपानं थुकथंया गुगुं कानूनी पङ्गु मवयेमा धकाः राष्ट्रिय भाषातय् निर्वाध कथं स्थानीय निकायस छ्यले/छ्ययेकेगु अधिकार संविधानयापाखें प्रत्याभूत जुइमाः ।

६. भाषिक आन्दोलनया भवलय् २०५६ भदौ ३० गते
जूगु स्वनिगः बन्दया शान्तिपूर्ण प्रदर्शनया भवलय्
प्रहरीं सार्वजनिक अपराध ऐन अन्तर्गत मखुगु मुद्दाय्
तक्यंकातःपिं यें व यलया सकल भाषिक
कार्यकर्तापिनि मुद्दा उघिमय लित कायेमाः ।

गुगु

- छम्ह मनुखं न्ह्यागुहे कारणं थःगु मांभाय्यात त्वफिका च्वनेमाःगु विवशताया स्थिति दुसां नं उम्ह मनु वा वया पूर्खा अले व मनुया समाजया साँस्कृतिक पूर्वाधार छु खः? उकिया लिधँसाय् व मनुया म्हसीका क्वःछीगु मेगु लंपु खः । छाय् धाःसा छम्ह मनुदुनेया जातियत्व (Ethnicity) या अभिव्यक्ति वया खाःया उन वा बान्कि वा भासं जक मखसँ व मनुया नसा, त्वसा, पुंसा, तिसा अले जीवन व जगत सम्बन्धी दृष्टिकोणयापाखें बियाच्वंगु दइ । - **नेवाः म्हसीका**

- वास्तवय् छम्ह गैरनेवाः व नेवाःयात मौलिक कथं भिन्न खः धकाः व्वयेगु गुगु साँस्कृतिक लिधँसा खः वहे सकल नेवाःया मंकाः संस्कृति खः, नेवाःया साँस्कृतिक म्हसीका Cultural Identity खः। अले, थुंकथं नेवाःतय्गु बिस्कांगु Cultural Identity याहे लिधँसाय् नेवाःया Cultural Nationalism ब्वलनाच्वंगु खः, न्ह्यानाच्वंगु खः । - **नेवाः म्हसीका**

- तर, नेवाःतय् गुम्हेसिया जीवन दर्शनय् सुं मेम्ह अराध्यदेव प्रतिसिवें मनुप्रति अगाध श्रद्धा व आस्था दु, अले उमिसं ख्यात संस्कृतिया रुपय् नालच्वंगु दु थ्वं भवलय् उमिसं पूजनीय शक्ति वा व्यक्ति कथं स्वयं मनुयात थनेगु यानावल ।

- **नेवाः जीवन दर्शन**

- लोक कल्याण वा सामाजिक सेवाया नितिं पाश्चात्य ख्यलं संगठित जुयाः ज्यायाये सयेकूगु अथेहे निसःदँहे मदुनि..... मेखे, नेवाः समाजय् जीवन्त कथं न्ह्यानावयाच्वंगु गुथिया परम्परा व थुकिं कयच्यानावयाच्वंगु सामुदायीकता व समाज सेवाया भावना छगु संस्कारया ल्याखं द्विछिदँ सिबें पुलां धैगु खँ ऐतिहासिक दसिपाखें कयनाच्वंगु दु । - **नेवाःदुने लोक कल्याणया भावना**

- नेवाःतय्सं नेपाल राष्ट्र निर्माणया नितिं ऐतिहासिक कालनिसें मदिकक बियावयाच्वंगु थुकथंया योगदानय् राज्ययापाखें आत्मगौरवया अनुभव यानाच्वंगु दु वा मदु ? नेवाःतय्गु थुकथंया भूमिकाय् सत्तायानितिं आत्मसन्तुष्टिया विषय जुयाच्वंगु दु वा मदु ? नेपाल एकीकरण जुल धाःगु निसः व चाचूदँ लिपा थौं वयाः हानं थ्व खँ सार्वजनिक च्युताःया विषय जुयाव्यूगु दु । - **राष्ट्र निर्माणय् नेवाःया भूमिका**

- छगु लिपा मेगु संघर्ष व आन्दोलनया भवलय् नेवाःतय् मेमेगु भाषाभाषी व जनजातिननाप दयावंगु बोलागु स्वापुया कारणं नेवाः आन्दोलनय् मेमेगु जाति भाषाया मनुतय्गु दुर्ग्यगु सहयोग व समर्थन प्राप्त जुजुं वनाच्वंगु जक मखसँ नेवाः आन्दोलन धैगुनं समग्र नेपाः राष्ट्रया भाषिक व जातिय मुक्ति आन्दोलनया छगु अभिन्न अङ्ग कथं विकसित जुइत स्वयाच्वंगु खत । - **नेवाः संगठन व आन्दोलन**